



## समर्पण

भगवान् महावीर

रै

धरम तीरथ रूप

चतुरविध

संघ

साधु, साध्वी, श्रावक, श्राविका

नै

धरौ आदर अर सरधाभाव

सूँ

समर्पित

—शान्ता भानावत



## आपणी ओर सूं

भगवान महावीर रँ २५००वे परनिर्वाण वरस रँ सुभ अवसर पर उणां रँ जीवन अर उपदेसां पर राजस्थानी भाषा में लिख्योड़ी आ पोथी पाठकां रँ सामें प्रस्तुत करणां म्हनें घणो हरख अर उमाव है । प्रभु महावीर लोक धरम रा नायक हा । वांरो धरम क्णिणी जाति या वर्ग विशेष खातर नीं हो । वां सगळा लोगां नै आपणो जीवन नैतिक अर पवित्र वग्णावण खातर उण वगत री लोक भाषा अर्ध मागधी (प्राकृत) में आपणा उपदेस दिया ।

हर मिनख आपणी बोली में कह्योड़ी वात वेगो समझ जावै । उणरो असर भी वी पर घणो टिकाळ हुवै । ओ इज कारण हो कै प्रभु महावीर रँ सम्पर्क में जै भी आया वै उणां रँ उपदेसां सूं आपणो जनम-मरण सुधारण खातर भोग मारग सूं त्याग मारग कांनी वढ्या ।

राजस्थानी भाषा रँ प्रति सरु सूं ई म्हारो लगाव रह्यो । म्हारै मन में विचार आयो कै जै प्रभु महावीर री जीवन-गाथा अर इमरत वाणी कदास राजस्थानी भाषा में प्रस्तुत की जावै तो अठारा लोगां पर उणरो गेहरो असर पडैला । इणीज भावना सूं प्रेरित होय'र म्हें आ पोथी लिखी ।

इण पोथी में बारा अध्याय है। सरुआत रा तीन अध्याय काळचक्र, चवदह कुळकर अर महावीर सून पैली हुयोड़ा तैवीस तीर्थकरां सून सम्बन्ध राखै। बाद रा छह अध्यायां मांय महावीर रै जनम काळ री स्थिति, उणारै जनम, टाबरपण, वैराग, साधक जीवन, केवळीचर्या अर परिनिर्वाण रो विवरण है। आखरी तीन अध्याय महावीर रै सिद्धान्त, महावीर री परम्परा अर महावीर-वाणी सून सम्बन्धित है। महावीर-वाणी में भगवान् महावीर रा जीवनस्पर्शी उपदेस मूळ प्राकृत भाषा में राजस्थानी अनुवाद रै सागै संकलित किया गया है।

इण पोथी रै लिखण में म्हारा पति डा० नरेन्द्र भानावत सरु सूँई म्हारो मार्गदर्शन करियो। आचार्य श्री हस्तीमलजी म० सा० द्वारा लिख्योड़ी 'जैन धर्म का मौलिक इतिहास' प्रथम भाग (तीर्थङ्कर खण्ड) अर श्री मधुकर मुनि, श्री रतन मुनि, श्री श्रीचन्द सुराना 'सरस' द्वारा लिख्योड़ी 'तीर्थङ्कर महावीर' पोथियां सून म्हनै विशेष मदद मिली। इणारै प्रति आभार प्रगट करणो म्हूं आपणो परम कर्तव्य मानूं।

अनुपम प्रकाशन रा संचालक श्री मोहनलाल जैन इण पोथी रै छपावण रो जिम्मो ले'र जिण साहस रो परिचय दियो वो प्रशंसा जोग है। पोथी जलदी में तयार करीजगी है। इण कारण जै कोई अशुद्धियां रैयगी है, उण खातर म्हूं पाठकां सून माफी चाळूं।

म्हने पूरो भरोसो है के आ पोथी जन साधारण नै भगवान  
महावीर रै जीवन अर उपदेसां री ओळखाण करावण में सहयक  
हुसी । जै लोग इएनै पढ'र आपणो जीवन संयमित अर पवित्र  
वणावण री दिसा में थोड़ा भी आगे वड्या तो म्हूं आपणो ओ  
प्रयास सार्थक समझूंली ।

सी-२३५ ए, तिलकनगर  
जयपुर-४.

—शान्ता भानावत

## अनुक्रमणिका

१. काल रो पहियो	१
२. चवदह कुलकर	३
३. चौबीस तीर्थकर	६
४. महावीर रै जनमकाल री स्थिति	२१
५. जनम अर टाबरपण	२४
६. विवाह अर वैराग	३०
७. साधक जीवन	३४
८. केवलीचर्या	५६
९. परिनिर्वाण	१०३
१०. महावीर रा सिद्धान्त	१०५
११. महावीर री परम्परा	१३८
१२. महावीर-वाणी	१४५

## १ | काल रो पहियो

जैन सास्त्रां रै मासिक काल रो प्रवाह अनादि-अनन्त है । काल रो मत्रसूं छोटी अविभाज्य इकाई 'समय' अर सवसूं बडी 'कल्पकाल' कहीजै । एक कल्पकाल रो परिमाण बीस कोड़ाकोड़ि 'सागर' मानीजै जो मोटे तीर सूं संख्यातीत वरसां रो व्हे । हरेक कल्पकाल रा दो विभाग व्हे—एक 'अवसर्पिणीकाल' अर दूजो उत्सर्पिणीकाल । जिरा भांत दिन पूरो हुयां पछै रात आवै अर रात पूरो हुयां पछै दिन आवै, उणीज भांत अवसर्पिणीकाल अर उत्सर्पिणीकाल एक दूसरां रै लारै आवता रैवै । अवसर्पिणी लगोलग ह्रास अर अवनति रो काल व्हे अर उत्सर्पिणी उत्तरोत्तर विकास अर बढ़ोतरी रो काल कहीजै । अवसर्पिणीकाल नीचे लिख्योड़ा छह भागा मै बांटयो जा सकै—

- |              |              |
|--------------|--------------|
| 1. सुखमासुखम | 2. सुखम      |
| 3. सुखमादुखम | 4. दुखमासुखम |
| 5. दुखम      | 6. दुखमादुखम |

पैलड़ै सुखमासुखम काल में जीव नै किरणी भांत रो कोई तकलीफ नी व्हे । इग काल में मिनख री काया रो बळ, उमर, डीलडील वत्तो व्हे । मिनख नै गुजारा खातर सगळी चीजां विगय मैनत-मजूरी कर्यां कल्पपत्रक्षां सूं सहज रूप में मिल जावै । कुदरत रै चोखै, शांत वातावरण में मिनख रो मन हर वगत आनन्द सूं हिलोरां लेवतो रैवै । दूजै सुखम काल में पैलड़ै काल री सुख-सांति में थोड़ी कमी आवै अर तीजै सुखमादुखम काल ताई आवतां-आवतां मिनख नै सुख रै सागै दुखां रो अनुभव पण होवण लागै । घं तीन्हूं काल सुख अर भोग प्रधान हुवै । मिनखां रो पूरो जीवण



कुदरत रै भरुसे रैवै । अँ काळ भोगयुग या भोगभूमिकाळ रै नाम सूं जाणीजै ।

चौथै काळ दुखमासुखम में घरती रै रंग, रूप, रस, गंध स्पर्श अर उपजाऊपण में कमी होणी सरु व्है । खावण-पीवण री चीजां री कमी पड़ जावै । कळपत्रक्षां सूं सगळो काम नी सरै । मिनखां रा डीलडौल, वळ, उमर सैं घट जावै अर जीवण में दुखां री प्रधानता रैवण लागै । पांचवै काळ दुखम ताईं आवतां-आवतां मिनखां रै जीवण में संघर्ष री ओरूँ बढ़ोतरी व्है अर सुख नाम मातर रो रै जावै । छठै काळ दुखमादुखम में दुख आपणी सीमा लांघ जावै । सुख नाममातर ई नी रैवै । इण काळ में मिनख असान्ति री आग मे वळवा लागै ।

पण आ स्थिति भी पळटौ खावै । काळ रो पहियो घूमै । छठै दुखमादुखम काळ सूं सरु होय नै पांचवौ (दुखम) चौथो, (दुखमा-सुखम) काळ आवै । ओ काळ उत्तरोत्तर विकास अर बढ़ोतरी रो हुवै । इणां रै सरुपोत रा तीन काळां में करमभूमि री अर लारला तीन काळां में भोगभूमि री व्यवस्था रैवै । अबार अवसर्पिणीकाळ रो पांचवो आरो दुखम चालै ।

-----

## २ | चवदह कुलकर

अदसपिणी काल रै इरा पहियै रै तीजै काल सुखमादुखम रो जद आधै सूं वत्तो वगत वीतग्यो, तद मिनखां नै दुख रो अहसास हुर्यो । वळपत्रक्षां सूं सै चीजां मिलणी वन्द होवा लागी । गुजारा ख'तर लोग आपस में लडवा लाग्या । सै मिनख ससकित अर भयभीत हया, वां में क्रोध, लोभ, छल, प्रपंच, घमंड, जिसी राक्षसी वृत्तियां पनपवा लागी, जिसूँ मानव समाज असांति री आग में बलवा लागो । तद उगांरी संका मिटावण अर समस्यावां रो समाधान करण खातर एक नूँईं व्यवस्था रो जनम हुयो । आ नूँईं व्यवस्था कुळकर व्यवस्था कहीजै । सगळा मिनख मिल'र छोटा-छोटा कुळ वणाया अर प्रतिभावान चोखै मिनख नै आपणै कुळ रो नेता मजूर करियो । कुळ री व्यवस्था अर उगारो नेतृत्व करण खातर अँ कुळनायक 'कुळकर' नाम सूं प्रसिद्ध हुया । मननसील हुवण रै कारण अँ 'मनु' पण कहावा लाग्या । इरा री संतान मानव कहीजै ।

कुळकरां री सख्या चांदह मानीजै । पैला कुळकर मनु या प्रतिश्रुत हा । अगां लोगां नै मूरज अर चांद रै उदय अर अस्त जिसी क्रुदन्तो घटनावा रो भेद वतायो । दूजा कुळकर सन्मति लोगां नै नखत अर तारा रो जान करायो । तीजा कुळकर क्षेमंकर लोगां नै जगली जिनावरां सूं निरभं रैय उगानै पाळतू वणावण री तरकीव वताई । चौथा कुळकर क्षेमधर ना'र जिसा हिंसक जिनावरां सूं आपणी रक्षा खातर लकडी अर भाटा आदि नै काम मे लेवण री कळा सिखाई । पाँचवां कुळकर सीमकर लोगां में कळपत्रक्षां खातर हुवण आळा आपसी भगडा मेट'र हरेक कुळ रै अधिकार क्षेत्र री सीमा तै करी अर लोगां नै भगडा-फिसाद सूं बचाया । इरा काल

में अपराधी नै सजा देवण खातर 'हाकार' दण्डनीति री व्यवस्था ही । जो आदमी मर्यादा नै उलांघतो उगानै इतरो सो'क केवणौ कै 'हा' थै ओ कांई कर्यो, बड़ो जबरो डड हो । एक दफा इतरो कड़ो डंड देण रै बाद वो मिनख कदैइ दुबारा वा गलती नी करतो ।

छठा कुळकर सीमंधर बचियोड़ा कळपव्रक्षां पर वैयक्तिक मालकियत अर सीमा तै करी । आ बात कहीजै कै जद सूं ही मिनखां में निजी सम्पत्ति री भावना पैदा हुई । सातमा कुळकर विमलवाहन हाथी अर पालतू जिनावरां नै बांध राखण अर उगारो सवारी आदि कामां में उपयोग करण री सीख दीवी । आठमा कुळकर चक्षुष्मान जुगळिया स्त्री, पुरुसां नै संतान रो सुख देखणो बतायो । इणांसूं पैलां जुगळिया संतान नै जनम देयर खुद मर जावता । नवमा कुळकर यसस्वन लोगां नै संतान सूं नेह करणो अर उगारो नामकरण करण री सीख दीवी । दसवे कुळकर अभिचन्द्र बाळक रै रौणै, चुप करारौ बुलवारौ अर लालण-पाळण करण री लोगां नै सीख दीवी । छठा सूं दसवां कुळकर ताईं दण्डनीति में 'हा' री जगां 'मा' (नीं, मती करो) सबद रो प्रयोग हुवण लागो ।

ग्यारवे कुळकर चन्द्राभ सरदी, गरमी अर वायरे रै प्रकोप सूं दुखी अर भयभीत हुयोड़ा लोगां नै बचावण री तरकीब बताई अर बाळकां रै पाळण पोसण जैड़ी उपयोगी बातां सिखाई । बारहवा कुळकर मरुदेव लोगां नै नदी-नाळा पार करण अर पहाड़ां पर चढ़ण री कळा सिखाई । तेरहवे कुळकर प्रसेनजित बाळकां रै भली-भांत पाळण-पोषण री राय दीवी । चौदहवे कुळकर नाभिराय नवजात टाबर री नाभिनाळ काटण री विधि बताई । इण समय ताईं सगळा कळपव्रक्ष खतम हुयग्या हा । नाभिराय गुजारा खातर लोगां नै धरती पर उग्योड़ा जौ, सालि, तुवर, उड़द, तिल आदि चीजां खावण रो तरीको बतायो । आखरी चार कुळकरां रै समै दण्डनीति में 'धक्कार' सबद रो प्रयोग हुवण लागो ।

भोगभूमि अर कुळकर काळ रें सागें एक तरें सूं प्रागैतिहासिक जुग समाप्त हुवै । मिनख करम अर पुरुषार्थ रें जुग में प्रवेस कर'र नू ई सन्धता अर संस्कृति रो इतिहास मांडणो सरु करै । इण नूवै जुग रा प्रमुख धरम नेता चौवीस तीर्थंकर तथा बीजा उनतालीस' महापुरुष हुया । सें मिला'र अै 'त्रिपण्ठिशलाका पुरुष' कहीजै ।

१. क-बारा चक्रवर्ती— (१) भरत (२) सगर (३) मघवा (४) सनत कुमार (५) शान्तिनाथ (६) कुण्डुनाथ (७) धरनाथ (८) सुभूम (९) पद्म (१०) हरिवेण (११) जयसेन (१२) ब्रह्मदत्त ।

ख-मौबळदेव— (१३) विजय (१४) अचल (१५) सुधर्म (१६) सुप्रम (१७) मुदर्शन (१८) नन्दी (१९) नन्दि-मित्र (२०) राम (२१) पद्म (बळराम) ।

ग-नी धामुदेव — (२२) त्रिपृष्ठ (२३) द्विपृष्ठ (२४) स्वयम्भू (२५) पुरुषोत्तम (२६) पुरुषार्तिह (२७) पुरुष-पुण्डरीक (२८) दत्त (२९) नारायण (लक्ष्मण) (३०) कृष्ण ।

घ-नी प्रतिवासुदेव— (३१) अश्वमीव (३२) तारक (३३) मेरक (३४) मधुकैटभ (३५) निशुम्भ (३६) बळि (३७) प्रह्लाद (३८) रावण (३९) जरासंध ।

‘तीर्थ’ नाम धरमशासन रो है। जै महापुरुस जनम-मरण रूपी संसार समन्दर सूं पार करण खातर धरमतीरथ री थरपणा करै, वै ‘तीर्थंकर’ कहीजै। जैन परम्परा में तीर्थंकरां री संख्या चौबीस मानीजै। इणां तीर्थंकरां में पैला तीर्थंकर भगवान ऋषभदेव अर आखरी तीर्थंकर भगवान महावीर हुया। चौबीस तीर्थंकरां रा नाम अर ओळखाण इण भांत है—

### १. ऋषभदेव :

आखरी कुळकर नाभिराय री पत्नी मरुदेवी री कूख सूं पैला तीर्थंकर भगवान ऋषभ रो जनम चैत वद आठम (नवमी) रै दिन अयोध्या में हुयौ। बाळक ऋषभ जद मां रै गरभ में हा तद मां सुपना में पैलाई पैल वृषभ देख्यो हो अर बाळक रै छाती पै वृषभ रो लांछण पण हो, ईं कारण इणांरो नाम ऋषभदेव (वृषभदेव, वृषभनाथ) प्रसिद्ध हुयौ। बाळक ऋषभ वड़ा हुयने कुळ री व्यवस्था आपणौ हाथ में लीवी। ईं खातर अ कुळकर अर मनु पण कही जै। मानव सम्यता रै विकास रो श्रेय ऋषभ नैइज दियो जावै। ईं कारण अ आदिनाथ, आदिदेव, आदीश्वर, आदिव्रह्म पण कहीजै। इणां जै काम करिया बिगर किणी रो सीख सूं आपो आप मतैइ करिया, ईं खातर अ स्वयंभू पण कही जै।

जद ऋषभ वड़ा हुया तद आपरौ व्याव सुनन्दा अर सुमंगळा सूं हुयो। आ मानी जै कै व्याव री रीत इणीज काळ सूं चाली। व्याव रै पछै ऋषभ रो राजतिळक हुयो। अ मानव सम्यता रै विकास रा सूत्रधार हा। इणासूं पैलां सैं भिनखां रो गुजारो कळपत्रक्षां

सूँ चालतो हो । होळै-होळै मिनखां री बढोतरी सूँ कळपत्रक्ष कम पडवा लागा तद गुजारा खातर मिनख आपस मे लडता-भगडता । आ देख ऋषभ लोगां नै खेती करण, लिखण-पढण अर बीजा काम धन्धा री सीख दीवी । आ मानीजै कै ऋषभ पुरुषां नै बहत्तर अर लुगायां नै चौंसठ कळावां पण सिखाई ।

ऋषभ लुगायां री पढाई-लिखाई रा हामी हा । आपणी वेतो सुन्दरी नै आप अंक ज्ञान अर ब्राह्मी नै लिपि ज्ञान सिखायो । आगे जा'र आ लिपि ब्राह्मी लिपि रै नाम सूँ प्रसिद्ध हुई । इण भान ऋषभ प्रजा रो पाळण-पोपण अर मार्गदर्शन घणा वरसां तांई करियो । ऋषभ आ मानता हा कै धरम रै मारग पर चाल्यां विगर आत्मिक सान्ति कोनो मिलै । आ सोच वी आपणै वडे पुत्र भरत नै राज रो भार सूँ प'र खुद विरक्त हो'र आतम साधना रै मारग पर आगै बढ्या ।

ऋषभ चैत वद आठम रै दिन मुनि दीक्षा अंगीकार करी । दीक्षा धारण करवासूँ पैली आप आपणी सम्पत्ति जरुरतमंद लोगां में वांटी अर आ वात समझाई कै सम्पत्ति री महत्ता भोग में नीं हो'र त्याग में है ।

मुनि वण'र ऋषभ घणी कठोर तपस्या करणी सह करी । छह माह रो अनसन वरत धारण कर प्रभु ध्यान साधना में लीन चहैग्या । छह माह वीतवा पर प्रभु भिक्षा खातर गांव-गांव विहार करता र्या । इण समै में वी मौन रैवता हा । ईं कारण लोग आ नी जाण सक्या कै प्रभु नै क्रिण चीज री चावना है । मिनख इणानै भेंट में कीमती गैणां=गाभा अर हाथी-घोड़ा देवता पण प्रभु बिगर काई चीजवसत लिखां, पाछा फिर जावता । यू करतां-करतां छह माह शेरुं वीतग्या ।

एकदा प्रभु विचरण करतां-करतां हस्तिनापुर पधारिया । अठारो राजा सोमयज्ञ हो । ईं रो छोटी भाई श्रेयांसकुमार धार्मिक

वृत्ति रो हो । पूरव जनम रा संस्कारां सूं प्रेरित होयर वीं प्रभु नै ईख रै रस री भिक्षा दीवी । वो बैसाख सुद तीज रो दिन हो । भगवान री लम्बी तपस्या रो पारणो ईं दिन हुयो । इण खातर ओ दिन आखातीज रै नाम सूं प्रसिद्ध हुयो । आज पण इण दिन वरसी तप रा पारणा हुवै ।

तप अर साधना करतां-करतां पुरिमताळ नगर रै वारै बड़ रै रूख हेठै ध्यानमगन प्रभु नै केवळज्ञान हुयो । वे सर्वज्ञ, जिन, अर्हन्त, बराग्या । पछै लोककल्याण खातर उपदेस देवता थका कैळास परवत पर आप निर्वाण प्राप्त करियो । भगवान ऋषभदेव जैन धर्म रा प्रवर्तक अर जैन परम्परा रा पैला तीर्थंकर हा ।

## २. अजितनाथ :

भगवान ऋषभ रै निर्वाण रै घणां बरसां पाछै विनीता नगरी रै महाराजा जितसन्नु री राणी विजयादेदी री कूख सूं दूजा तीर्थंकर श्री अजितनाथ रो जनम हुयो । इणारो लांछण हाथी है । घणा बरसां ताईं आप राज्य अर गिरस्थ जीवन रो उपभोग करियो । पछै आप दीक्षा लीवी अर कठोर तपस्या कर'र केवळज्ञानी बण'र आप लोगां नै धरमदेसना दीवी अर सम्मेदसिखर पर निर्वाण प्राप्त करियो ।

## ३. संभवनाथ :

तीजा तीर्थंकर श्री संभवनाथ हुया । इणारो जनम स्रावस्ती नगरी में इक्ष्वाकु वंस में हुयो । इणारै पिता रो नाम जितारी अर माता रो सोना देवी हो । आपरो लांछण घोड़ो है । लम्बा समय ताईं गिरस्त जीवन में रैय'र आप दीक्षा लीवी अर तपस्या कर'र केवळज्ञान प्राप्त करियो । आपरो निर्वाण सम्मेदसिखर पर हुयो ।

#### ४. अभिनन्दन :

चौथा तीर्थंकर श्री अभिनन्दन हुआ। इणां रो जनम अयोध्या नगरी में हुयो। आपरै पिता रो नाम महाराजा संवर अर मातारो महाराणी सिद्धार्था हो। इणांरो लांछण वानर है। मुनि धरम अंगीकार कर आप कठोर तपस्या करी अर सम्मेदसिखर पर निर्वाण प्राप्त करियो।

#### ५. सुमतिनाथ :

पांचवा तीर्थंकर श्री सुमतिनाथ हुआ। आपरो जनम अयोध्या में हुयो। आपरो लांछण त्रौंच है। आपरै पिता रो नाम महाराज मेघ अर माता रो राणी मगळावती हो। आप कठोर तपस्या कर'र केवळज्ञानी बण्या अर सम्मेदसिखर सूं मुगति प्राप्त करी।

#### ६. पदमप्रभु :

छट्ठा श्री पदमप्रभु रो जनम कौसाम्बी नगरी में हुयो। इणांरै पिता रो नाम महाराजा घर अर माता रो सुसीमा हो। आपरो लांछण कमळ है। आप दीक्षा लै'य नै कठोर तप करियो अर केवळज्ञान प्राप्त कर संसारी प्राणियां नै धरम रो उपदेस दियो। सम्मेदसिखर सूं आप निर्वाण प्राप्त करियो।

#### ७. सुपाश्वर्चनाथ

सातवां तीर्थंकर श्री सुपाश्वर्चनाथ रो लांछण स्वस्तिक है। आपरो जनम वाराणसी में हुयो। आपरै पिता रो नाम महाराज प्रतिष्ठसेन अर माता रो राणी पृथ्वी हो। आप घोर तपस्या कर'र सम्मेदसिखर सूं निर्वाण प्राप्त करियो।



### ६. चन्द्रप्रभ :

आठवां तीर्थङ्कर श्री चन्द्रप्रभ रो लांछण चन्द्रमा है । आपरो जनम चन्द्रपुरी में हुयौ । आपरै पिता रो नाम राजा महासेन अर माता रो राणी सुलक्षणा हो । आप घोर तपस्या कर'र सम्मेद-सिखर सूं निर्वाण प्राप्त करियो ।

### ६. सुविधिनाथ :

नौवां तीर्थङ्कर श्री सुविधानाथ हुया । आपरो बीजो नाम पुष्पदंत पण हो । आपरो लांछण मगर है । आपरै पितारो नाम राजा सुग्रीव अर माता रो नाम वामादेवी हो । आपरो जनम काकंदी नगरी में हुयो अर निर्वाण सम्मेदसिखर पर । सिन्धुघाटी सभ्यता रो ओ उत्कर्ष काळ हो । उण काळ में मगर प्रतीक री घणी मानता ही । इणाज कारण उण देस रो नाम मकरदेस प्रसिद्ध हुयो । इण सूं ठा पडं के तीर्थङ्कर पुष्पदंत री अठे घणी मानता अर प्रसिद्धि ही ।

### १०. सीतलनाथ :

दसमा तीर्थङ्कर श्री सीतलनाथ हुया । इणांरो लांछण श्रीवत्स है । आपरै पिता रो नाम महाराज हृदरथ अर माता रो नन्दादेवी हो । आपरो जनम भद्विलपुर में हुयो अर निर्वाण सम्मेद-सिखर पर ।

### ११. श्रेयांसनाथ :

ग्यारमा तीर्थंकर श्री श्रेयांसनाथ हुया । इणांरो लांछण गैंडो अर वंस इक्ष्वाकु हो । इणांरो जनम सिंहपुरी नगरी में हुयो । आपरै पिता रो नाम महाराज विष्णु अर माता रो महाराणी विष्णुदेवी हो । आपरै समै मे पैदनपुर मे राजा त्रिपूष्ठ हुयो जो नौ वासुदेवां में

पैलो हो । त्रिपृष्ठ रो भाई विजय नौ बळदेवां में पैलो गिण्यो जावै ।  
 अँ दोन्युं भाई घणा प्रतापी अर तीर्थङ्कर श्रेयांसनाथ रा खास  
 भगत हा । श्री श्रेयांसनाथ धरम री टूटी परम्परा नै फेहँ जोड़ी  
 अर तीर्थङ्कर धरम री लोक में पुखती थरपणा करी । आपरो  
 निर्वाण सम्मेदसिखर पर हुयो ।

### १२. वासुपूज्य :

वारमा तीर्थङ्कर श्री वासुपूज्य हुया । इणांरो लांछण भैंसो  
 है । आपरो जनम चम्पानगरी में हुयो । आपरै पिता रो नाम  
 वसुपूज्य अर माता रो जयादेवी हो । आपरै समै में दूजो बळदेव  
 अचळ, दूजो वामुदेव द्विपृष्ठ अर दूजो प्रतिवामुदेव तारक हुयो ।  
 आपरो निर्वाण स्थळ चम्पा मानीजै ।

### १३. विमलनाथ :

तेरहवां तीर्थङ्कर श्री विमलनाथ हुया । इणांरो जनम स्थान  
 कम्पिळपुर हो । आपरै पिता रो नाम कृतवर्मा अर माता रो स्यामा  
 हो । आपरो लांछण सुअर अर निर्वाण स्थळ सम्मेदसिखर है ।  
 आपरै समै में सुधर्म नाम रो बळदेव, स्वयंभू नाम रो वासुदेव अर  
 मेरक नाम रो प्रतिवामुदेव हुयो ।

### १४. अनन्तनाथ :

चवदवां तीर्थकर श्री अनन्तनाथ हुया । इणां रो जनमस्थान  
 अयोध्या, वंस इक्ष्वाकु, पिता रो नाम सिंहसेन अर माता रो सुयसा  
 हो । आपरो लांछण वाज अर निर्वाणस्थळ सम्मेदसिखर हो ।  
 इणीज काळ में सुप्रभ बळदेव, पुरुसोत्तम वामुदेव अर मधुकैटभ  
 प्रतिवामुदेव हुया ।

### १५. धरमनाथ :

पन्द्रहवां तीर्थंकर धरमनाथ हुआ। इणारो जनमस्थान रतनपुर हो। कुह्वसी राजा भानु आपरा पिता अर माता सुव्रता ही। आपरो लांछण वज्रदंड अर निर्वाणस्थळ सम्मेदसिखर हो। आपरै समै में सुदरसन बळदेव, पुरुषसिंह वामुदेव अर निसुम्भ प्रति वासुदेव हुआ। आपरै निर्वाण पछै आपरै तीरथ में मघवा अर सनत-कुमार नाम रा दो चक्रवर्ती सम्राट हुआ।

### १६. शांतिनाथ :

सोलवां तीर्थंकर श्री शांतिनाथ हुआ। इणारो जीवन प्रभावशाली अर लोकोपकारी हो। आपरो लांछण, हरिण, जनम-स्थान हस्तिनापुर, पितारो नाम महाराज विश्वसेन अर माता रो महाराणी अचिरा हो। शांतिनाथ चक्रवर्ती सम्राट हा। घणा बरसां ताई ईं धरती पर आप राज करियो। पछै दोक्षा लैर कठोर तप कर'र केवळज्ञान री प्राप्ति करी। आप सम्मेदसिखर सूं निर्वाण प्राप्त करियो। शांतिनाथ भगवान घणा लोकप्रिय तीर्थंकर हुआ। आपरी उपासना रो आज भी घणो महत्त्व है।

### १७. कुंथुनाथ :

सतरहवां तीर्थंकर श्री कुंथुनाथ हुआ। इणारो जनम हस्तिनापुर में हुयो। आपरै पिता रो नाम महाराज वसु अर माता रो श्री देवी हो। आप भी आपणै समै रा चक्रवर्ती सम्राट हा। आपरो लांछण बकरो अर निर्वाण स्थळ सम्मेदशिखर हो।

### १८. अरनाथ :

अठारमां तीर्थंकर भगवान अरनाथ हुआ। आपरी जनम-स्थान हस्तिनापुर, लांछण नन्दावर्त, पिता रो नाम महाराज

सुदर्शन, माता रो राणी महादेवी अर निर्वाण स्थळ सम्मेदसिखर हो । आप पण आपणै समै रा चक्रवर्ती सम्राट हा । इणीज काळ में नंदिणेण बळदेव, पुण्डरीक वासुदेव अर वळि प्रतिवामुदेव हुया । आपरै निर्वाण पछे आपरै घरमतीर्थ में सुभूम नाम रा चक्रवर्ती हुया । परमुराम अर सहस्रबाहु रै संवर्ष रो ओइज काळ है ।

### १६. मल्लिनाथ :

उन्नीसमा तीर्थंकर श्री मल्लिनाथ हुया । इणांरो जनम मिथिला नगरी में हुयो । आपरै पिता रो नाम महाराज कुंभ अर माता रो प्रभावती हो । आपरो लांश्रण कळस अर निर्वाण स्थळ सम्मेदसिखर है । आपरै तीर्थ काळ में पदम नाम रा चक्रवर्ती सम्राट, नन्दिमित्र वळदेव, दत्त वासुदेव अर प्रह्लाद प्रतिवासुदेव हुया ।

श्वेताम्बर परम्परा माने है के तीर्थंकर मल्लिनाथ स्त्री रूप में जनमिया हा । वाळका मल्ली घणी रूपाळी अर गुणवती ही । आपरै रूप अर गुण री चरचा चारूंकानी फैल्योडी ही । जद मल्ली कुंवरी बडी हुई तो वारै रूप अर गुणां सू मोहित हो र छे देसां रा राजावां मल्ली कुंवरी रे पिता रं कने दूता लारे संदेशो मोकल्यो के म्हां मल्ली रै सागे व्याव करणो चावां ।

मल्ली रा पिता कुंभ लाचार हा । छे राजा रै सागे एक राजकंवरी रो व्याव कोकर हो सकै, आ सोच राजा कुंभ सगळा राजावां रा दूतां नै नां दे दीवी । नां रा समीचार सुण छऊं राजा बेराजी हुयग्या । वां राजा कुंभ री नगरी मिथिला पर धावो बोल दियो । कुंभ छऊं राजावां सू मुकावलो करण में समरथ नी हा । ईं कारण वी दुगध्या में पडग्या अर उदास रैवा लाग्या । पिता नै उदास देख राजकंवरी बोली—आप किणी भांत री चिन्ता

मती करो । छऊं राजावां नै दूतां सागै संदेसो दिरा देवौ कं कुंवरी मल्ली थां सूं ब्याव करण नै तैयार है ।

बेटी मल्ली री लायकी अर बुद्धिबळ सूं राजा कुम्भे वाकब हा । वां सोच्यो—राजकुंवरी मतैइ समस्या रो समाधान करलैला । आ सोच वां छऊं राजावां नै जुदो-जुदो संदेसो भिजवा दियो ।

ब्याव री रजामंदी रा समीचार सुण'र साकेतपुरी रा राजा प्रतिबुद्ध, चम्पा रा चन्द्रछाग, कुणाळा रा रूक्मी, वाराणसी रा संख, हस्तिनापुर रा अदीनसत्रु अर कम्पिळपुर रा जितसत्रु मिथिला नगरी पोचिया ।

मल्लीकुंवरी रै रूप पर मोहित हुयौड़ा राजावां नै प्रतिबोध देण खातर मल्ली एक मोहनघर बणावायो हो । वीं घर रै बीचोबीच कुंवरी आपरै सरीर जिसी रूपाळी सोने री एक पोली मूरत बणावाई । वी मूरत मे रोजाना खाणो खावण सूं पैलां वां एक:एक कवौ नाखती ही ।

मल्लीकुमारी ब्याव खातर आयोड़ा राजावां नै अशोकवाड़ी में बण्योड़ै मोहनघर मे रुकाया । वी घर में मूरत कनै जावा रा जुदा-जुदा दरवाजा हा । मांयनै बड़ियां पछै कोई एक दूजां नै कोनी देख सकता हा । जुदी-जुदी जगां मे बैठ्योड़ा राजा मल्ली कुंवरी री बणी रूपाळी मूरत नै देखबा लाग्या । मनहरणआळी सुन्दर मूरत नै देख सै राजा दग रैग्या । वांकै मन में रैय रैय नै रूपवती कुंवरी मल्ली नै पटराणी बणावण री भावना उठ री ही ।

राजावां नै मूरत पै रीइयोड़ा देख मल्ली कुंवरी मूरत पर सूं ऊपरलो ढांकणो हटा दियो । ढांकणो हटताईं मूरत में जम्योड़ै

सड़ियोड़ें भोजन री दुर्गन्ध सूं राजावां रो माथो फाटबा लाग्यो, जीव मिचलावा लाग्यो । नाक आडो दस्तीरूमाल लगार वी बारै भागवा री कोसिस करवा लाग्या । अरवै मूरत पर सूं वांको ध्यान हटग्यो । वी समै मल्ली कुंवरी राजावां नै प्रतिबोध दैवता कैवण लागी—ईं मूरत मे पड़ियै सड़्यौड़े अन्न री दाईं ओ सरीर परण सूगळो अर निस्सार है । ज्ञानी पुरुस बाह्य सरीर रै रूप-रंग सूं प्रीत कोनी करै । आप लोग म्हारै ईं नश्वर सरीर खातर पिताजी पर हमलो करण नै तैयार हो । जरा सोचो ! ईं जुद्ध में कितरा निरपराध प्राणियां री हिंसा हुवैली ।

मल्ली कुमारी रो प्रतिबोध सुरा छऊं राजा आपणी गलती पर पछतावो करियो । वी विनय भाव सूं बोलिया—भगवती ! थां म्हानै अंधारां सूं उजाळा में लै आया हो । अरवै म्हें सजम रै मारण पर चालर आपणां करम काटालां ।

छऊं राजावां नै प्रतिबोध देय'र मल्लिकुमारी दीक्षा अंगी-कार करी । पछै कठोर तपस्या करनै निर्वाण प्राप्त करियो ।

## २०. मुनिसुव्रत :

वीसवां तीर्यङ्कर थी मुनिसुव्रत हुया । इणारो जनम राजगृही में हुयो । आपरै पिता रो नाम महाराज सुमित्र अर माता रो महाराणी पद्मावती हो । आपरो लाछण काछवो अर निर्वाणस्थळ सम्मेदसिखर हो । आपरै समै मै इज राम-रावण रो सघर्ष हुयो । जैन मतानुसार इणीज काळ में राम वळदेव, लक्ष्मण वासुदेव अर रावण प्रतिवासुदेव हुया । महाराणी सीता री गणना जैन परम्परा माफिक सौळे सत्तियां में हुवै । मुनि सुव्रत रै तीरथकाळ में हरिषेण नाम रा चक्रवर्ती सम्राट हुया ।

## २१. नेमिनाथ :

इक्कीसमां तीर्थकर श्री नेमिनाथ हुआ। आपरो लांछण नीलकमल, जनम स्थान मिथिला, पिता रो नाम महाराज विजय अर माता रो नाम महाराणी वप्रा हो। आपरो निर्वाण स्थल सम्मेदसिखर मानीजै। आपरै तीर्थकाळ में इज कौसाम्बी नगरी में जयसेन नाम रा चक्रवर्ती सम्राट हुआ।

## २२. अरिष्टनेमि :

बाइसमा तीर्थकर श्री अरिष्टनेमि हुआ। अं नेमिनाथ परा कहीजै। आपरो जनम सौरीपुर में हुयो। आपरै पिता रो नाम समुद्रविजय अर माता रो शिवादेवी हो। नेमिनाथ यदुवंसी हा। श्रीकृष्ण समुद्रविजय रै छोटा भाई वासुदेव रा पुत्र हा। नेमिनाथ रो लांछण शङ्ख है। नेमिनाथ ब्याव नीं करणो चावता परा श्रीकृष्ण अर आपणी भाभी सत्यभामा व रूक्मणी रै घरण आग्रह करण सूं आप ब्याव करण नै राजी हुया। श्रीकृष्ण जूनागढ़ रै राजा उग्रसेन री रूपाळी कन्या राजुळ सूं आपरी सगाई पक्की करी। सावण सुद छठ रै दिन विवाह रो मोरत आयो। बरात चढी। वींद वेस में राजकुंवर नेमि खूब सजायाग्या। बारात रवाना व्हैय नै उग्रसेन रै महलां कनै पहुँची कै एकाएक नेमिकुंवर पसुवां रो हाको सुणियो। वां सारथि नै पूछियो—ओ पसुवां रो करुण क्रन्दन कठा सूं आवै ? सारथि कयो—राजकुंवर आपरै ब्याव री खुसी में बहोत बड़ी जीमणवार हुवैली, वीं में इण पसुवां री बलि दी जावैली।

पसुवां री बलि देवण री बात सुण'र नेमिकुमार रो कोमळ काळजो पसीजग्यो। वण सारथि नै आज्ञा दीवी कै—जा'र सैं पसु-पक्षियां नै बाड़ै सूं वारै काढ दो। मिनख नै जियां आपणो जीव वाल्हो लागै उणीज भांत जिनावरां नै परा आपणो जीव वाल्हो है। म्हारै ब्याव रै मौकै हजारों-लाखां निरपराध भोला

जणा एक निजर सूँ महावीर कांनी देखर्या हा । एकाएक मंगळ गीत अर वाजा वन्द व्हाय्या । चारुंकांनी एकदम सांति छायगी । महावीर पंचमुष्टि केसलुंचन करियो । वणांरै चेहरा पर घणी खुसी ही, लिलाट अलौकिक तेज सूँ चमकर्यो हो । महावीर हाथ-जोड़ सिद्ध भगवान नै नमसकार करियो अर प्रतिजा करी कै म्हूँ आज सूँ समभाव धारण करूँ हूँ । मन, वचन अर करम सूँ पापपूर्ण (सावद्य) आचरण रो त्याग करूँ हूँ । मारै मारग में जै मुसीबतां अर उपसर्गा आवैला म्हूँ उगानै समभाव सूँ सहन करूँला । अर साधना रै ईं कंटीला मारग पर लगातार चालतोइ रैऊंला । देखता ईं देखता वर्धमान श्रमण वराग्या । अब वां रो घर, परिवार अर राज सूँ नातो टूटग्यो । वीं इसा राज में पोचग्या हा जठै किणी भांत रो दुख नी हो, वी इसा परिवार में मिलग्या हा जठै म्हारै अर थारै रै वीचै कोई भेद नी हो ।

अगणित आख्यां प्रभु महावीर रै दिव्य सरूप रो दरसण कर री ही, अगणित कान वांकी दिव्य साधना रो उद्घोष सुगर्या हा । श्रद्धा अर उमाव सूँ हजारुं आख्यां एकै सागै वरसवा लागी । लोगां रा हाथ आपै आप जुड़ग्या अर माथा आपै प्रभु रा चरणां में नमग्या । असंख्य कंठा सूँ एकै सागै आवाज गुंजी 'श्रमण महावीर री जय ।'



श्रमण वर्षमान नै क्षत्रिय कुंडपूर अर अठारा लोगां सूं मोह-ममता नी र्थी । वणा कयौ—महूँ तो अरुँ श्रमण हूँ । गज अर देस री सीमा सूं ऊपर । थां लोग अरुँ म्हारै साथै कठाताई रेवौला । वर्षमान री वाणी सुण सैं लोग आप आपरो गैलो पकड़ियो । श्रमण महावीर भी सबसूं विदा लैर चालिया एकला वनकांनी ।

महावीर मन मांय निश्चय करियो कै जठा ताई महनै जान री पूरी ओछखाण अर प्राप्ति नी हुवैला महूँ सरीर री ममता छोडैर जनभाव सूं साधना में लीन रैऊंला । देव, मिनख अर तिर्यच जीवा सूं जित्ता भी उपसर्ग (कष्ट) मिलैला, वानै समभाव सूं सहन कहंला ।

**महावीर री करुणा :**

जातलण्ड वन सूं आगै बढ़ती बखत एक गरीब वामण आय नै महावीर रै चरणां में पड़्यो अर कैवण लाग्यो—हे कुंवर ! थां साल भर ताईं खूब दान-दक्षिणा देयैर गरीवां री गरीबी मेटी, परण महूँ छोटा भाग रो गरीब कोरोइज रेइय्यो । म्हारा टावर अन्न रा दाणा-दाणा ताईं तरसर्या है । हे भगवन ! अरुँ म्हारी गरीबी मेटी । श्रमण महावीर बोलिया—अरुँ तो महूँ घरवार, धन-दौलत, राजसी ठाठ-वाठ सैं त्याग दिया है । वामण कैवण लाग्यो—आपरै कनै काई चीज नी हुवै तो आपरै कांधा पर पड़्यो ओ कपड़ो महनै बगस दो । महावीर उण कपड़ै मांय सूं भी आधो फाड़ैर वामण नै दे दियो अर आतम चिन्तन मे लीन व्हैगया ।

महावीर रो पुरसारथ :

कुरमागांव पोहच'र महावीर एक रुंठ हेठे ध्यान में लीन हुआ । इण सभै एक गवाळियो वळदां री जोडी लै'र वठीकर निक-ळियो । गवाळिया नै गायां दुवण खातर वेगोसोक गांव जाणों हो, ईं वास्तै वो आपणै वळदां री जोडी नै सागै नी लेजा'र वठै ध्यानमगन उभिओइँ महात्मा नै देख'र वो बोल्यो—बाबा ! थोडो म्हारै वळदा रो ध्यान रावज्यै । हूं अवार गायां रो दूध काढर वेगोसोक आळं । यूं कै'र गवाळियो वीर हयो । घड़ी दोय केड़े जद वो गांव जा'र पाओ आयो तो वठै वळदां नै नी देख गवाळियै नै घणी रीस आई । वो महावीर चूं पूछ्यो—बोल ! म्हारा वळद कठै गया ।

महावीर आपणै ध्यान में मगन आतम चिन्तर करर्या हा । अणां गवाळियै री बात नी तो सुणी अर नी कांई पडूतर दियो । गवाळियो वळदां री तलासी में रात भर अठी-उठी घूमतो रैयो । पण कठै वळद नी दिखिया । दिन उगै वो फेरूं वळदा री तलासी में महावीर कांनी आयो । वठै अचाणचक वळदा नै जुगाळी करतां देख'र वो दंग रैयग्यो । वो महावीर पर आग ववूलो हुयो । वीं नै लाग्यो कै ओ साधू तो कोई ठग है, ढोंगी है । इणीज कपट सूं म्हारा वळद छुपाय राखिया हा । आ सोच गवाळियो वळदां नै वांघण री रस्सी सूं महावीर पर वार करवा लाग्यो । पण महावीर सांत हा । इतरा में इन्द्र आय गवाळियै नै ललकारियो अर कयो कै—अ मुनि तो सिद्धार्थ रा पुत्र वधमान है । आतम कल्याण अर लोक-कल्याण खातर साधना में लीन है ।

इण घटना रै पछै इन्द्र प्रभु सूं अरज करी कै आपरी सेवा खातर म्हूं आपरें सरणां में रैवणो चावूं पण प्रभु ना देवता कयो—सिद्धि पावा खातर म्हनै किणी री सहायता री जरूरत कोयनी । भाधक आपणै पुरसारथ अर आतमवळ सूं इज सिद्धि प्राप्त करै ।

विदेह भाव :

महावीर जिएा दिन सूं प्रव्रजित हुआ, उएा दिन सूं सरीर री मोह ममता छोड़ दी ही । आपणै साधनाकाळ में वी एकान्त गुफा, निर्जन भूंपड़ी अर धरमसाळा में ध्यानस्थ रैवता । कड़कड़ाती सरदी अर बळतै तावडै में वा नै घणी तकलीफां भेलणी पड़ती । सरप, बिच्छू जिसा जहरीला कीड़ा अर कागळा, गिरजड़ा जिसा नुकीली चोच आळा जिनावर वां रै सरीर नै नोंचता एएा महावीर कदै वांसू दुखी हो'र आपणा ध्यान सूं विचलित नीं हुआ ।

साधना काळ में महावीर नै एकला विचरण करतां देख लोग वां नै चोर, ठग समझ'र मारता-पीटता, घणी तकलीफां दैवता एएा महावीर देह भाव सूं मुक्त अचल, अडोल र्या ।

साधना काळ में महावीर नींद लैणी छोड़ दिवी । आहार खातर वी घर-घर गोचरी जावता । अमीर-गरीब रो उणारै मन में काई भेद-भाव नी हो । मौका पर रूखो-सूखो जिसो सुद्ध निरदोस आहार मिल जावतो वी वी नै निस्पृह भाव सूं ग्रहण कर लेवता । मांदहाज में वी काई ओखद नीं लैवता । इएा भांत वां रो देह रै प्रति मोह भाव नी हो ।

साधना काल् रो पैलो बरस :

कोल्लागसन्निवेस सूं विहार कर महावीर मोराक सन्निवेस पधारिया । बठै दुईज्जतक तार्पासियां रो एक आश्रम हो । उएा आश्रम रा कुळपति राजा सिद्धार्थ रा भायळा हा । महावीर नै आश्रम कांनी आवता देख आश्रम रा कुळपति उणा सूं इएा आश्रम में चौमासौ करण री विनती करी । महावार विनता मजूर कर बठै एक भूंपड़ी में ध्यान साधना में लीन हुआ ।

महावीर रै हिरदै मे जीव मातर रै प्रति दया अर मैत्री री

भावना ही। किणी प्राणी नै किणी भांत रो कष्ट देणो वी नी चावता। उण बरस पाणी कम बरस्यो हो, चारा री कमी ही। जिनावर भूखा मरता अठी-उठी मूंडी मारता रैवता। महावीर जिण भूंपड़ी मे साधना रत हा वा घास फूम री बणियोड़ी ही। भूखी मरती गायं आश्रम री भूंपड़ियां रो चारो खावा लागती। भूंपड़ियां में रैणआळा दूजा तापमी गायं नै भगा-भगा'र भूंपड़ियां री रक्षा करता। महावीर जिण भूंपड़ी में साधनारत हा, वीरी घणकरी घास गायं खायगी पण महावीर निश्चिन्त होय आतमचित्तन में लीन हा।

महावीर री भूंपड़ी रें प्रति इण उदासीनता नै देख तापसी कुळपति सूं वांकी सिकायत करी। कुळपति पण महावीर नै ओळमो देण खातर आया अर कैवण लागा- कुंवर ! इतरी उदासीनता किण कामरी ? पछी पण आपणं घोंसला री रक्षा करे फेर आप तो राजकुंवर हो। कांई भूंपड़ी री रक्षा आप सूं नी हुय सकें ? महावीर कैवण लाग्या—किणरी भूंपड़ी ? किणर, राजमहल ?

पांच प्रतिज्ञा :

महावीर नै अनुभव हुयौ कै इण आश्रम मे साधना सूं बत्तो महत्त्व चीजां रो है। अठे म्हारै रैवण सूं तापसियां रें मन में ईर्ष्या री भावना पैदा हुए। अब म्हनै अठे नी रैवणां चावै। यूं सोच'र महावीर बठा सूं विहार कर दियो। इण समै वा पांच प्रतिज्ञावां कगी—

(१) इसी जगां नी रैवूला जठे म्हारै रैवण सूं लोगां नै किणी भात रो कष्ट, ईर्ष्यादि हुवै।

(२) साधना खातर आच्छो स्थान खोजवा री कोसिस नी करूला अर सदा ध्यान में लीन रेऊला।

- (३) मौन वरत राखूँला ।  
 (४) हाथां में आहार करूँला ।  
 (५) जरूरत री चीजां खातर किणी गिरस्ती नै राजी राखण री कोसिस नी करूँला ।

### यक्ष री बाधा :

वठासूँ महावीर अस्थिग्राम पधारिया । वठै एकान्त मे एक पुराणो टूट्योडो मिन्दर हो । इण मिन्दर में ठहरबारी आज्ञा वां वठारा गिरस्ती लोगां सूँ लीवी । गामवासी महावीर नै कयी—अठै मत ठहरो । ओ तो सूळपाणी यक्ष रो मिन्दर है । अठै भूल सूँ कोई रैय जाव तो वो जिन्दो नी बचै । पण महावीर बठैइ ठहरवा रो निसचै कर लियो । वी मौत सूँ कद डरवाआळा हा । गामआळां लोगां नै महावीर री इण हिम्मत पर घणो इचरज हुयो ।

यक्षरै मिन्दर में जाँर महावीर ध्यानलीन हुयग्या । रात रा अंधारा में घणी डरावणी आवाजां आवण लागी । इण रो महावीर पर काई प्रभाव नी देख यक्ष नै गुस्सौ आयग्यो । वी विकराळ हाथी, नाँर राक्षस, अर नाग जिसा सरूप बणाँर महावीर नै घणी तकलीफां दीवी, पण महावीर सांत भाव सूँ सै परीसह सहन करता र्या । आखर यक्ष हारग्यो । वीं नै आपणी इण हार पर घणी सरम आई । वो मन ही मन सोचवा लाग्यो—ओ पुरुस कोई साधारण मिनख नी होँर बडो मिनख है । वीं प्रभु रै चरणां में पड़ँर माफी मांगी । उण रो हिरदय पळटग्यो । वीं आपणी हिसावृत्ति सदा-सदा खातर छोड़ दी । दिन उगै महावीर नै राजी खुसी ध्यान-मगन देख गांवआळा नै घणो इचरज हुयी ।

### दूजो बरस :

अस्थि ग्राम रो चौमासो पुरो करँर महावीर वाचाला नगरी

कांनी चालिया । वीचें मोराक सन्निवेश पडतो हो, सूनी ठोड देख महावीर थोडा दिन वठेइ ध्यान करण रो विचार कियो । कडकडाती ठंड में महावीर नै उघाडें सरीर कठोर साधना करतां देख आखो गांव वणारें दरसण खातर आयो । महावीर री ध्यान साधना सूं प्रभावित हुयर घणा मिनख वांरा भगत वणग्या ।

महावीर दक्षिण वाचाला सूं जाय र्या हा कै सुवर्ण वाळुका नदी रै किनार री एक भाडी में उणारें कांधा पर पड्यौ देवदुष्य वस्त्र उलभरं अटकियो । ईं घटना रै पछें वां कदेइ वस्त्र धारण नी करिया ।

**चण्डकौसिक नाग नै प्रतिबोध :**

महावीर कनखळ आश्रम सूं उत्तर वाचाला कांनी जायर्या हा । उण रस्ते मे एक भयङ्कर नाग रैवतो हो । वीरो नाम चण्डकौसिक हो । महावीर नै इण रस्ता सूं जावतां देख एक गवाळिये हाको पाडरं कयो—महात्माजी ! इण रस्ते मती जाओ । अठीने भयङ्कर काळो नाग रैवै है । तो दृष्टिविष सरप है । वीकै देखतां पाण मिनख अर जिनावर मर जावै । ओ हरियौ-भरियो वनखंड इणीज सरप री विष दृष्टि सूं उजड़ग्यो है । पण महावीर पर ईं वात रो कांई असर नी पड़ियो । वांनै नी तो जिनगाणी री चावना ही अर नी मौत रो डर । वी तो चण्ड नै प्रतिबोध देणौ चावता हा । इण कारण लोगां रै विरोध करवा पर भी वां आपणी गैल नी बदली । वै उणीज रस्ते गया अर जांर सरप री बांवी माथै ध्यान मगन हुयग्या ।

बांवी माथै उभियौडा मिनख नै देख चण्डकौसिक आगबवूलो हुयग्यो । वी खूब जोरां सूं फुफकार करी अर किरोध में आय महावीर रै चरण नै डस लियो । पण महावीर इण सूं तनिके भी नी

घबराया । वी आपणै ध्यान में बराबर लीनरया । महावीर री आ हिम्मत अर मजबूती देख सांप भी कई दफा वानै 'डसियो पण महावीर तो उणीज भांत अडोल, अकम्प ऊभा रह्या । महावीर री आ असाधारण वीरता देख सरप रो विश्वास डोलग्यो । वीरै डसण री ताकत नष्ट हुयगी ।

सरप नै यूं लाचार देख महावीर सांत भाव सूं कयो—सरप-राज ! जाग, आपणै किरोध नै सांत कर । इण किरोध रै कारण ईज थनै सरप री जूँण मिली है । अबै थूँ आपणै मन में प्रेम अर मित्रता रा भाव ला । जै मन में शुद्धि नी लावैला तो थारी आतमा यूँ ईज अंधारा में भटकती रेवैली ।

महावीर रा इमरत वचन सुण'र चण्डकौसिक रो किरोध सांत व्हैग्यो । वो टकटकी लगा'र महावीर कांनी देखतो रह्यो । अबै वीनै ज्ञान रो प्रकास मिलग्यो हो । वीनै आपणा कियोडा खोटा करम एक-एक कर याद आवण लाग्या । आतमगलानि अर पछतावो करता थकां उणरो हिरदय पळटग्यो । उणारी द्रष्टि रो सगळो जहर इमरत में बदलग्यो । महावीर रै डसियोडै चरणां री ठौड़ सूं खून री जगां दूध री धारा बेवण लागी । महावीर रै समभाव अर वत्सलता सूं सारो वातावरण प्रेममय बणग्यो ।

चण्डकौसिक नाग रो उद्धार कर महावीर उत्तर वाचाला मांय पधारिया । अठै नागसेन रै घरै पन्द्रह दिन रै उपवास रो पारणो कियो । वठासूँ महावीर श्वेताम्बिका नगरी पधारिया । अठै राजा परदेसी आपरा दरसण कर घणा प्रभावित हुया अर पक्का भगत बणग्या ।

नाव किनारे लागी :

महावीर श्वेताम्बिका नगरी सूं सुरभिपुर कांनी विहार

कियो । वीचै गंगा नदी पड़ती ही । महावीर नदी पार करण खातर नाविक री आग्या लेय नाव मे बैठिया । नाव में घणाई मिनख वैठा हा । नदी रो पाट घणो चौड़ी हो । देखतां-देखतां भयंकर आंधी अर तूफान चालवा लागो । नाव डगमगावा लागी । नाव में बैठ्या लोग डरग्या । वै रोवा-चिल्लावा लाग्या परण महावीर तो आपणै ध्यान मे मगन हा । वाने मीत रो डर कोनो हो । आखर उणांगी साधना रै परताप सून आंधी अर तूफान थमग्यो अर नाव किनारै लागी ।

### धर्म चक्रवर्ती :

अमरण महावीर गंगा रै किनारै रा रेतीला मारग सून हो'र स्थूणाक सन्निवेस पवार्या । अठै आ'र आप ध्यान में लीन हुयग्या । इण गाँव में पुण्य नाम रो एक जोतसी हो । वीं रेत मे मडयोडा महावीर रा चरण चिह्न देख्या । वी अपरै ज्ञान सून सोच्यो कै अ' चरण-चिह्न किणी चक्रवर्ती सम्राट रा है । म्हनै लखावै कै कोई सम्राट मृसीवन में पड़ग्यो है । वो अवार उरवाणै पगा ईं रेतीला मैदान सून हुयर गयो है अर एकलोई दीसै । ईं समे म्हूं जाय'र वीकी मदद करूं तो सायद उण री किग्या सून म्हागी गरीवी मिट जावै । आ सोच'र पगां रा निसाण-निसाण वो जोतसी प्रभु रै पास पोच्यो । वठै जाय वी देख्यो कै एक महात्मा ध्यान मुद्रा में लीन ऊभो है । वी ध्यान सून देख्यो तो वी नै अमरण रै सरीर पर चक्रवर्ती रा सं सैनाण नजर आया । वो अचम्भा में पड़ग्यो अर सोचण लाग्यो कै चक्रवर्ती रा सैनाण आळो पुरस भी कदई भिक्षु हो सकै अर दर-दर, जंगळ-जगळ मारो-मारो फिरै ? म्हनै तो लागै कै सास्त्र सब भूठा है, आनै गंगा में फेंक देणा चाइजै । इनरा में एक दिव्य ध्वनि वीकै कानां में पड़ी पडित ! सास्त्रां नै असरघा रै भाव सून मत देख । अमरण महावीर साधारण चक्रवर्ती नी हो'र धरम चक्रवर्ती है । अ' वड़ा-वड़ा सम्राटां रा भी सम्राट है । आखा जगत



रा पूजनीक है ।

दिव्य वाणी सुगर पुष्य रा अन्तर्चक्षु खुल गया । बीरो माथो सरधा अर विनय भाव सूं प्रभु रै चरणां मे भुक्त्वा ।

गोसालक रो प्रसंग :

विहार करतां-करतां चौमासी करण खातर महावीर नाळन्दा नगर पधारिया । वी एक तन्तुवाय साळ (जुलाहै री दुकान या कारखानो) में ठहरिया । अठै मंखलीपुत्र गोसालक नाम रो एक तापमा पैना सू इंज ठहरियोड़ो हो । गोसालक घणो मुँह फट, जीभ रो चटोरो अर ऋगड़ालू सभाव रो हो । वो ईर्ष्यावश भगवान री कयोड़ी बातां नै भूठी पटकणो चावतो हो । एकदा गोसालक भगवान नै पूछयो-हे तपस्वी ! आज म्हनै भिक्षा में काई-काई चीजां मिलेला । महावीर सहज भाव सूं कयो-कौदू रो बासी भात, खाटी छाछ अर खोटो रीपियो ।

महावीर री वाणी नै भूठी साबत करण खातर गोसालक बड़ा-बड़ा सेठां रै घरै भिक्षा सारूँ गयो, परा वीं नै खाली हाथ आवणो पड्यो । आखर में एक लुहार रै घरै वीनै कौदू रो बासी भात, खाटी छाछ अर खोटो रीपियो मिल्यो । प्रभु रा वचन सांचा जाण गोसालक नियतिवाद रो समर्थक बणग्यो अर महावीर रै तप त्याग सूं घणो प्रभावित हुयो ।

महावीर चौमासी पूरो कर नाळन्दा सूं कोल्लाग सन्निवेश पधारिया । गोसालक उरा समै भिक्षा खातर बाहर गयोड़ो हो । भिक्षा लेयनै पाछौ आयो तो तंतुवायसळ में महावीर नै नी देख वो घणो दुखी हुयो अर आपणा कपड़ा, कुंडिका, जिसी चीजां ब्राह्मणां-नै देय'र माथो मुडवाय खुद भगवान री खोज मे निकळ पड्यो ।

जावतां-जावतां कोल्लाग सन्निवेश में ध्यानस्य महावीर रा दरसण करिया । वठे बहुल ब्राह्मण रै दान री महिमा सुणी तो वी को दिल महावीर रै प्रति सरधा सूं भरग्यो । वो सोचण लाग्यो ओ महावीर रै तप अर साधना री फळ है । वी हाथ जोड़ महावीर सूं ददना नमस्कार करी अर कयो—आज सूं आप म्हारा धरम गुरु हो अर म्हें आप री चेलो ।

तीजो वरस :

कोल्लाग सन्निवेश, सुवर्णखळ, वामगुगांव होता हुआ महावीर चपा नगरी पधारिया । अठे चीमासे माय दो-दो मास री कठोर तपस्या करता हुआ महावीर आपणी ध्यान साधना में लीन रैया ।

चौथो वरस :

गांव-गांव विहार करता हुआ महावीर चौराक सन्निवेश पधारिया । उणां दिना उठे चोरां री घणी डर हो । पैरेदार रात-दिन पैरो देवता हा । महावीर नै देव पैरेदारां वांको परिचय पूछ्यो पण महावीर मौन हुवण सूं काई नी बोल्या । इण कारण पैरेदारां नै संका हुई । वी वांनै चोर अर भेदू समझ घणी तकलीफां दीवी । आ वात उत्पल निमित्तज्ञ री वनां सोमा अर जयन्ती नै मालम पड़ी तो वी पैरेदारां कनै गई अर उणानै महावीर री सांचो ओळखारण कराई । महावीर नै ऊंचो महात्मा जाण'र पैरेदारां आपणी गलती पर घणो पछतावो करियो अर महावीर सूं माफी मांगी ।

चौराक सन्निवेश सूं महावीर पृष्ठचंपा पधारिया अर ओ चीमासो अठेई पूरो करियो । ईं काळ मे महावीर चार महिना री लम्बी तपस्या कीवी ।

पांचमो वरस :

पृष्ठचंपा सूं विहार कर श्रमण महावीर कयंगळा होता हुआ

सावत्थी नगरी पधारिया । अठै नगर रै बा'रै कड़कड़ाती सर्दी री परबा क्रियां विगर रात भर ध्यान में लीन रह्या । सावत्थी सूं विहार कर महावीर हेळदुग पधारिया । अठै एक रूख हेठै महावीर ध्यान मग्न हुया । सरदी सूं बचवा खातर मारग चालणिया लोगां वठै आग जलाई अर परभात व्हैता पांण बिगर आग बुभायांई वै आगै रवाना व्हैग्या । हवा रै भोखे सूं सूखा घास फूस बळग्या । आग बळती-बळती महावीर रै कनै आयगी जिसू वांका पग दाभग्या पण फेरू भी महावीर ध्यान सूं डिगिया कोनी ।

करम खपावण खातर महावीर अनार्य देसां मांय पण विचरण करियो । एकदा महावीर लाढ देस कांनी आया । वठै उणानै भांत-भांत रा उपसर्ग (कष्ट) मिल्या । रैवण नै ठीक जग्या नी मिली । खावण नै लूखो-सूखो भोजन भी मुश्किलां सूं मिलियो । अज्ञानी लोग वां पर रेत फेकता, गंडकड़ा पाछै दौड़ाय देवता, हथियारां सूं सरीर पर वार करता पण महावीर सांत भाव सूं सगळा कष्ट सहन करता अर निर्द्वन्द्व भाव सूं आपणै ध्यान में लीन रैवता ।

अनार्य देसां मांय विचरण करता-करता महावीर आर्य देस री भद्विला नगरी मांय पधारिया अर अठै चौमासो क्रियो । इण काळ में महावीर भांत-भांत रा आसना रै सागै ध्यान करता थकां चातुर्मासिक तप री आराधना कीवी ।

छठो बरस :

भद्विला नगरी सूं कदळी समागम, जम्बूसंड, तंबाय सन्निवेस जिमा नगरां में विहार करता थकां प्रभु वैसाली नगर पधारिया अर बठा सूं ग्रामक सन्निवेस । बठै विभेलक यक्ष रै रैवण री ठौड़ महावीर ध्यान मग्न हुया । यक्ष प्रभु रें ध्यान अर तपोमय जीवन सूं घणो प्रभावित हुयो ।

ग्रामक सन्निवेस सूं प्रभु महावीर शालिशीर्ष नगर रै बा' रै

एक वगीचै में आयर ध्यान मगन हुया । माघ महिनो हो । सुनसान जंगल में ठंडी वरफीली हवा चाल री ही । उए समै कटपूतना नामरी देव कन्या रै मन में ध्यान मगन महावीर नै देख पूरव जनम रो बैर जाग्यो । वी महावीर रो ध्यान भंग करण खातर विकराळ रूप धारण करियो । विखरियोड़ी जटावां मे वी वरफ जिसो ठंडो पाणी भरर महावीर रै उघाड़ै सरीर माथै जोरदार वरसात कीवी ।

महावीर इए उपसर्ग सूं तनिक भी विचलित नी हुया । कस्ट अर तकलीफां सूं वारी साधना रो तेज और निखरयो । वारै धीरज अर हिम्मत रै आर्ग कटपूतना रो वैर सांत हूयग्यो । वी प्रभु रै चरणा में सिर नवाय माफी मांगी ।

सातमो वरस :

महावीर ओ चौमासो आलंभिया नगरी में बितायो । अठा सूं वी कडाग अर भद्गा सन्निवेस होता हुआ बहुमाल गांव पधारिया । अठै शालार्थ नाम री देवी महावीर नै घणा उपसर्ग दिया पए वी आपणै ध्यान सूं तनिक भी विचलित नी हुया ।

आठमो वरस :

भद्गा सूं विहार कर महावीर लोहारगला पधारिया । अठै पडौसी राजावां मे आपसी भगड़ा हा । ईं कारण नगर मे प्रवेस करण पर पावंदी ही । विगर ओळखाण करियां किणी नै नगर में प्रवेस नी दियो जावतो ।

महावीर सूं भी उणारो परिचय पूछयो । वानै मौन देख अधिकारियां उणानै राजा जितसन्नु रै सामै हाजर किया । बठै निमित्तज्ञ उत्पल आयोड़ो हो । वी राजा नै महावीर री ओळखाण कराव दी । राजा महावीर रै तप-त्याग सूं घणो प्रभावित हूयो ।

वीं घणै आदर मान सूं महावीर नै नमन करियो । बठा सूं विहार कर प्रभु राजगृह पधारिया । अठै चातुर्मासिक तप कियो ।

नवमो बरस :

राजगृह सूं विहार कर'र महावीर फेरूँ अनार्य देसां में विचरिया । अठारा लोग अज्ञानी अर निरदयी हा । वां महावीर नै घणी यातना दीवी । उगां रै उघाड़ै सरीर पर भाला, लाठी, भाटा आदि सुं वार करिया । महावीर लहलुहान हुयग्या पण समता भाव सूं वां सैं तकलीकां सहन करी । वांनै ठहरण खातर भूंपड़ी तक नी मिली । वी रूखारै हेठै ध्यान मगन रय'र चौमासो पूरो करियो ।

दसमो बरस :

गोसाळक री रक्षा :

अनार्य देसां सूं विहार कर महावीर कूरमगांव पधारिया । गोसाळक पण इण समै वारै सागै हो । अठै गांव रै ब्रारै वैस्यायन नाम रो एक तापस सूरज रै सामै दीठ कर, दोन्युं हाथ ऊपर उठार आतापना लेर्यो हो । उणरै लाम्बी-लाम्बी जटावां ही । सूरज री गरमी सूं तप'र उणारी जटावां सू घणकरी जूवां हेठै गिर री ही । वो उणानें उठार उठार पाछी जटावां मे राखरयो हो । तापस री आ हरकत देख गोसाळक उणरै कनै आयो अर बोल्यो—अरे, तू कोई तापस है या जूवां रो घर ? तापस मौनरयो । पण जद गोसाळक वार-वार आ बात दोहराई तद तापस नै किरोध आयग्यो । वी गोसाळक नै भसम करण खातर आपणौ तपोबळ सूं प्राप्त करयोड़ी तेजोलेश्या (आग बरसावण आळी लब्धि) उण पर फेंकी । गोसाळक इण सूं डर'र भाग्यो अर महावीर रै चरणां मांय छिपग्यो । वीं महावीर सूं अरज करी-प्रभु ! म्हारी रक्षा करो, म्हनै बचाओ । गोसाळक री करुण कातर पुकार सुण महावीर गोसाळक कांनै देखियो । महावीर रै तप-त्याग अर

साधनामय जीवन रै प्रभाव सूं देखतापांण गोसाळक री जळन सांत हुयगी ।

कूरमगांव सूं सिद्धार्थपुर होता हुया महावीर वैसाळी पधारिया अर नगर रै वारै ध्यान मगन हुया । आता-जाता लोग महावीर नै भूत-परेत समझ'र घणी तकलीफां दीवी । महावीर सैं तकलीफां सांत भाव सूं सहन करी । संयोग सूं राजा सिद्धार्थ रा दा मित्र संख अर भूपति उण रास्ता सूं निकळिया । वां महावीर नै ओळख लिया । वां उपसर्ग देवणियां लोगां नै समझा'र बठा सूं अळगा किया अर प्रभु रै चरणां में वन्दना करी ।

खेवट रो किरोध :

वैसाळी सूं महावीर वाणिजगाम कानी आया । रास्ते में गंडकी नदी पड़ती ही । नदी पार करण खातर प्रभु नाव में बैटिया । जद नाव किनार लागी, खेवट महावीर सूं किरायो मांग्यो, पण महावीर काई देवता ? महावीर नै मीन देख खेवट नै घणो किरोध आयो । वी प्रभु नै खरीखोटी सुणाई अर तपती वाळू पर लै जाय वांनै ऊभा कर दिया । प्रभु महावीर वठै जाय ध्यानलीन हुयग्या । अचाणचक उठी नै राजा संख रो भारोज वित्र आयो । वो महावीर नै जाणतो हो । वीं खेवट नै पण महावीर री ओळखाण कराई । वाणिजगाम सूं सावत्थी पधार'र प्रभु चौमासो पूरो करियो ।

ग्यारमो बरस :

महावीर सावत्थी सूं विहार करता-करता सानुलट्ठिय सन्नि-वेस पधारिया । अठै तपस्या कर'र ध्यान साधना मे लीन हुया । एक दा पारणै रै दिन भिक्षा खातर महावीर आनन्द गाथापति रै घरै गया । उण समै दासी वहुला बच्चोड़ो वासी अन्न फेकण खातर वारै आई । वारै साधु नै ऊभो देख वीं पूछियो- महाराज ! थानै

किण चीज री चावना है? महावीर दासी रै सामें हाथ फैलाय दिया। दासी घणी भगति अर सरधा भाव सूं प्रभु नै बासी भोजन बैराय दियो। महावीर उणसूं पारणो कियो।

संगम रो उपसर्ग :

सानुलट्ठय सन्निवेस सूं महावीर द्विद्वभूमि पधारिया। अठै पैढाळ बाग रै पोलास नाम रै चैत्य में घ्यानलीन हुया। साधना काळरै इण दस बरसां में महावीर नै घणाई दुख देवणिया अर सरधा राखणिया लोग मिलिया। हरेक रै सागै वणां रै मन में मैत्री भाव हो। वी नतहमेस सगळा री भलाई चावता। महावीर रै इण समभावी आचरण सू इन्द्र घणो प्रभावित हुयो। आपणी देवसभा में वीं प्रभु रै इण तपत्याग री घणी बड़ाई करी।

महावीर री बड़ाई सुण सगळा देव राजी हुया परा संगम नाम रो एक ईर्ष्यालु देव महावीर री बड़ाई सहन कोनी कर सक्यो। वो किरोध में आय केवा लाग्यो-हाड़-मांस रो पुतलो कदै इतरा गुणा आळो नी हुय सकै। हूँ अबार जा'र वींनै आपणें साधना रै गैला सूं डिगाय देऊँला। आ केय'र संगम जठै महावीर घ्यान में लीन ऊभा हा, बठै आयो। आ'र महावीर नै उपसर्ग देवणा सरु कर दिया। वी कुदरत रै सुहावणे सांत वातावरण नै डरावणो बगाय दियो। धूड भरी आधियां चालण लागी। चारू' कांनी डरावणी आवाजां आवण लागी। प्रभु रो सररीर माटी सूं भरग्यो। हिसक जिनावर वानै काटबा अर नोचबा लाग्या परा महावीर आपणी साधना सूं कोनी डिगिया।

संगम महावीर री फेरू' परीक्षा लेणो चावतो हो। वीं आकस सूं रूपाळी अपसरावां उतारी, वां रो संगीत अर नाच करायो, भांत भांत रै फूलां री खूसब स' वातावरण नै सुगंधित

जिनावरां री हत्या हुवं, एडौ व्याव म्हुं नी करूँला । यूं कैयर नेमिकुमार आपरो रथ तोरण सूं पाछो मुड्वा लियो ।

अवं तो नेमिकुंवर मुनि घरम अंगीकर करण रो निश्चम कर लियो । आपणां कीमती गंगा-गाभा उतार सारथि नै दे दिया अर खुद संयम मारग पर चालवा खातर पग वढा दिया । सब जणा वांसू व्याव करण खातर घणी विनती करी, पण घरमवीर नेमिनाथ किणीरी बात कोनी मुणो । दीक्षा अंगीकार कर प्रभु गिरनार परवत री ऊंची चोटी पर जाय कठोर तपस्या करी ।

महाराज उग्रसेन री पुत्री राजुळ नै जद आ मालूम पडी कै जिनावरां रो करण क्रन्दन सुण अहिंसा रा पुजारी प्रभु नेमिनाथ तोरण पर आया थका पाछा मुड्ग्या, तो वा मन में संकल्प कर्यो कै म्हुं अवं किणी दूजा पुरुष रै सागै व्याव नी करूँला । राजकुंवर नेमि इज म्हारा पति है । वी राजसी सुखां नै छोड़ मुनि घरम अंगीकार करर्या है तो म्हुं भी वणारै मारग रो इज अनुसरण करूँला । पछे राजुळ पण दीक्षा लेय नै गिरनार परवत पर घोर तपस्या करी ।

केवलज्ञान पाम्या पछे प्रभु जगां-जगा विचरण कर अहिंसा घरम रो उपदेश दियो अर गिरनार परवत सूं निर्वाण पायो ।

यादवकुमार अरिष्टनेमि विशिष्ट व्यक्तित्व रा धणी हा । महाभारत, स्कन्दपुराण, श्रीमद्भागवत जिसा पुराणा ग्रंथा सै इणारो उल्लेख मिलै । महाभारत रै 'शान्तिपर्व' में प्रभु रा दियोडा उपदेशां रो वर्णन आवै । अरिष्टनेमि प्रभु राजा सगर नै उपदेश देतां कयी कै संसार में मुगति रो सुख इज सांचो सुख है । जो मिनख धन दौलत अर विषय सुखां में रम्यौ रैवै वो अज्ञानी है, जो मिनख आसक्ति सूं अळगो है बोइज इण संसाथ सै सुखी है । इरेख



प्राणी अकेलो जनम लेवै, बड़ो हुवै अर संसार में सुख-दुख भोग'र मौत री सरण लेवै । सांसारिक सुख-दुख पूरब जनम में कर्योड़ा करमा रा फळ है ।

तीर्थकर नेमिनाथ रो जनम हुयो जद याज्ञिक अर वैदिक संस्कृति रो प्रभाव बत्तो हो । बीके सामै श्रमण संस्कृति फीकी पड़गी ही । चारु'कानी हिंसा रो बोलबालो हो । बी समै लोगां नै अहिंसा धर्म रो उपदेश देय नै प्रभु श्रमण संस्कृति रो पाछो उत्थान करियो ।

कह्यो जावै कै छप्पन दिनां री कठोर तपस्या रै उपरांत गिरनार पर्वत पर आसोज वदी एकम रै दिन प्रभु नै केवल ज्ञान हुयो । जैनागयां रै मुताबिक तीर्थकर अरिष्टनेमि श्रीकृष्ण रा आध्यात्मिक गुरु हा । 'ज्ञाता धर्म कथा' मे भगवान अरिष्टनेमि अर श्रीकृष्ण री आपसी चर्चा रा घण्टाई वर्णन मिलै । श्रीकृष्ण अरिष्टनेमि सून घण्टाई प्रश्न पूछया अर वां सवां रो आछो समाधान पायो । कह्यो जावै है कै कृष्णजीरी आठूं राणियां पुत्र अर परिवार रा घण्टाई लोग भगवान अरिष्टनेमि सून दीक्षा अंगीकार करी ही । 'यजुर्वेद' में स्पष्ट रूप सून अरिष्टनेमि रो वर्णन मिलै । सौराष्ट्र अर गुजरात में नेमिनाथ री शिक्षावां रो घण्टो प्रचार र्यो । आज पण गिरनार, सत्रुंजय अर पालीताणा जैनियां रा सिद्ध क्षेत्र मानिया जावै ।

### २३. पार्श्वनाथ :

तेइसवां तीर्थकर पार्श्वनाथ भगवान हुया । आपरो जनम वाराणसी में हुयो । आपरै पिता रो नाम राजा अश्वसेन अर माता रो वामादेवी हो आपरो गोत्र कश्यप हो अर लांछण सरप है । इतिहासकारां रै अनुसार भगवान पार्श्व ऐतिहासिक महापुरुष है । इणां रो जनम षोष वद दसम रै दिन ईसा पूर्ण ८७७ मे हुयो । कठोर तपस्या कर'र अ सम्भेदशिखर सून निर्वाण प्राप्त करियो ।

भगवान् पार्श्वं रो व्यक्तित्व घणो अनोखो हो । आप टावर-पणां सूं ईं हृद प्रतिज्ञ, स्वाभिमानो, शांत, दयालु, चिन्तनशील अर मेधावी हा । एकदा पंचाग्नि तप करता हुआ कमठ नामरै वड़े तपस्वी रै चारुंकानी वळती घूणीरी लाकड़ियां सूं आप नाग-नागणी री रक्षा करी । इण घटना सूं आपरै दिल में संसार सूं विरक्ति हुयगी अर आप आतमकल्याण खातर संन्यास ले लियो ।

धर्म साधना करवा मे भगवान् पार्श्वं चारित्रिक नैतिकता पर घणो वळ दियो । आप पंचाग्नि जिसा तपां में हुवण आळी जीव हत्या कांनी लोगां रो ध्यान खिच्यो अर कयो कं धर्म रो मूळ दया है । आग जलाणसूं तो सै भांत रा जीवां रो नास हुवै । जिण तप में जीवां रो नास हुवै वीं में धर्म कोनी । बिना पाणी री नदी री भांत दया शून्य घरम भी बेकार है । जिण भांत तीर्थकर नेमिनाथ पशु-हत्या रो वहिष्कार करियो उणीज भांत भगवान् पार्श्वं धर्म रै नाम पर हुवण आळी जीव हिंसा रै विरुद्ध आवाज उठाई ।

प्रभु पार्श्वं आपणै युग मे फैल्योड़ी कुरीतियां नै देख अहिंसा, सत्य, अस्तेय अर अपरिग्रह या चार व्रता रो उपदेश दियो, जो चातुर्ग्राम धर्म रै नाम सूं प्रसिद्ध है । प्रभु रै आध्यात्मिक अर नैतिक विचारां नू प्रभावित होयर वैदिक परम्परा रो एक प्रभावगाली दळ याज्ञिक हिंसा रो विरोधी बणायो हो । इण भांत दो विरोधी विचारधारा रो संगम इण काळ में हुयो । आचार अर विचार में जितरा वत्ता परिवर्तन इण काळ में हुया, उत्तरा किणीं युग में नीं हुया । इणीज कारण जैन तीर्थकरां में पार्श्वनाथ सबसू घणा लोकप्रिय है । भारतवर्ष रै जुदा-जुदा भागां में जितरा, मिंदर, मूर्तियां, तीर्थस्थान इणां रै नाम रा मिलै उत्तरा दूजा तीर्थकरां रा नीं मिलै । गजपुर रै नरेश स्वयंभू, कुशस्थपुर रै राजा रविकीर्ति, तेरापुर रै स्वामी करकंडू जिसा केई बड़ा-बड़ा राजा अणांरा

वरम भगत अर अनुयायी हा । उत्तरप्रदेश, बिहार, बंगाल, उड़ीसा, आंध्रप्रदेश ताईं पार्श्वनाथ रो घणो प्रभाव हो ।

पार्श्वनाथ अर महावीर रै समै में लगभग ढाई सौ बरसा रो आंतरो है । इग बीच पार्श्व रा उपदेश अर वांकी श्रमण परम्परा अविच्छिन्न रूप सूं चालती रैयी । महावीर रो मातृकुल अर पितृकुल पार्श्व परम्परा रोइज अनुयायी हो । केवलज्ञान प्राप्त करिया पाछै महावीर जद उपदेश देवण लाग्या, तद पार्श्वनाथ परम्परा रा मुनि केशि श्रमण मीजूद हा ।

#### २४. महावीर :

चौबीसवां तीर्थंकर भगवान महावीर हुया । इणां रो लांछण सिंह है । महावीर तीर्थंकर परम्परा रा आखरी तीर्थंकर है । वीर, अतिवीर सन्मति, वर्धमान आदि अनेक नामां सूं आप याद करिया जावै । भगवान महावीर रो जनम आज सूं २५७३ बरसां पैली इगीज भारत भूमि पै हुयो । आगे रा अध्यायां में महावीर रै जीवण अर शिक्षवां री ओळिखारण है ।

जिण नमै भगवान महावीर रो जनम हुयो उण समै देस अर नमाज री हालन वणो खगत्र ही । धरम रै नाम पर चारुंकानी टोंग अर पान्चउ रो बोलवानो हो । यज में धी, सैत जिसी चीजां नै छाड'र जीवना मिनव अर जिनावरां री बलि दी जावती । अमण नंस्कृतन नै मानया आळा लोग जीव हिंसा रो विरोध करता तो लोग कैवता कै भगवान जिनावरां नै यज में बलि देवण खातर इज ब्रगाया है, यज मे जिनावरां री बलि देवण सूं पाप कोनी लागै, या हिंसा कोनी ।

उण समै मत्र-तंत्रा मे लोगा रो घणो विसवास हो । वी आतमशुद्धि मे धरम नी मान'र सिनान आदि वाहरी सरीर री गफाई नै इज घणो महत्त्व देता अर कैवता कै सरीर नै कष्ट देणै सूं इज मुर्गात मिनै । कई तपस्वी पंचाग्नि तप करता हा । वी आपणै आमण रै चारुंकानी आग जळा'र ऊपरसूं सूरज री तेज गरमी महण करता । घणखरा तपस्वी नुकीली मुइयां पर सूवता अर वीसूं होण आळी शारीरिक पीडा नै मुर्गाति रो साधन मानता ।

चारुंकानी ब्राह्मण लोगा रो वर्चस्व हो । लोग वानै भगवान दाईं उत्तम समझता हा, भलेड वे कित्ताड दुराचार अर पाप करता । भगवान पार्श्वनाथ तप, संयम अर अहिंसा री जा पवित्र धारा बहाई वा २५० बरसां पछै सूखण लागी । भगवान महावीर जद गावना रै क्षेत्र में पधारिया तद समाज में एक नी अनेक विषमतावां फंयोदी ही ।

समाज मे धरम सूं बत्तो धन रो महत्त्व हो । धनवान गरीबां नै जिनावरां जियां खरीद'र उणांनै आपणा दास बसाय लैवता ।

मालिकां नै दास बरगायोड़ा लोगां नै कड़ी सजा देवण रो पूरो अधिकार हो । अमीर लोग खुद नै बड़ा ऊंचा आदमी समझेर गरीब मिनखां पर घणा अत्याचार करता हा । जात पांत रो भावना रो बोलवालो हो । मिनख री पूजा गुणां सूं नी हो'र जाति, धन, अर दण्डशक्ति सूं हुवती ।

सेवा करणिया सूद्र लोगां रै प्रति ऊंचा तबका रै लोगां रो रवैयो घणो खराब हो । बां नै पढ़ण-लिखण रो अधिकार नी हो अर नी धरम रा बोल सुणबा रो । सूद्र लोग जद कदैइ धरम (वेद) रा बोल सुण लैवता तो वणां रै कानां में ऊनौ-ऊनौ सीसो भरबा रो रिवाज हो अर जद कोई धरम रा बोल बोल लैवता तो वांरी जबान काट ली जावती । ऊंचा तबका रा लोग नीचा लोगां नै कैवता कै थां खोटा करम करनै आया हो जिं खातर थां नै ओ फळ भुगतणो पड़र्यौ है । बिचारा सूद्र लोग विवस भाव सूं सें तकलीफां सहन करता ।

स्त्री जाति री वीं वगत घणी बुरी हालत ही । बां नै धार्मिक पोथियां पढबा रो अधिकार नी हो । नारी सब भांत उपेक्षित अर अधिकारहीन ही । बी रो मोल गाजर मूळी सूं बत्तो नी हो । गायां भैसा दाईं लुगायां चौराया पर ऊभी कर'र बेची जावती । नारी घर री लिछमी नीं होय'र एक मात्र दासी ही ।

उगा वगत री राजनीतिक हालत परा घणी बोदी ही । सबळ राजा कमजोर राजा सूं जुद्ध करता अर उगांरी सुन्दर स्त्रियां नै गुलाम बणा'र उगारो उपभोग अर शोषण करता । कासी, कौसल, वैसाली, कपिलवस्तु आदि राज्यां में गणतन्त्र शासन व्यवस्था ही परा वा राज-काज रै काम ताईं सीमित ही । साधारण जनता नै कोई लोकतन्त्रीय अधिकार नी मिल्यौड़ा हा । अंग, मगध, सिन्धु-सौवीर, अवंती आदि देसां में राजतन्त्र शासन पढाति ही । अठा रा

लोग धार्मिक रूढ़ियां अर सामाजिक गुलामी री भावना सूं दुखी हा । छोटी-छोटी वातां नै लै'र गणराज्यां में आपसरो लड़ाइयां हुवती । राजा-महाराजा री दाईं सेठसाहूकार लोग पण दास-दासियां री लम्बो-चौड़ो परिवार राखता हा ।

ऊपर लिख्योड़ी धार्मिक रूढ़ियां, अन्धविश्वास अर सामाजिक विसमता सूं मिनख घणा ऊबग्या हा । इण विषम परिस्थितिया में जनसलै'र भगवान सहावीर भूल्या-भटक्या दुखी मिनखां नै सही रास्तो दिखायो ।

-----

भगवान महावीर रो जनम वैसाली गणतंत्र रै क्षत्रिय कुण-  
गांव में हुयो । आपरै पितारो नाम राजा सिद्धार्थ अर माता रो  
नाम महाराणी त्रिसलादेवी हो । आप इक्ष्वाकुवंसीय काश्यप गोत्रीय  
क्षत्रिय हा । आपरा माइत अर मामा (चेटक) भगवान पार्श्वनाथ  
रै घरमसासन रो परम्परा नै मानवाआळा हा ।

### सुभ सुपना

जद भगवान महावीर माता त्रिसला रै गरभवास में आया  
तो त्रिसला चवदह दिव्य अर उत्तम सुपना देखिया । सुपना देख  
राणी नै घणो खुसी हुई । वीं रो हं-हं हरख अर उमाव सूं  
भरयो । उणीज वगत वा उठर राजा सिद्धार्थ कनै गई । वानै  
खुसी-खुसी आपणै सुपना रो बात सुणार्ई । राजा सिद्धार्थ राणी  
रा सुपना सुण राजी हुया । दिन उगताई राजजोतसी नै बुलार  
सिद्धार्थ राणी रै देख्योळा सुपनां रो फळ पूछियो । राजजोतसी  
बतायो कं इणां सुभ सपनां सूं मालम व्हे कं राणी त्रिसलादेवी  
भागसाली पुत्र रो माता वग्गणआळी है । इणारं जो पुत्र हुवैला

१. चवदह सुपना रा नाम इण भांत है—

(१) हाथी (२) बळद (३) नार (सिंह) (४) लिच्छसी (५) फूलांरी  
मंळा (६) चन्द्रमा (७) सूरज (८) व्वजा (९) कळस (१०) पदम-  
सरोवर (११) क्षीर सागर (१२) विमान (१३) रतना रो ढेर (१४)  
निरघूम आग ।

दिगम्बर परम्परा सोलै सुपना मानै ।

वो या तो तीर्थंकर ब्रह्मला या चक्रवर्ती सम्राट । ओ बाळक आपण कुळ, वंस अर राज में सैं भांत री सुख समृद्धि में बढोतरी करसी ।

सुपना रो फळ सुण राजा-राणी समेत सगळो राज-परिवार हरखियो । महावीर गरभ में आया जद सूं ई राजा सिद्धार्थ रै खजाने मे बढोतरी हुवण लागी । चारुंकांनी सूं खुमी अर उन्नति रा आछा समाचार आवण लाग्या । त्रिसला अर सिद्धार्थ सोचियो कै ओ सब पुण्य परताप गरभ में आयोई बालक रो इज है । जद बाळक जनमेला, आपां वीरो नाम वर्धमान राखांला ।

माता रै प्रति भगति :

महावीर जद माता त्रिसला रै गरभवास में हा, वारै मन में विचार आयो कै म्हारै हलण चलण सूं माता नै कित्तौ कष्ट हुवै । जै म्है आ हलण-चलण री किरिया वन्द करदूं तो माता नै घरणो आराम मिलैला । आ सोच'र महावीर गरभ में आपणो हिलणो-हुलणो बंद कर दियो । बाळक रो हालणो-चालणो बंद हुवतो देख माता त्रिसला घरणी घवरायगी । वां नै लाग्यौ के गरभ रो बाळक वा तो मांदो है या कोई बेजां हरकत होयगी है । वा दुखी हुय'र भांत-भांत सूं विलाप करण लागी । राजा सिद्धार्थ राणी री व्यथा समझ्यो । राजा-राणी रै ईं दुख सूं सगळो राज परिवार उदास-हुय'र चिन्ता में डूवग्यो ।

महावीर आ हालत जाण'र आपणौ हलण-चलण री किरिया पाछी सरु कर दी, तद जा'र राणी रै जीव में जीव आयो । महावीर मन माय सोच्यो—म्हारै कुछेक क्षणां रै वियोग सू मा नै कित्तौ दुख हुयो । जद म्है संसार छोड'र दीक्षा लू गा तद मा रो काई हाल हुवैलो, वां नै कित्तौ पीडा हुवैली ? यूं सोचता-सोचता मां रै प्रति स्नेह भाव सूं भीग्योडा महावीर गरभवास में इज आ प्रतिज्ञा करली कै जठा ताई मां-बाप जीवता रेवैला म्है वणां री सेवा करूंला, उणारै आख्यां-सामै घरवार छोड'र संजम नी लेऊंला ।



## जनम :

ईसा सून ५९६ बरसां पैली चैत सुद तेरस रै दिन राणी त्रिसला एक रुपाळी गुणवान पुत्र नै जनम दियो । पुत्र जनम रा समीचार सुण राजा अर प्रजा से घणा हरखिया । इण खुसी में राजा सिद्धार्थ जेळखाना रा सगळा कैदियां नै सजा में छूट दी । गरीबां नै खूब दान-दक्षिणा दीवी । नगर रा मकान, गलियां, चौराया, भांत-भांत सून सजायाग्या । भांत भंतीला खेल तमासा अर नाच-गाणा हुया । जनम रो मोछब घणै हरख अर उमाव सून मनायो गयो ।

## चामकरणा :

भगवान महावीर रै जनम रै बारह दिन पछै राजा सिद्धार्थ एक बहोत बड़ो जीमण करियो । ईं मांय आपणै सगळा रिसतेदारां, मित्रां अर जाति भाइयां नै बुलाया । घणै आदर मान सून सगळा नै भोजन जिमायो अर पछै एक बड़ी सभा बुलाई । सभा मांय सिद्धार्थ बोलिया—जद सून ओ बाळक त्रिसलादेवी रै गरभ में आयो वद सून धन, धान अर राजक्रीष में घणी बढोतरी हुई । ईं खातर ईंण भागसाळी पुत्र रो नाम वर्धमान राखणो चाइजै । आयोड़ा सँ पावणापाई नै 'यथा नाम तथा गुण' होवण सून ओ नाम घणो दाय आयो ।

## परिवार :

वर्धमान आपणै माइतां री तीजी संतान हा । इणारै नंदिवर्द्धन नाम रो बड़ो भाई अर सुदर्शना नाम री एक बैन ही । वर्द्धमान रा मामा चेटक बैसाली गणाराज्य रा अध्यक्ष हा । इणारै दस पुत्र अर सात पुत्रियां ही । सबसून बड़ा पुत्र सिंहभद्र हा । बी वज्जीगण रा प्रधान सेनापति हा । इण भांत वर्धमान रो

पारिवारिक गिश्तो अंग, मगध, अवंती सूँ लै'र सिन्धु-सौवीर देश  
रा घणा राजपरिवारां सूँ जुड़ियोड़ो हो ।

वर्धमान सूँ महावीर :

वाळक वर्धमान रो पाळण-पोषण घणा ठाटवाट सूँ हुयौ ।  
अणां रै चारुंकांनी सुख-सुविधा अर आमोद-प्रमोद रा घणा साधन  
हा । महाराणी त्रिसला खुद आपणै हाथां सूँ इणांरो लालण-  
पाळण करती ही । वर्धमान रो सरीर गठ्योड़ो अर कान्ति सूँ  
दमकतो हो । इणा रै मुखमण्डळ पर घणो तेज हो । ज्यूं-ज्यूं  
वाळक वर्धमान उमर में वधवा लागा त्यूं-त्यूं धीरता, वीरता अर  
ज्ञान री गरिमा पण वधवा लागी । आपणै बुद्धिवळ, विनय अर  
विवेक सूँ आप लोगां रा दिल जीत लिया । आप कदैई किणी रा  
दिल कोनी दुखावता अर सदा सांत भांत सूँ रैवता ।

वर्धमान जनम सूँई अनन्त वळ रा घणी हा । एकदा शकेन्द्र  
आपणी देवसभा में वर्धमान री चरचा करतां कह्यौ कै-राजकुंवर  
वर्धमान वाळक हुवता थकां भी घणो पराक्रमी अर साहसी है । कोई  
मिनख, देवता अर राक्षस वीनै नी तो हरा सकै अर नी डरा सकै ।  
आठ वरसां रै छोटे से वाळक रं वळ अर पराक्रम री इतरी वडाई  
सुरा'र एक देवता नै रोस आयग्यो । वो वर्धमान री परीक्षा लेण  
खातर त्यार हुयौ । वो सांप रो रूप बणा'र जठे वर्धमान आपणै  
गोठीड़ा सागै रूख पर चढण-उतरण रो खेल खेलरिया हा, बठे  
पोंच्यो अर उणीज रूख सूँ लिपटग्यो । वर्धमान रा सगळा साथी सरप  
नै देख'र डरग्या । वे अठी-उठी भागवा लागा । सांप फण ऊंचा'र  
फूंकडा मारवा लाग्यो । वी आपणै गोठीड़ा नै कैवण लाग्या—  
डरपो मती, सान्त रैवो । म्हूँ अबार ई नै पकड़'र छैटी छोड़ दूला ।  
वी सरप नै पकड़बा खातर वीकै नैडे गया । सरप जोर सूँ भपटो  
मारियो पण बहादुर वर्धमान वीनै रस्सी दाईं पकड़'र छैटी कांकड़

में छोड़ आया। वर्धमान री बहादुरी नै देख सगळा साथी बणा राजी हुया।

जद वर्धमान देव रै सरप रूप सूं नीं डर्या तो देवता फेरुं परीक्षा लेवण री सोची। वो बाळक रो सरूप बणाय नै वर्धमान री टोळी में आय मिल्यो। हार-जीत रै ईं खेल में हार्योडो बाळक जीत्योडे बाळक नै आपरै कांवा पर बैठा'र तै करयोडी ठौड़ ताईं लैजावतो। देव बाळक टाबरां सागै खेलण लागो। खेल में वो हारग्यो। नियेम मुताबिक वीरी वर्धमान नै कांधा पर बैठावण री बारी आयी। देव बाळक वर्धमान नै आपणै कांधा पर बैठा'र चालवा लाग्यो। चालतां-चालतां देव ताड़ जितरो ऊ चो-व्हैग्यो और विकराळ रूप धारण कर'र वर्धमान नै डराबा-धमकावा लाग्यो। देव रो डरावणो सरूप देख'र सैं साथीड़ा डरग्या। पण आतमबळरा घणी वर्धमान तो नाममातरइ कोनी डर्या। वणां छद्मवेषधारी देव री पीठ माथै एक मुक्की मारी। मुक्की मारताईं वो हेठै बैठग्यो। देव असल रूप में प्रगट हो'र राजकुंवर वर्धमान रै साहस अर बळ री घणी बढ़ाई करी। आठ बरसां री उमर में अद्भुत वीरता रै कारण इज वर्धमान महावीर नाम सूं प्रसिद्ध हुया।

चटसाल कांनी :

वर्धमान जनम सूं ईं मति, श्रुति अर अवधिज्ञान रा घणी हा। एक दिन सुभ घड़ी देख माइतं वां नै पढ़वा खातर चटसाल मोकलिया। वर्धमान माइतां रो कणो मानणौ अर गुरु रो आदर करणो आपणो फरज समझता हा। वां कदै भी आपणै ज्ञान रो दिखावो नी करियो। चटसाल में गरुजी रे सामै वर्धमान विनीत चेला रो दाईं बैठ्या। पैलडे दिन गरुजी वां नै वरणमाळारो पैलो पाठ पढ़ायो। कुमार रै जनमजात ज्ञानी हुवण री बात नीं माइत जाणता हा अर नी गरुजी।

महावीर नै चटसाळ जावता देख इन्द्र तिलकधारी पंडित रो रूप वणा'र चटसाळ कांनी आयो । पंडित रै सरीर सूं ब्रह्म तेज टपक र्यो हो । इसो लखावतो कै ओ तो कोई मोटो ऋषि है । ऋषि आय'र वर्धमान रै पगां पड़िया । वांसू सास्त्र अर व्याकरण रा घणखरा टेढा-मेढा सवाल पूछिया । वर्धमान तुरत-फुरत सगळा जवाव आच्छी तरैळ दे दिया । वर्धमान रो ओ ज्ञान देख इन्द्र गरुजी नै कर्हा- ओ वालक घणो बुद्धिमान अर अवधिज्ञान रो धारक है । ईं नै साधारण ज्ञान देवण रो जरुरत कोनी । आ सुण गरुजी समेत पूरी चटसाळ रा वालक वर्धमान रै चरणां में भुक्त्या । राजा सिद्धार्थ जद आ वात सुणी तो वी पण नेह सूं गळगळा व्हैग्या ।



## ६ | विवाह अर वैराग

वर्धमान बाळपणा सून ईं गंभीर प्रकृति रा हा । वां नै संसार रा राग-रंग चोखा नी लागता । वी आपणी च्यारुंभेर री राज-नीतिक, सामाजिक, धार्मिक समस्यावां रै चिन्तन में लीन रैवता । वी चिन्तन में इत्ता गहरा डूब जावता कै वां नै नी भूख लागती, नी तिस ।

पिता सिद्धार्थ अर माता त्रिसला वर्धमान रै इण गंभीर अर सांत सुभाव नै पळटणौ चावता हा । ईं खातर वणा वर्धमान-रो व्याव करण री सोची । पण वर्धमान व्याव करणो नीं चावता । वी तो संयम रै मारग पर वढणौ चावता हा । ईं कारण व्याव-रै प्रस्ताव नै वी वार-वार नामंजूर करता र्या । वर्धमान री विरक्ति देख एक दिन माता त्रिसला घणी दुखी हुई । मां नै दुखी देख वर्धमान व्याव रो प्रस्ताव मंजूर कर लियो । समरवीर महात्तमन्त री बेटी जसोदा रै सांगे वर्धमान रो व्याव हुयो ।<sup>१</sup> उणारै एक कन्या पण हुई जिरो नाम प्रियदर्शना हो । इणरो व्याव जमालि सांगे हुयो । सांसारिक मोह-माया में महावीर नीं उलझ्या । वी ईं जीवन नै काम, क्रोध अर विषय-वासना रै कीचड़ में कनळ री दाई सुद्ध अर पवित्र राखणो चावता हा ।

भोग नीं योग :

महावीर रै चारुंकांनी घणखरी भोग-सामग्री दिखरी पड़ी हो । माइतां री ममता, भाई नन्दिवर्धन रो हेत, अर पत्नी जसोदा

१-दिगम्बर परम्परा मुजब महावीर व्याव नीं करियो ।

रो प्रेम नितहमेस वणा पर वरसतो हो, पण फेर भी महावीर रो मन उणां मे रम्यो कोनी । वणां री आतमा वाहरी भौतिक सुखां में मुख रो अनुभव नी करती । वा तो जीवन रै सांचा सुखां री खोज में लाग्योड़ी ही । उण समै मिनख आपण सुत्रारथ खातर बीजा प्राणियां नै तकलीफ देवता हा, धरम रै नाम पर घणखरा अंधविसवास समाज मे फैल्योड़ा हा । चारूकांनी दुखी मानखा रो हाहाकार हो । महावीर रो हिरदय आ दसा देख पसीजग्यो । वां ओ निश्चय करियो कै म्हनै इण मायावी संसार सूं ऊपर उठणो है, दुखी मिनखां रो दुख मिटावणो है । ईं दुख नै मेटण सारुं आतमवळ री जरूरत है अर ओ आतमवळ त्याग रै मारग नै अपणया विगर कोनी मिल सकै ।

### माता-पिता रो बियोग :

जद महावीर अट्टाइस वरस रा हा, वां रा माता-पिता देवलोक हुया । वर्धमान नै आपणां मां-वाप सूं घणो हेत हो । फेर भी वणां रोवणो-कळपणो नी करियो । बी आच्छी तरेऊं जाणता हा कै ओ सरीर नासवान है । उणरो मरणो-मिटणो वांकै वासतै कोई इचरज नी हो ।

माता-पिता रै देवलोक हुयां पछै महावीर री गरभवास में करियोड़ी प्रतिज्ञा पूरी व्हैग्यी ही । अवै वणा रै मन में दीक्षा लेवण री भावना जागी । वां आपणै बड़े भाई नंदिवर्धन रै सामै आपणै मन री बात राखी । छोटे भाई रै संजम लेण री बात सुण एक'र तो नंदिवर्धन रो काळजो काप ग्यो । बी गळगळा हो'र वोल्या-माइता रै विजोग दुख नै हाल आपा भूल्या कोनी अर अवै थां भी संजम लेय नै म्हनै एकलो छोड़णो चावै । ओ समै थारै योग कांनी बढ़ण रो कोनी, थोड़ा औरुं ठैरो ।

भाई री बात मान'र महावीर दो वरस ताई श्रीरुं घर मे रवण रो तै करियो । इण दो वरसां में महावीर भोग-विळास सू अळगा रैय'र आत्मचिन्तन करियो ।

दाता रै रूप में :

संजम लैण रै एक वरस पैलां सूं महावीर जरूरतमंद लोगां में आपणी संपत्ति वांटणी सरु करी । वी नितहमेस एक करोड़ आठ लाख सोना रा सिक्का दान में देवता । वी नी चावता कै धन कियी एक ठीड़ एकठो हुवतो रेवै । धन समाज री सम्पत्ति है । उणरो उपयोग समाज खातर हुवण में इज उण री सार्थकता है ।

संजम रै पथ पर :

दो वरस पूरा हुयां पछे वर्धमान भाई नंदिवर्धन अर चाचा सुपाशर्व रै साम्है दीक्षा अंगीकार करण रो प्रस्ताव राखियो । दोन्यू राजी-राजी वर्धमान नै प्रव्रज्या अंगीकार करण री आज्ञा दीवी । वर्धमान रै दीक्षा लेवण रा समीचार विजळी री दाई सगळा कानै फैलग्या । दीक्षा मोछव री घणी तयारिया हुई ।

मिगसर वद दसम रै दिन राजकुंवर वर्धमान मेहलां सूं चन्द्रप्रभा नाम री पाळकी में विराज'र ज्ञानखण्ड वाग में गया । वा रै पाछे-पाछे हजारां-लाखां लोग-लुगाई मगळ गीत गावता चाल्या । इण मोछव नै देखवा खातर देवता भी धरती पर आया । सुपाशर्व अर नंदिवर्धन भी सागै हा । वडेरा वर्धमान नै आसीसां दीवी ।

वर्धमान पाळकी सूं उत्तर अशोकव्रक्ष रै नीचे गया । वठै वणा गिरस्ती रा गाभा उतार नियन्थ रो रूप धारण करियो । सब

करियां परा दृष्ट संकल्प रा वणी महावीर रो ध्यान तिळ भर भी नीं डिगियो ।

उपसर्गो रो ऋष आगी वढतो ई र्यो । एक भूखो तिरसो वटाऊ आयो । वो नूख मिटावण मारु खाणो वणावणो चावतो हो । वीनै कठैड चूल्हा निजर नी आयो । वी ध्यान में लीन ऊभा महावीर रा चरणां मूं चूल्हा रो काम लेय'र खाणो वणा लियो । इण घोर पीडा मूं भी महावीर रा ध्यान भंग कोनी हुयो । एकइ रात में घणान्वरा उपसर्गो सूं महावीर रो साधना रो तेज अरूहं निखरग्यो । नूई चेतना सू भर'र दिन उगी वणां आगै कदम वढाया । परा संगम हाळताईं महावीर रो साथ कोनी छोडियो । उणां नै अरूहं तकलीफा देवण खातर वो भी उणांरै सागी-सागी चालियो ।

एकदा तोसलगाव रं वाग में महावीर ध्यान मगन हा । उणां नै ध्यान मगन देख संगम साधु रो भेस वगा'र गांव में चोरियां करण नी गयो । लोणां वी नै पकड'र मारियो-कूटियो । वो बोल्यो-म्हनी मती मागे । म्है तो म्हारै गुरु रं केवण सू चोरी करी है । जै थां अमली चोर नै पकड'नो चावो तो वाग मे जावो । वठै म्हारो गुरु ध्यान रो मांग वणा'र ऊभो है । लोग वाग में जा'र प्रभु पर लकडियां अर लाठिया मूं वार करिया, परा महावीर अडील वणा'र ध्यान मे लीन रह्या ।

इण भात संगम देव छह महिना नाई महावीर रै पाछै पडियौ रयो अर उपसर्ग देवतो र्यो । इण उपसर्गां मे महावीर नै अन्न-पाणी भी नी मिल्यो । संगम देख्यो कै इतरा कष्टां सूं भी महावीर आपरां ध्यान मूं अळगा नी हुया तो उणारी साधना सूं प्रभावित रै हुय'र वो महावीर रै पगां पडियौ अर वासूं माफी मागी । महावीर रै मन में कष्ट देवगिया संगम रै प्रति नी रोस हो अर नी द्वेष ।



महावीर री इण क्षमा भावना नै देख संगम लाजां मरग्यो अर मन ही मन खुदरी आत्मा नै धिक्कारवा लाग्यो ।

**कुलथ सूं पारणो :**

गांव-गांव विचरण करतां हुया महावीर वैसाळी पधारिया । चौमासो अठैइ पूरो करियो । पारणा रं दिन भिक्षा खातर महावीर पूरण सेठ रं घरां गया । द्वार पर महावीर नै ऊभा देख सेठ उणां री उपेक्षा करी अर दासी सूं कयी कं वारै भिक्षु ऊभो है । वीनै भिक्षा दैय दे । दासी एक कुडछो भरंर कुळथ प्रभु नै दिया । महावीर उणा कुळथ सूं चातुर्मासिक तप रो पारणो क्रियो ।

**बारमो बरस :**

**चमरेन्द्र नै सरण :**

महावीर सुन्सुमारपुर वन खंड में असोक वृक्ष रं हेठै ध्यान लीन हुया । एकदा चमरेन्द्र (अमुरकुमारां रो इन्द्र) आपणै जान-बळ सूं देखियो कं—इण संसार मे म्हारै सूं धनवान अर बळवान कुण है । वीनै इन्द्र दिव्य भोग भोगतो निजर ग्रायो । ओ देख चमरेन्द्र रो किरोध बधग्यो । वी आपणै साथी असुरकुमारां नै पूछियो—ओ विवेकहीन घमण्डी देव कुण है ? असुर कुमार वयी कं ओ तो सौधमेन्द्र देव है, अर आपणै सूं बत्ती ताकतवर है । ईं सूं छेड़छाड़ करणो आपणी जान जोखम मे नाकणी है ।

चमरेन्द्र असुरकुमारां री मजाक वणावतां बोलियो—या सब कायर हो, म्हूं किणी नै म्हारै माथा पर बैठ्यो देख नीं सकूं । अबार वीकी टांग पकड़ंर वीं नै आपणै आसण सूं काई देवलोक सूं हेठै पटक टूँला ।

चमरेन्द्र रा रोस भरिया सवद सुण देवराज इन्द्र नै पण रोस आयग्यो । वां सिंहासण पर बैठ्या-बैठ्या वज्र हाथ में ले'यर

चमरेन्द्र रै दे मारियो । वज्र आग उगलतो थको चमरेन्द्र कांती आवा लाग्यो । वीनै देख असुरराज डरपग्यो । वो ध्यानस्थ भगवान रै कनै जाय उगारै पगां में पड़ियो अर कंवा लागो-भगवान म्हनै शरण दो ।

देवराज इन्द्र अत्रिघ ज्ञान सूं देखियो कैं चमरेन्द्र प्रभु महावीर रै चरणों में पड़ियो है । कठं म्हारै छोड़्योड़ें इण वज्र सूं भगवान नैं तकलीफ नी हुवै, आ सोच वो भगवान रै कनै आयो अर वामूं चार आंगळ दूरी मूं वज्र नैं पाछो पकड लियो । भगवान रै चरणों-सरणा में होवण सूं देवराज इन्द्र चमरेन्द्र नैं माफ करियो ।

**कठोर अभिग्रह :**

सुन्नुमारपुर, भोगपुर नन्दिग्राम, मेढिया ग्राम होता हुया प्रभु महावीर कोसाम्बी पवारिया । अठें पोस वदी एकम रै दिन महावीर एक कठोर अभिग्रह धारियो—छाजळ रै कूणें में उड़द रा वाकुळा लियां देहरी रै वीचें कोई राजकुंवरी दासी वणियोड़ी ऊभी हुवै । वीकें हाथां में हथकडियां अर पगां मांय वेड़ियां हुवै । माथो मूं डियोड़ो हुवै । आख्या मांय आसूं अर होठां पर मुळक हुवै । वीकें तेला (तीन दिन री भूखी) री तपस्या हुवै । भिक्षा री समय बीतग्यो हुवै । अड़ी वगत इसी कवारी राजकन्या म्हनै भिक्षा देवैला तद म्हूं आहार करूंला अर नी तो छह महिना ताईं भूखो रेऊंला ।

आ कठोर प्रतिज्ञा ले'र महावीर नित हमेस भिक्षा खातर जावता । पर अभिग्रह पूरो नी हुवण रै कारण विना काई लियां पाछा आय जावता । लोग अचभा मे हा कैं महावीर आहार कांती लेवै ? इण नगर में इसी काई कमी है, कांड वुराई है, जिसूं भगवान विना अन्न-पाणी लियां पाछा-पाछा फिर जावै ? इण भांत विना आहार करियां पांच महिना अर पच्चीस दिन बीतग्या । अचाणचक

५५ दिन भिक्षा लेवण नै प्रभु धन्ना सेठ रै घरै गया । वठै राजकंवरी चन्दणबाळा तीन दिन री भूखी-प्यासी छाजळे में उडद रा बाकुळा लियां देहरी में ऊभी-ऊभी मुनिराज नै आहार देवा री शुद्ध भावना भाय री ही (सेठायी मूळा ईर्ष्यावश चन्दन बाळा रा केस कतराय, हथकडियां अर बेड़ियां पैराय, उणनै भूंवारै में बंद कर राखी ही ।) प्रभु महावीर नै भिक्षा खातर आवतां देख वा घणी राजी हुई । वीको रू-रू खुमीऊं भरगयो । अभिग्रह री सगळी वातां मिल री ही । बस, एक बात री कमी ही । वीरी आंख्यां में आंसू नीं हा । आ कमी देख आयोड़ा महावीर बिना अन्न-पाणी लियां पाछा फिरग्या ।

आपणै बारणै आयोड़ा महात्मा नै खाली हाथ जावता देख चन्दणा रो जीव उदास व्हेग्यो । वीरी खुसियां पर पाणी फिरग्यो । वा सोवण लागी- म्हुं कितरी अभागण हूं । संसार-समुद्र मूं तारबा आळा प्रभु म्हनै मझधार में छोड़'र चल्याग्या । इण मुसीबत मे नाता-रिस्ता आळा लोगा तो म्हनै बिसराय दीवी ही । म्हुं तो प्रभु महावीर रं आसरै ईज दिन काट री हीं । म्हनै तो पूरो भरोसो हो कै प्रभु म्हारै हाथां सूं आहार ले'र म्हारो उद्धार करैला । परण हाय ! इण खोटा समय मे भगवान भी म्हनै भुलाय दी । आ सोचतां-सोचतां वीकी आंख्यां आसुं आं सूं भीजगी ।

महावीर पाछै मुडर देखियो । चन्दन बाळा री आंख्यां में आंसू हा । महावीर नै भिक्षा खातर पाछा मुडता देख, वीरी उदासी मिटगी । ओठां पर मुळक आयगी । सै वातां मिलती देख महावीर चन्दण बाळा रै हाथां सूं आहार लियो । इणरै सागै इ चन्दणा रो सकट टळगयो ।

महावीर नारी जाति रो उद्धार करणो चावता हा । समाज में नारी नै इज्जत देवण खातर ईज महावीर इसो कठोर अभिग्रह धारियो । प्रभु महावीर कयौ-पुरुष री भांत नारी नै भी साधना रै

भारग पर बढण रो पूरो अधिकार है । चन्दणा महावीर रो पैली शिष्या अर साधवी संघ रो प्रमुख बरणी ।

कानां में कीला :

साधना काळ रै तैरमां बरस रै सरुआत मे महावीर छम्माणि गांव रै बा'रै ध्यान मे ऊभा हा । सांभै एक गवाळियो बळदां नै महावीर कनै छोड'र किणी काम सूं आपणै गांव गयो । पाछो आय जद वी आपणां वळदा नै जोया तो वी नी मिल्या । गवाळियै महावीर सू पूछियो—म्हारा बळद कठे गया ? महावीर तो आतम-चिन्तन में लीन हा । वी की नी बोल्या । महावीर नै मौन देख गवा-ळियै नै रोस आयगी । वो बोत्यो—अँ डोगी बाबा ! तू म्हारी बात सुण'यो है कै नी ? कठे तू बहरो तो नी है ? पण महावीर कीं उत्तर नी दियो । गवाळियै रो किरोअ ओरुं बढगयो । वीं कनै पडियोड़ी तीखी सळाका उठा'र महावीर रै कानां में आरपार ठोक दीवी । इण सळाका-छेदण सूं महावीर नै घणी वेदना हुई । पण ई'ण परोसह नै वी सांत भाव सूं सहन करता'या ।

छम्माणि गांव सूं विहार कर'र महावीर मध्यम पावा पधा-रिया । अठा सूं भिक्षा खातर धूमता-धामता सिद्धारथ नामक वणिक रै घरै आया । इण वगत सिद्धारथ रो मित्र खरक वैद्य पण अठे हो । प्रभु नै आया जाण खरक वैद्य बां नै वन्दना करी । वीं देख्यो कै महावीर रो चेहरो अपार तेज सूं चमक'यो है पण आंख्या में गहरी वेदना भळकै । खरक भांपग्यो कै भगवान रै सरीर मे सळाका चुभ री है । आहार लेवती वगत वी भगवान रै सरीर नै देखियो । वी नै भट ठा पड़गी कै प्रभु रै कानां में किणी कीला ठोकिया है ।

दोन्यूं मित्र प्रभु सूं रुकण सारुं अरज करी पण महावीर रुक्या कोनी । वी पाछा गांव रै बा'रै जाय ध्यान में लीन हुयग्या ।

सिद्धार्थ अर खरक दवा लेय महावीर जठै ध्यानमगन हा, बठै गया । वठै पोंच'र वां देख्यो कै असह्य वेदना हुयां पाण भी महावार सात भाव सूं ध्यान में लोन है । खरक संडासी सूं सळाका खेंच'र वारै काढी । सळाका रें सागै लोही री धारा बैवण लागी । साधक जीवन री आ आखरी वेदना ही । कानां री सळाका बा'रै निकलण सूं महावीर बाहरी दुखां सूं ईज मुक्त नी हुया । अबै वी साधना रै इत्तौ ऊंचै सिखर पर चढ़ग्या हा कै वी सदा सर्वदा खातर आन्तरिक दुखा सूं भी मुक्त हुयग्या ।

### महावीर री तपस्या :

छद्मस्थकाळ रै साढ़ै बारा वरसां रै लम्बे समय में महावीर तीन सौ उनचास दिनां इज आहार ग्रहण करियो । बाकी रा दिनां में बिगर अन्न-पाणी लियां वी कठोर तपस्या करता र्या । महावीर री आ तपस्या सब तीर्थकरां सूं घणी कठोर अर बेसी ही । इण री तालिका इण भांत है—

छह मासिक तप—१	( १८० दिनां रो )
पांच दिन कम छह मासिक तप—२	( १७५ दिनां रो )
चातुर्मासिक तप—६	( १२० दिनां रो एक तप )
तीन मासिक तप—२	( ९० दिनां रो एक तप )
सार्ध द्विमासिक तप—२	( ७५ दिनां रो एक तप )
द्विमासिक तप—६	( ६० दिनां रो एक तप )
सार्ध मासिक तप—२	( ४५ दिनां रो एक तप )
मासिक तप—१२	( ३० दिनां रो एक तप )
पाक्षिक तप—७२	( १५ दिनां रो एक तप )
भद्र प्रतिमा—१२	( २ दिनां रो एक तप )
महाभद्र प्रतिमा—१	( ४ दिनां रो एक तप )
सर्वतोभद्र प्रतिमा—१	( १० दिनां रो एक तप )

सोलह दिनां रो तप—१

अष्टम भक्त तप—१२

(३० दिनां रो एक तप)

षष्ठ भक्त तप—२२६

(२ दिनां रो एक तप)

इणरं अलावा महावीर दसम भक्त (चार दिन रो उपवास) आदि घणी तपस्यावां कीवी । वां री तपस्या निरजळ (विगर जळ री) हुवती, अर ध्यान साधना री उणमें खासियत रेंवती ।

मूल्यांकन :

भगवान महावीर रें साधना रो ओ लम्बो समय वां री अग्नि परीक्षा रो कठोर समय हो । साढा वारा बरसां में वांकी सहनशक्ति, समता, अहिंसा, करुणा अर ध्यानलीनता री अंडी कठोर परीक्षावां हुई कें वां री कल्पना सूं इज मन थर-थर कांपवा लाग जावें । साधक जीवन में महावीर नै जे उपमर्ग मिलिया वी एक तरफो हा । महावीर उणां रो कांई प्रतिकार नी कियो । यूं तो किरोध सूं किरोध री अर अहङ्कार सूं अहङ्कार री टक्कर हुवै, पण श्रमण महावीर तो सब विकारां सूं अलगा हा, मृक्त हा । वां किरोध नै क्षमा सूं अर अहङ्कार नै समभाव सूं जीतियो ।

### केवलज्ञान :

महावीर री साधना रै तैरमे बरस रो सातवो महीनो हो ।  
वैसाख सुद दसमी रो चौथो पहर । महावीर जभिय ग्राम रै बा'रै  
ऋजुबालुका नदी रै किनारे स्यामाक नाम रै गाथापति रै खेत में  
साळ रुख रै हेटै ध्यानमगन हा । बांकै दो दिनां रो निजळ उपवास  
हो । इणीज ध्यान मुद्रा में भगवान नै केळवज्ञान री प्राप्ति हुयी ।  
अबै वी प्रत्यक्ष ज्ञानी बणग्या । सगळा लोक रै जीवां-अजीवा री  
सब पर्याया नै देखबा अर जाणवा री खमता वांमें आयगी ।

महावीर री केवळज्ञान सूं पैलां री साधना आतमकल्याण  
री साधना ही । अबै लोककल्याण री भावना वांकै मन में आई ।  
अबार तांई आतमदरसण खातर वी मू'न राख'र सूनी ठौड मे  
ध्यान अर तप करता हा । अबै वानै कठोर साधना रो फळ मिलगयो  
हो । वांनै आतम साक्षात्कार हुयगयो । अबै वी जातपात रो भेदभाव  
मेट'र वासना अर दासता री बेडिया सूं मिनखां नै मुक्त कर'र  
आजादी रो वातावरण देणो चावता हा । महावीर री अनन्त  
करुणा अर भाईचारा री भावना वांनै संसार रो कल्याण करण री  
प्रेरणा देय री ही ।

### ग्यारह गणधर

केवळज्ञान पाम्या पछै महावीर मध्यम पावा पधारिया ।  
अठै आर्य सोमिल एक बहुत बड़ो यज्ञ रचियो । बड़ा-बड़ा पंडित यज्ञ में

आयोड़ा हा । यज्ञ रो सँ काम इन्द्रभूति जिसा वेदान्त पडित रँ हाथां मे हो ।

बैसाख सुदी ग्यारस रो मंगळ परभात हो । देवता एक बड़े समवसरण (सभागृह) री रचना करी ॥<sup>१</sup> उण समवसरण में भगवान जनता नै उपदेश देणो सरू करियो । वारी अमरत वाणी सुण सँ जण हरख अर उमाव सूं भरग्या । महावीर री वाणी सुणवा खातर आकास मारग सूं देवगण भी आया हा । आ देख इन्द्रभूति गौतम नै आपणी विद्वता पर आंच आवती सी लागी । महावीर नै उणीज नगरी मे आया जाण वा प्रभु रँ अर्लाकिक ज्ञान री परख करवा अर सास्त्र ज्ञान में वानै हरावण रँ भाव सूं उण समवसरण मे आया । वारै सागै पांच सी चेला अर बीजा पडित पण हा ।

इन्द्रभूति गौतम जिण समय समवसरण में पहुंचिया, वारै मन मे महावीर सूं बढळो लेवण री भावना उमड री ही । वां उठै पाँच'र महावीर कांनो देखियो । वानै लागौ के महावीर री आंख्या सूं प्रेम अर मित्रता री अमरत वरखा वैयरो है ।

इन्द्रभूति नै आवता देख महावीर वोलिया—गौतम ! था आयग्या !

गौतम नै लाग्यो—महावीर री वाणी में प्रेम, अणायत अर मित्रता रो भाव है । वारै मन में उठी बढळी री भावना सांत हुयगी । महावीर रँ भूंडा सूं आपणो खुदरो नाम सुण गौतम नै घणो अचम्भो हुयो । वी सोचण लाग्या—म्हारी ज्ञान री चरचा सगळी जगां है, ईं खातर महावीर म्हारै नाम जाणता वेला । पण जठा ताईं म्हारै

---

१ दिगम्बर परम्परा मुजब भगवान महावीर री पैली देसना राजगृह रँ विपुलाचळ पर सावण बदी एकम रँ दिन हुई ।



मन में उठयोड़ा सवालां रा जवाब वी नी देला, बठा ताईं म्है अणा नै सर्वज्ञ नी मानूँला ।

गौतम रै मन री आ भावना जाण महावीर बोलिया—  
आयुस्मान गौतम ! थानै आतमा रै अस्तित्व पर संका है । थां सोच-  
रया हो कै आतमा (जीव) नाम रो कोई तत्त्व है या नीं ? गौतम  
आतमा रो अस्तित्व है । वा आ आख्यां सूं कोनी देखी जा सकै । आतमा  
इन्द्रिय ज्ञान सूं परै अनुभव री वस्तु है । महावीर कैवता जायर्या  
हा-इन्द्रभूति ! तत्त्व नै तर्क सूं समझो, अनुभव सूं जाणो अर  
हरदय सूं बीनै मंजूर करो । थां खुद विद्वान हो । थानै बत्तो कैवण  
री जरूरत कोनी ।

महावीर रा प्रेम भर्या सबद सुण इन्द्रभूति री सै संकावां  
मिटगी । वारो अहंकार गळग्यो । वी विनय भाव सूं कैवण लाग्या-  
भगवन् ! आज म्हारै भरम रा सै आवरण दूर व्हैग्या । आप म्हनै  
सांचो रास्तो बतावण आळा हो । म्हूं आज सूं आपनै म्हारा गुरु  
मानूं हूं । म्हनै आप रै सरणा में राखो अर आतम साक्षात्कार  
करण रो गैलो बतावो । ज्ञान रा प्यासा, सांच रा इच्छुक इन्द्रभूति  
महावीर रा शिष्य बराग्या । वारै सागै वारा पांच सौ चेला भी  
महावीर रै चरणां में दीक्षा ग्रहण करी ।

इन्द्रभूति गौतम रै दीक्षित होणै रा समीचार विजळी री  
दाईं सब ठौड़ फेलग्या । सोमिल रै यज्ञ में तहळको मचग्यो । वेदान्त  
पंडित अग्निभूति अर वायुभूति परा महावीर नै आपणै ज्ञानबळ सूं  
पराजित करण री भावना सूं भगवान रै कनै आया, परा नैडे  
आवतां-आवतां वारो अहंकार चूर-चूर व्हैग्यो । प्रभु महावीर सूं आपणी  
सकावां रो समाधान पा'र वै भो भगवान रा शिष्य बराग्या । शिष्य  
इण भाँत आर्य व्यक्त, सुधर्मा, मंडित, मौयंपुत्र, अकम्पित, अचळाभ्रता,  
मेतार्य अर प्रभास जिसा पंडित महावीर रै चरणां में दीक्षा लीवी ।  
महावीर रा औ पैला ग्यारह शिष्य गणधर कहीजै ।

धरम संघ री थरपणा :

मव्यम पावा री पैली धरम सभा मांय ईज इग्यारे वडा वडा विद्वान अर उगारा चार हजार चार सौ शिष्य, भगवान महावीर रै कनै प्रव्रजित हुआ। आ एक वडी इचरजकारी घटना ही। इग भांत भगवान महावीर रै उपदेशां सूं प्रभावित हुयर कई राजा-महा-राजा, सेठ-साहूकार, अर वीजा घणाई लोग-लुगाई महावीर रा शिष्य वणिया। भगवान मिनखां नै श्रुन धर्म अर चारित्र धर्म री सीख दे'यर साधु, साव्वी अर श्रावक-श्राविका रूप चतुर्विध संघ री थरपणा करी।

इग व्यवस्था नै प्रभु दो भागां में बांटी। एक पूरो त्यागी वर्ग अर दूजो आंशिक त्यागी वर्ग। पूरो त्याग करणिया साधु अर साध्वियां रो न्यारो-न्यारो सघ वणायो। इणीज भांत आंशिक त्यागियां मांय भी श्रावक अर श्राविका रो न्यारो-न्यारो संघ कायम कियो। घरवार छोड़'र पांच महाव्रतां रा पाळण करणिया नर-नारी श्रमण अर श्रमणी कंवाया अर गृहस्थी में रैय'र वारा अगुव्रतां रा पाळण करणिया नर-नारी श्रावक अर श्राविका रै रूप मे भगवान रै धर्म संघ में भेळा हुआ।

श्रमण संघ री शिक्षा-दीक्षा, व्यवस्था अर अनुशासन री देखभाळ रो भार गणधरां रै जिम्मे रहियो। श्रमणी संघ रो भार आर्या चंदणा नै सूप्यो गयो। वा छतीस हजार साध्वियां री प्रमुख ही।

महावीर रै धर्म शासन में जाति, पद, अधिकार या उमर सूं कोई साधु वडो नी मानीजतो। उण रै बड़प्पन रो कारण उण री साधना मानीजती। महावीर रै श्रमण संघ मे राजा, राजकुमार, ब्राह्मण, वारिणिया, सूद्र, चांडाळ आदि सगळी जातियां रा लोग भेळा हा। संघ में सवरै सागे समता रो व्यवहार हो। जात-पांत सूं कोई ऊंचो-नीचो नी मान्यो जावतो।

प्रभु महावीर रै शासनकाळ मे मुनिगण स्वेच्छा सूं नियम, धरम री पाळणा करता हा । संघ -व्यवस्था में विनय, सरळता अर समानता ही । सै श्रमण गुरु री आज्ञा अर अनुशासन में चालता हा । साधना री दृष्टि सूं धरम संघ में तीन भांत रा श्रमण हा—

१. प्रत्येक बुद्ध :—अै श्रमण सहूं सूं ई संघ री मरजादा सूं अळगा रैय'र धरम साधना करता हा ।
२. स्थविरकल्पी :—अै श्रमण संघ री मरजादा अर अनुशासन मे रैय'र साधना करता ।
३. जिनकल्पी :—अै श्रमण किरणी खास साधना पद्धति नै अपणा'र संघ री मरजादा सूं अळगा रैय'र तपस्या आदि करता ।

प्रत्येक बुद्ध अर जिनकल्पी साधु स्वतंत्र रैवता । इणां नै किरणी रै अनुशासन गी जरूरत नीं ही । स्थविरकल्पी साधुवां खातर धरम संघ मे नीचे मुजब सात पदां री व्यवस्था ही :—

१. आचार्य—आचार विधि री सीख देण आळा ।
२. उपाध्याय—श्रुत-शास्त्र रो अभ्यास करण आळा ।
३. स्थविर—वय, दीक्षा अर श्रुत-ज्ञान,में बत्ता जाणकार ।
४. प्रवर्तक—आज्ञा, अनुशासन री प्रवृत्ति करण आळा ।
५. गणी—गण री व्यवस्था करण आळा ।
६. गणधर—गण रो पूरो भार संभाळणिया ।
७. गणावच्छेदक संघ री संगह-निग्रह व्यवस्था रा जाणकार ।

अै सगळा पदाधिकारी संघीय जीवण में शिक्षा, साधना, आचार-मरजादा, सेवा, धर्म प्रचार, विहार जिसी व्यवस्थावां नै

सम्भाळना । अनुशासन रै नाम पर किणीरी भावनावां अर स्वतंत्रता रो लोप वठै नी हुवतो । नेत्र करण आळा या आज्ञा रो पाळण करणिया साधु यूं नीं सोचता कै म्हानै ओ काम जवरन करण पडुर्यो है । सै श्रमण आत्मीय भाव सूं आपूआप सेवा करता अर आज्ञा रो पाळण करता ।

केवलीचर्या रो पैलो वरस .

वरम संब रो धरपणा कर, महावीर राजगृह रै गुणसील चंत्य में आपणै साधु परवार ननेन आय ठहरिया । आर्या चन्वनवाळा अर न्यारह वड़ा-वड़ा विद्वान पंडितां रै श्रमण दीक्षा अंगीकार करण रै समांचारां सूं लोगां में तहळको मचग्यो अर धर्म रै प्रति वारी आस्था जागी । महावीर रै पधारण रो खबर सुण राजा श्रेणिक, आपणै राजपरिवार समेत प्रभु-दरसण करण नै आया । महावीर रा उपदेस सुण राजा श्रेणिक समकित लीवी अर राजकुंवर अभयकुमार श्रावक धर्म अंगीकार करियो ।

मेघकुंवर नै आतमबोध :

श्रेणिक पुत्र मेघकुंवर पण भगवान् महावीर रै दरसण खातर आया । महावीर रो उपदेस सुण मेघकुंवर रो मन भोग सूं योग कांनी मुडग्यो । वां नै आपणो जीवन सफळ वणावण रो कळा प्रभु मू मिलगी । मेघकुंवर भगवान महावीर रै चरणां में वदना करैर वोल्या—भगवन् ! म्हारी सोई आतमा जागगी है । अब म्हुं पण दीक्षा लेय नै साधना रै ई मारग पर आगे बढ़णो चाऊं । प्रभु ! म्हनै दीक्षा देवो ।

मेघकुंवर रो भावना देख भगवान् वोल्या—देवानुप्रिय । जिण मारग पर चालण में थारी आतमा नै सुख मिलै, उण मारग पर बढ़ण मे जेज मत कर ।

प्रभु महावीर री आज्ञा पाय मेघकुंवर माता-पिता कनै गया अर बाकै सामै आपणै मन री (श्रमण बगण री) इच्छा परगट करी। पुत्र मेघ रा सबद सुण पिता श्रेणिक अर मां धारिणी री आंख्यां भर आई। पण माता-पिता रो मोह मेघ नै साधना रै मारग पर बढ़ण सूं रोक नीं सक्यो। मेघ कुंवर रै श्रमण बगण रो अटळ निश्चय जाण माता धारिणी आपणी आखरी इच्छा परगट करतां बोली—बेटा! म्हुं थनै राजसिंहासण पर बैठ्यो देखणो चाळुं। थारै जिस्या लायक बेटा नै पाय म्हुं राजमाता रो गौरवशाली पद पावणो चाळुं। तू म्हारी आ मनसा पूरण कर, भलेइ एक दन खातर ई तूं राजसिंहासन पर बैठ।

मां रा प्रेम भरिया करुण सबद सुण मेघकुंवर एक दिन खातर राजसिंहासण पर बैठ'र लोगां नै सीख दी कैं आ जिदगानी भी एक दिन रो राज है। इण राज री सफळता भोग अर वैभव में कोनी। ईं री सफळता योग अर साधना में ईज है।

दुजै दिन मेघकुंवर संसार रा सगळा ऐस आराम छोड़'र महावीर रा चरणा में जाय दीक्षा लीवी। दीक्षा लियां पछै दिन तो बीतग्यो पण रात पड़ियां, दीक्षा मांय सबसूं छोटा हुवण रै कारण, मेघकुंवर नै सैं मुनिया रै लारै दरवाजा रै कनै सोवण री ठौड़ मिली। सबारै लारली जगा में सोणै सूं मेघकुंवर नै नींद नी आई। अंधारा में ध्यान आदि खातर बारै आवता - जावता मुनियां रा पग कदैई वणां रै हाथां पै लागता तो कदैई पगां पर। ईं कारण मेघ मुनि नै रोस आयग्यो। वी सोचण लाग्या-म्हुं राजकुंवर हो, महलां मे म्हारो कितरो आव-आदर हो। पण अठै म्हारो ओ अपमान? महलां में म्हुं मखमळ रा गादी-तकिया पर सूबतो हो, पण अठै कड़ी जमीन पर सूवणो पड़। गादी-तकिया तो ठीक पण बीछावणौई पूरो कोनी। म्हारै सोवण रा कमरा में कितरी शान्ति ही अर अठै कितरी भीड। अठै तो म्हुनै सबरी

ठोकरां खावणी पडरी है। सांचाई साधु रो ज वन घणो कठोर है। म्हूं तौ इसो जीवन नी जी सकूँला। काई सारी रातां जागतोई रेवूँला? इण उधेडबुन में मेघकुंवर नै रात भर नींद नीं आई। वां निश्चय करियो कै परभात व्हेताईं म्हूं भगवान महावीर नै सैं बातां अरज कर पाछो गिरस्त बण जाऊँला।

परभात व्हेताईं मेघकुंवर महावीर कनै गया। अन्तरजामी महावीर मेघ री मन री पीड़ा समझग्या हा। वां फरमायो-मेघ! थोडा सा कष्टां सूं दुखी व्हेइनें आगै बढ्या चरण पाछा पळटणा काईं ठीक है? छणिक वेदनावां सूं दुखी होय तूं उजाळे सूं अंधारा मे भटकणो चावै। तूं याद कर आपणै वीत्योड़े भव नै जद पसु जूँण (हाथी री जूँण) में तूं घणा कष्ट भोग्या हा। उण पसु जूँण में थोड़ी सहन शक्ति रै कारण ईज थनै पाछो ओ मिनखजमारो मिल्यो है। दुरळभ मिनखजमारो पायनै तूं क्यूं कायर बणै है?

महावीर रो वारणी सुगंता-सुगंता मेघ नै जाति समरण ज्ञान व्हेग्यो। वीनै आपणै पूरव जनम री घटनावां एक-एक कर निजर आवा लागी। वीनै याद आयो-वो हाथी री जूँण में रूप अर बळ रो घणी हो। ईं खातर वो पूरा हस्तिमण्डळ रो नायक हो। एक बार अचाराचक जंगळ में लाय लागी। सैं पशु-पक्षी आपणी रक्षाखातर भाग'र वै एक मैदान में भेळा हुया। ईं मुसीबतरी घड़ी में ना'र, हिरण, लोमड़ी अर खरगोस जिसा जिनावर आपसी बैर भाव भूलग्या हा। आखी मैदान जिनावरां सूं खचाखच भरग्यो। पग धरवा री जगां नीं हो। उण बगत वो हाथी खाज खुजाबा ताईं एक पग ऊंचो करियो। इतरा में एक खरगोस उण रा पग हेटै रक्षा ताईं आ'र बैठग्यो। हाथी देख्यो कै म्हूं पग धर दूँला तो ओ खरगोस मर जावेला। ईं कारण वो उठायोड़ो पग नीचे नीं मेलियो अर तीन पगां पर दो दिन-रात ऊभो र्यो। तीजै दिन लाय सांत हुबण पर खरगोस बठा सूं दूजी ठौड़ चलयो ग्यो। दजा जिनावर

भी आपरौ-आपरौ गैत्रे लाग्या । हाथी खरगोस नै गयो देख आपरौ पग नीचे टिकायो । सरीर रो संतुलन नीं सभाळ सकरौ रै कारण वो जमी माथै पड़ गयो अर मरग्यो । आपरौ प्राण देर भी वीं हाथी खरगोस री रक्षा करी ।

पसु जूँरा में आपरौ इसी कष्ट सहिगुना अर दया भावना नै यादकरै मेघकुंवर रो हिरदौ नूँवै प्रकास अर नूँवी चेतना सूं भरग्यो । वी प्रभु रा चरणां में माथो टिकाय दियो अर कयौ-प्रभु । म्हनै माफ करो । अरवै म्हूँ अंधारा सुं ऊजाळा में आयग्यो । आपरौ भूल अर अहम् पर म्हनै पछतावौ है ।

इए भात मेघकुंवर रै टूटत मनोवळ नै थामर महावीर उएनै आतम कल्याण रै मारग पर बढ़ण री प्रेरणा दीवी ।

**नंदीसेण री प्रतिजा :**

राजगृही में भगवान महावीर रै कनै जद मेघकुंवर श्रमण जीवन गंगीकार करियौ तो राजकुंवर नदीसेण रै मन में पण साधना रै मारग पर बढ़ण री इच्छा जागी । नन्दीसेण आपरौ पिता महाराजा श्रेणिक रै सामै आ भावना परगट करी, तद श्रेणिक कयौ-मेघकुंवर रै देखादेख तूँ दीक्षा लेवण रो विचार मत कर । पै तां महलां में रैयर मन नै साध । थारी प्रकृति भोग बिळास री है । तूँ पैली उएनै सांत कर, पछै दीक्षा ले ।

कुंवर नंदीसेण कयौ-म्हूँ तप अर ध्यान सूं आपरौ प्रकृति वदळ लूंगा । इएगिज विसवास रै सागै वीं भगवान महावीर कनै प्रव्रज्या ग्रहण करी । दीक्षा लैर नंदीसेण कठोर तपस्या करणी सरू करी । तप साधना रै दिव्य प्रभाव सूं वानै घणी चमत्कारी शक्तियां (लब्धियां) प्राप्त हूई ।

एकदा वेळे रै पारणो रै दिन वी गोचरी खातर एक गणिका रै घरं गया । दरवाजै पर जावताईं मुनि बोल्या-घरम लाभ । मुनि रै घरम लाभ री बात सुण गणिका हंस पड़ी । अर बोली-मुनिवर । अठै तो घरम लाभ नी अरथ लाभ री चावना है । गणिका री हंसणो मुनि नै त्वागो लाग्यो । वणां वठैईं आपणी चमत्कारी शक्ति सूं रतनां री ढेर कर दियो अर कयो-ले ! ओ अरथलाभ ! सामै रतनां री ढेर लाग्यो देख गणिका मुनि रै पाछै पडगी अर कैवण लागी-प्राणनाथ ! म्हूँ नै छोडूंर कठै जाओ ? आप म्हारं सागी रैवो । आपुं वियोग मे म्हूं प्राण छोडू दूली । गणिका रै वार-वार कैवण सूं नदीसेण वठै रहग्या । वठै रैवता थका नंदीसेण आ प्रतिज्ञा करीकै नित हमेस जठा ताईं म्हूं दस मिनखां नै घरम री उपदेश नी देऊंला वठा ताईं भोजन ग्रहणनी कहंला, अर जीं दिन म्हूं दस मिनखां नै प्रतिबोध नी दे सकूंला ऊं दिन पाछो प्रभु रै चरणां मे चलयो जाऊंला ।

गणिका रै सामै रैवतां दस मिनखा नै नंदीसेण रोज उपदेस देवता अर वानं दीक्षा खातर प्रभु रै चरणां मे मोकळता, जद जांर वी रसोई जीमता । एक दिन नी मिनखां नै उपदेस देय नै दीक्षा खातर तयार कर दिया, पण दसवो मिनख उपदेस सुणूंर भी दीक्षा लेण खातर राजी नी हुयो । गणिका वार-वार नदीसेण नै रसोई आरोगवा खातर बुलाय री ही, पण आज वां को संकल्प पूरो नीं होर्यो हो । ईं खातर नदीसेण रसोई नी जीमर्या हा । जद दसवों आदमी कोई राजी नी हुयो तद दूढ संकल्पी नंदीसेण खुद उठूंर प्रभु रै चरणां मे चल्याग्या अर कठोर तपस्या करूंर आतम सुद्धि करण लाग्या ।

इण भांत नंदीसेण नै पाछो आपणो चेलो वणाय महावीर सांची सहानुभूति अर वत्सल भाव री परिचय दियो । महावीर री कैबणो हो—घिणा पाप सूं करणी चाइजै, पापी सूं नी ।



दूजो बरस :

ऋषभदत्त अर देवानन्दा नै प्रतिबोध :

गांव-गांव विचरण करता हुआ भगवान महावीर ब्राह्मण कुण्ड ग्राम में पधार'र बहुसाळ चैत्य में विराजिया। भगवान रै आवण री बात सगळी जगां फैलगी ही। पंडित ऋषभदत्त देवानन्दा ब्राह्मणी रै सागै प्रभु रै दरसण खातर आया।

भगवान नै देखताईं देवानन्दा रै मन में प्रेम उमड़ आयो। खुसी सूं वींको मन हरखियो। कंठ गळगळो सो व्हैगयो। हिवडो हेत सूं भग्यो। वात्सल्य भाव रै वेग सूं बोबा सूं दूध री धारा बेवण लागी। आ अनोखी घटना देख गणधर गौतम भगवान महावीर सूं ईंको कारण पूछियो। भगवान बोल्या—गौतम ! आ देवानन्दा ब्राह्मणी म्हारी माता है। त्रिशला क्षत्रियाणी रै गरभ सूं जनम लेवण रै पैलां म्है बयासी रातां माता देवानन्दा रै गरभ में पूरी करी। भगवान री बात सुण सारी सभा चकित रैगयो। ऋषभदत्त अर देवानन्दा दोन्यूनै घणो अचभो हुयो। इसा भाग्यशाली पुत्र री मां हुवण री बात सुण देवानन्दा हरखी अर पछै पुत्र रा बतायोड़ा मारग पर चालण रो सकल्प करियो अर दीक्षा लेय'र ऋषभदत्त गणधरां रै अर देवानन्दा चन्दनवाळा रै नेश्राय में तप साधना करी।

प्रियदर्शना अर जमालि री दीक्षा :

ब्राह्मणकुण्ड सूं प्रभु क्षत्रियकुण्ड ग्राम (महावीर री जनम भूमि) पधारिया। प्रभु रै आवण री खबर सुण आखो गाम हरखियो। महावीर री पुत्री प्रियदर्शना अर जवांई जमालि पण भगवान रा दरसण नै आया अर वांकी इमरत वाणी सुणी। भगवान रो उपदेश सुणता ईं जमालि नै संसार सूं वैराग्य हुयगयो। मां-बाप रो मोह, आठ ईं राणियां रो प्यार, अर राजनिद्धमी रो लोभ

जमालि नै वैराग्य पथ पर बढ़ण सूं कोनो रोक सक्या । वी पांच सौ साधिया रै सार्गे महावीर रै चरणों में प्रव्रजित हुया । राणी प्रिय दर्शना (महावीर री बेटी) पण पति नै वैराग्य रै मारग पर बढ़ता देख संजम लियो ।

महावीर रा उपदेस घणा प्रभावी हा । सुणतां पाण लोगां नै आपई ई संमार री नश्वरता रो बोध व्हे जावतो । भगवान मिनखा नै दीक्षा लेवण खान्तर बाध्य नी करता अर नी कीनै दीक्षा सूं स्वर्ग में जावण रो लोभ देवता । वी तो सहज भाव सूं जीवन री सांची स्थिति री ओळखाण करावता । वा की बात सुण लोग कैवा लागता-भगवन ! आपरी बाणी सांची है, आत्महित करण आळी है । म्हां आपरै वतायोडा मारग पर चालण री इच्छा राखां ।

तीजो वरस :

जयन्ती रा सवाल :

वैसाळी सूं विहार कर भगवान कौसाम्बी पधारिया अर अठै चन्द्रावतरण चैत्य में विराजमान हुया । भगवान रै पधारवा रा समीचार सुण वैसाळी गणराज चेटक री पुत्री मृगावती, उण रो पुत्र उदायन अर उदायन री भुआ जयन्ती महावीर रा उपदेस सुणण खातर आया । जयन्ती भगवान सूं घणाइ सवाल पूछिया, जियां—

१. जयन्ती पूछियो—भगवन् ! जीव हळको अर भारी कियां हुवै ? प्रभु कह्यो—पाप करम करण सूं जीव भारी अर पापां री निवृत्ति सूं जीव हळको हुवै ।

२. जयन्ती पूछियो—भगवन् ! मोक्ष री योग्यता जीव में सुभाव सूं हुवै कै परिणाम सूं आवै ?

भगवान बोल्या—मोक्ष री योग्यता सुभाव सूं हुवै, परिणाम सूं नीं ।

३. जयन्ती पूछियो—भगवन् ! जीव सूतो आछो कै जागतो ?

भगवान बोल्या—कोई जीव सूतो आछो अर कोई जागतो । जो जीव अधरभी है, अधरम रो प्रचार करै, वीरो सूवणो आछो, जिसू वीका पाप करम बत्ता नी वधै । पण जो जीव धरम रो आचार-विचार राखै, धरम रो प्रचार करै, वीको जागणो आछो । वीकै जागणे सूं खुद रो अर बीजां रो हित हुवै ।

इण भांत जयन्ती भगवान सूं घणाई तात्विक सवाल पूछिया । वांका संतोष जनक उत्तर सुण जयन्ती नै विराग हुयग्यो अर वीं संजम ग्रहण करियो ।

कौसाम्बी सूं विहार कर'र भगवान सावस्ती पधारिया । अठै सुमनोभद्र अर सुप्रतिष्ठ दीक्षा लीवी । अठा सूं विहार कर'र महावीर वाणिज गांव पधारिया । आनन्द गाथापति नै श्रावक धरम रो उपदेस दियो अर अठैइज चौमासो पूरो कियो ।

चौथो बरस :

सालिभद्र नै वैराग :

वाणिज ग्राम सूं विहार कर'र मगध कांती होता हुया भगवान राजगृही पधारिया । अठै गोभद्र नाम रो एक सेठ हो । उण री पत्नी रो नाम भद्रा हो । उणां रो पुत्र, सालिभद्र घणो रूपाळो अर सुकुमार हो । बत्तीस रूपाळी राणिया रै सागै उण रो व्याव हुयो । सालिभद्र रा मां-बाप कनै अपार धन संगलि ही । ईं कारण वो दिन-रात भोग-विळास अर ऐस आराम में डूब्यो रैवतो ।

एकदा राजगृही में रतन कम्बळ रा वैपारी रतन कम्बळ बेचण खातर आयाहा । कम्बळ घणा मंहगाहा । इण कारण राजा श्रेणिक पण कम्बळ खरीदण सूं इनकारी करदी । कम्बळ री बिकरी नीं हुवण सूं वैपारी दुखी हुया । सेठाणी भद्रा नै जद वैपारियां रै आवण री ठा

पड़ी तो वीं मूंडे मांगयो धन दैय'र उणा सूं सगळा रतन कम्बळ खरीद लिया । कम्बळ कुल मिला'र सोला हा । ईं खातर एक-एक कम्बळ रा दो-दो टुकड़ा कर'र भद्रा आपणी बहुआं नै पग पूंछवा खातर दे दिया ।

राजा श्रेणिक नै जद आठा पड़ी के सगळा रतन कम्बळ सेठाणी भद्रा खरीद लिया अर उणां रा टुकड़ा कर'र बहुआं नै पग पूंछवा खातर दे दिया तो वानै घणो अचरज हुयो । उणा रै मन में जिज्ञासा हुई के इसी मुकुमार राणियां रो पति कितरो कोमळ व्हेला । इसा सेठ-पुत्र सूं जरूर मिलणो चाडजै । आ मोच'र राजा श्रेणिक भद्रा नै सदेसो मोकत्यो कै-म्हूं सालिभद्र सूं मिलणो चाऊं ।

भद्रा राजा रो सदेसो सुण राजी हुई । वीं राजा नै सपरिवार आपणै महलां तेडिया । राजा सपरिवार उठे पधारिया । सेठाणी भद्रा राजा रो खूब स्वागत-सत्कार करियो । सेठाणी रै महल री सुन्दरता अर साही ठाठ-वाठ देख राजा दंग रैपयो ।

सालिभद्र कदैई महलां सूं नीचे नीं उतर्यो हो । आज राजा उण रै महलां पधारिया हा । ईंखातर भद्रा वीनै राजा सूं मिलण खातर नीचे बुलायो । माता री बात सुण एक'र तो सालिभद्र नीचे आवण सूं ना कर दियो । पण भद्रा सालिभद्र नै समभावता कयो-आज आपणां स्वामी, आपणां नाथ पधारिया है । वी थारं सूं मिलणो चात्र है । तूं नीचे चाल'र उणा रा दरसण कर ।

'आपणा स्वामी ! ' 'आणा नाथ ! ' इसा सबद सालिभद्र पैनी बार सुणिया हा । वो सोचवा लाग्यो-म्हूं इत री धन-सम्पदा रो मालिक हूं । म्हनै आज ताईं किणी चीज रै अभाव रो अनुभव नी हुयो । फेळं म्हारै ऊपर कोई दूजो स्वामी है, नाथ है अर म्हूं उण रै अधीन हूं । ईं पराधीनता री गैह री ठेस सालिभद्र रै काळजा में लागी ।

सालिभद्र राजा श्रेणिक सूँ मिलण खातर नीचे आयो । राजपरिवार समेत राजा श्रेणिक सालिभद्र रै रूप अर वैभव ने देख राजी हुआ । परा सालिभद्र पर इण मुलाकात रो काँई असर नो पड़ियो । वी अबै इसो जीवन जीवणा चावता हा जठे साँची स्वतंत्रता मिलै अर क्रिणी रो अधीनता नीँ हुँवै ।

आतम कल्याण रै नारग पर बढ़ण री वारै मन में भावना जागी । वां नै विषय सुखां सूँ विरक्ति हुवण लागी । वी नित हमेस एक-एक राणी अर सुख-सेजाँ रो त्याग करण लागी ।

सालिभद्र नै त्याग मारग पर चालतां देख उणांरी छोटी बहन सुभद्रा नै घणो दुख हुयो । सुभद्रा उणीज गाँव रै घन्ना सेठ री पत्नी ही । एक दिन सुभद्रा नै उदास देख घन्ना सेठ उण नै उदासी रो कारण पूछियो । सुभद्रा बोली-म्हारो भाई सालिभद्र नित हमेस एक-एक पत्नी अर सुख-सामग्री रो त्याग कर भोग सूँ योग काँनी बढ़ र्यो है । आ बात कँवतां-कँवतां सुभद्रा रै आँख्या मांय आंसू आयरया ।

सुभद्रा री आँख्याँ मांय आसूँ देख घन्ना सेठ व्यंग्य सूँ बोलिया-थारो भाई कायर है । एक-एक स्त्री रो वारी-वारी सूँ त्याग करण आळो कदँ साधुपणो नी लैय सकै । इसा कमजोर मनोवळ रो पुरुष वैराग रै मारण पर नीँ चाल सकै ।

घन्ना सेठ रा अँ सबद सुण सुभद्रा परा व्यंग्य सूँ बोली-नाथ ! कँवणो सरळ है, करणो मुस्किल है । आप सूँ तो एक भी पत्नी नीँ छूटँ ?

सुभद्रा रा मजाक में कयोडा अँ सबद घन्ना रै हिरदय में गेहरो असर कररया । वीँ बोलिया-लो, आज सूँ म्हुँ सगळी पत्नियाँ अर धन सम्पत्ति रो त्याग करूँ अर आतम कल्याण खातर संजम मारग पर बढ़ण रो निश्चय करूँ ।

धन्ना री विरवित रा भाव जाण परिवार रा सै जणा वांनै भोग कांनी मुड़वा खातर घणा समझाया पर घन्ना जी किण री बात नी मानी । अबै वांरो मनोवळ घणो मजवूत हो । वी आपणै निर्णय पर सैठा हा ।

सालिभद्र (साला) अर घन्ना (वहनोई) दोन्यूं घर सूं निकळ'र महावीर कने आया अर श्रमण धरम री दीक्षा अंगीकार करी । दोन्यूं श्रमण तपस्या करता हुया वैभारगिरि पर अनजन व्रत धारण कर काळ धरम पायो ।

पांचमो वरसः

राजगृह रो चौमासी पूरो कर'र महावीर चम्पा पधारिया । अठै पूर्णभद्र जक्षायतन मे विराजिया । प्रभुरे आवण रा समाचार सुण अठारा महाराजा दत्त तपरिवार दरसण खातर आया । प्रभु री वाणी सुण राजकुंवर महाचन्द्र श्रावक धर्म अंगीकार करियो अर थोड़ै समे पाछै राजसी ठाठ नै छोड़'र श्रमण धर्म अंगीकार करियो ।

उदायन रो क्षमाभाव :

राजगृह रो चौमासो पूरो कर महावीर चम्पा सूं होता हुया वीतभय नगर पधारिया । अठै महाप्रतापी राजा उदायन राज करतो हो । उदायन तापस परम्परा नै मानवा आळो हो पण उणगी पत्नी राणी प्रभावती (वैसाळी गणराज चेटक री पुत्री) निग्रन्थ धरम नै मानवा आळी ही । उणरी प्रेरणा सूं राजा उदायन भी निग्रन्थ धरम नै मानवा लागो । निग्रन्थ धरम रै दया, समता, क्षमा जिंसा आदर्सो सूं प्रभावित हुयर उदायन पण आपणो जीवन में उण आदर्सो नै उतारण रो संकल्प करियो ।

उदायन रै क्षमा भाव रो एक अनूठो उदाहरण मिले । वी अवन्ती रै चण्डप्रद्योत जिंसा पराक्रमी राजा नै पराजित कर बंदो

बरायो । ईसू उदायन री चारुंमेर धाक जमगी । उदायन बाहुबळ में इज वीर नीं हो वो आतमबळ अर क्षमाभाव में पण घणो पराक्रमी हो । जद पजूसण परब आयो । वी जेल में जाय बंदी चण्डप्रद्योत सूं आपणै अपराधां री क्षमा मांगी । उदायन नै यूं क्षमायाचना करतां देख चण्डप्रद्योत कह्यो—म्हूं तो आपरो कैदी हूं, अपराधी हूं, पराधीन हूं । आ किसी क्षमा ? किणी नै गुलाम अर पराधीन बनार उणासूं क्षमा मांगणी क्षमा नीं, क्षमा भाव रो अपमान है । चण्डप्रद्योत रा अ सबद उदायन नै चुभग्या । बीरै हिरदै पर अणारो तेज असर हुयो । वी सोचण लाग्या—सांचैई म्हूं चण्ड सूं असली क्षमा नी मांग, क्षमा रो नाटक कर र्यो हूं । म्हूं विजयी हुयर आज अपराधी हूं उणनै बंदी बनार उणसूं माफी मांगणी सांचो क्षमा धरम कोनी । यूं सोच'र उदायन चण्डप्रद्योत नै कारागार सूं मुक्त कर दियो ।

उदायन री इण दया अर क्षमा भाव सूं चण्डप्रद्योत घणो राजी हुयो ! इण घटना सूं उदायन रै क्षमा भाव अर आध्यात्मिक भावनावां री चरचां सगळी जगां हुवण लागी । भगवान महावीर पण उण री आ बात जाणी ।

एकदा राजा उदायन पौषधशाला में बैठो-बैठो विचार कर र्यो हो कै वी गांव अर नगर धन्य है जठै प्रभु महावीर रा चरण पडै अर वी लोग धन्य है जै उणारा दरसण कर बांकी अमरत वाणी सुणै । वो सोच'र्यो हो कदाच भगवान महावीर वीतभय नगर पधारै तो म्हूं पण उणा रा दरसण कर आपणो मिनख जमारो सफल बराऊं ।

भगतां रै हिरदा री बात भगवान जाणै । महावीर उदायन रै मन री भावना जाण आपणै शिष्य समुदाय सागै वीतभय नगर पधारिया । चम्पा सूं वीतभय नगर घणो अळगो हो । मारग में

रेगिस्तान पड़तो हो । गरमी रा दिन हा । कोमां दूर ताईं वसती नों ही । भूख अर तिम सूं साद्युआं नै घणी परेसानी हुई । पण से तकलीफां उठा'र भी महावीर वीतभय नगरी पधारिया । उदायन प्रभु रा दरसण करिया । उणांरी अमरतवाणी सुणी । अबै वीनै राजकाज सूं मोह नी र्यो । वी राजपाट त्याग'र मुनि वणण रो संकल्प लियो । वीरै अभीचि कुमार नाम रो पुत्र हो पण वीं राज रो भार उणानै नी मूंप्यो । वी मन में सोचियौ कं जिण राज नै वंधन समभ'र म्हूं उणारो त्याग कर र्यौ हूं उण राज रै वंधन में म्हूं आपणं पुत्र नै क्यूं फंसाऊं ? आ सोच वी राज रो वारिस भारणं केसी कुमार नै वणायो अर खुद महावीर कनै दीक्षा अंगीकार करी ।

मुनि उदायन दीक्षा ले'र कठोर तपस्या करण लागा । विचरण करता हुआ एकदा वी वीतभय नगर पधारिया । केसीकुमार रो मंत्री खोटा मुभाव रो हो । मुनि नै नगरी में आया जाण वी राजा रा कान भरिया—महाराज ! उदायन पाछा गृहस्थी वणार्या है । उणां री राज करण री मनसा है । वी आपनै दियोड़ो राज पाछो खोसणो चावै । ईं कारण मुनि वेस में ईज उणा रो काम तमाम कर देणो चाइजै । नी रेवैला वांस अर नीं वाजेली वांसुरी । राजा केसी मत्री रै वहकावा में आयग्यो । एक दिन वां भिक्षा में मुनि उदायन नै जहर दे दियो । भोजन मे जहर री ठा पड़ियां पाण भी वां नै नी तो राजा पर किरोव आयी अर नीं ईर्ष्या हुई । वां समता भाव रै सागै समांधि मरण अंगीकार करियो ।

छट्ठी बरस :

चुलनीपिता अर सुरादेव :

वाणज गांव सूं विहार कर महावीर वाराणसी कांती पधारिया । अठै कोष्टक चंत्य में विराजिया । चुलनीपिता अर सुरादेव वाराणसी रा नामी गृहस्थ हा । इणांरै कनै २४-२४ करोड़



सोनेया री सम्पत्ति अर गायीं रा आठ-आठ गोकुळ हा । महावीर नै नगरी में आया जाण बोन्हूँ सपरिवार दरसण खातर गया । अठै प्रभु री घरम देसना सुण चुलनोपिता अर सुगादेव आपणी सम्पत्तिरी निश्चित मर्यादा कर'र श्रावक धर्म रा वांरह व्रत ग्रहण करिया ।

अरजुनमाली री प्रसंग :

दाराणसी सूं आलंभिया नगरी होता हुया महावीर राजगृही पधारिया । अठै अरजुन नाम रो एक माळी हो । नगर सूं वारै उणरो एक बहुत बड़ो रूपाळो बाग हो । उणीज बाग में उणरै कुळ देवता मुद्गरपाणि जक्ष रो पुराणो भिन्दर हो ।

रोज री भांत एक दा परभातै अरजुन आपणी पत्नी बंधुमती रै सागै फूल तोड़ण खातर बाग में आयो । उणरै सागै नगरी रा छह वदमास पण बाग में घुस आया । बन्धुमती रै रूप नै देख वी उण पर मोहित हुयग्या । वां लोगां अरजुन नै रस्सी सूं एक पेड़ रै बांध दियो अर उणरी पत्नी रै सागै वेजां बरताव करियो । दुष्ट लोगां रै इण अत्याचार नै देख अरजुन नै घरणो किरोध आयो परण वो रस्सी सूं बंध्यो हुवण रै कारण लाचार हो । क्रोधावेस में आय वीं आपणै कुळदेवता मुद्गर पाणि जक्ष नै कोसणो सह कर्यो । वो कैवा लागो-महूँ थांणी बाळपणा सूं उपासना करतो आयो हूँ । आज म्हूँ मुसी-वत में पड़यो परण थां म्हारो कांई नदद नीं करो । म्हारो ओ अप-मान थां भाटा री मूरत दाईं ऊभा-ऊभा देखर्याहो । म्हनै लागै थांणा में अबै कांई सत नीं र्यो । अरजुन रो आ क्रोध भरी पुकार सुण जक्ष अरजुन रै सरीर में बड़ग्यो । वीमें घरणी ताकत आयगी । वीं बंध्योड़ी रस्सी तोड़ नाखी अर मुद्गर हाथ में ले'र विसयवासना में आंधा हुयोडा वदमासां अर आपणी पत्नी बंधुमती री खूब पिटाई करी । जिण सूं उणारो प्राणांत हुयग्यो । पर फेहूँ अरजुन रो किरोध सांत नीं हुयो । उणनै मिनखजात सूं इज नफरत हुयगी । वो जै मिनखां नै आपणी कांनी

आवतां देखतो उगां पर भूखा ना'र जियां टूट पडतो । अरजुनमाळी रै उगा आतंक सूं लोग उठी कर आणो-जाणो छोड़ दियो । राज री तरफ सूं अरजुन री कांती आणो-जाणो पर प्रतिबध लागग्यो ।

इणीज समय भगवान महावीर राजगृह पधारिया । हजारों लोग महावीर रा दरसण करणा चावता हा । पण अरजुन माळी रै डर सूं किणी मे उगा ठौड़ जावण री हिम्मत नो ही । आखर एक सरघावान श्रवक सुदरसण हडता रै सागै प्रभु दरसण खातर आगे कदम ब्रह्मायो । वो नगर सूं वा'रै आयो । चारुं कांती सन्नाटो हो । एक अकेलै मिनख नै सामै आवतां देख अरजुन माळी आग ववूलो हुयग्यो । उगाने मारण खातर वो मुद्गर लैय उगा ओर भगटियो । सुदरसण वीरी आ हरकत देख किंचित भी नी डर्यो । वो प्रभु रो सुमरण कर ध्यान मे सांत भाव सूं खडो हुयग्यो । पण ओ कोई ? अरजुन रो उठ्यो मुद्गर उठ्योई रैयग्यो । वी सुदरसण नै मारण री चणी कोसिस करी, पण मुद्गर हिल्योई कोनी ।

सुदरसण री हिम्मत अर धरम री मजबूती रै सामै अरजुन रो किरोव सांत हुयग्यो । वो उगा रै चरणां में पड़ग्यो अर आपणै कूर करमां रो प्रायश्चित करण लागो ।

अरजुन नै यूं पश्चाताप करतां देख सुदरसण बोलिया— अरजुन तूं घबरा मत । तूं साचैइ मिनख है, दानव कोनी । किणी कारण सूं थारै सरीर मांय राक्षसी प्रवृत्तियां हावी हुयगी है । अबै थारा मिनखपणो पाछो जागग्यो है । तूं म्हारै सागै चाल'र क्षमानिधि प्रभु महावीर रा दरसण कर । अरजुन सुदरसण रै सागै महावीर कनै आयो । प्रभु रा उपदेस सुण वींणी आख्यां सूं पश्चा-ताप अर करुणा रा आसूँ वेवण लाग्या । वी भगवान रै सामै सगळा पाप करमां रो प्रायश्चित कर मुनि धरम अंगीकार करियो ।

सातमो बरस :

श्रेणिक री जिज्ञासा :

भगवान महावीर राजगृही में बिराज्ख्या हा । एकदा श्रेणिक महावीर रै कनै बैठा हा । वीं समय एक देव कोढ़ी रो सरूप बणार आयो अर भगवान सूं बोल्यो-बेगा मरजो, पछै कोढ़ी राजा श्रेणिक कांनी मूंडो कर बोल्यो-जीवता रैवो अर अभयकुमार आड़ी देख'र बोल्यो-चावै जीवो, चावै मरो । आखिर में कालसौकरिक सूं बोल्यो-न मर, अर नीं जी ।

कोढ़ी रा इसा अंटसंट सबद सुण श्रेणिक नै रोस आयग्यो । राजा नै रोस में भरियो देख वी को सेवक कोढ़ी नै मारवा खातर दौड़ियो पण कोढ़ी तो बठा सूं ओफल हुयग्यो ।

दूजै दिन श्रेणिक वीं कोढ़ी रा कयोड़ा सबदां रो अरथ भगवान महावीर सूं पूछ्यो । प्रभु बोल्या-राजन् ! वो कोढ़ी नीं वो तो देवता हो । म्हनै मरण खातर कयो ईं को मतलब है कै म्हूं बेगो मोक्ष जासूं । म्हूं अठै देह-बन्धन में हूं । आगै म्हारी मुगति है । शाश्वत सुख है । थारौ जीवा खातर कयो-ईं रो मतलब है-थारो आगळो भव नरक रो है । इण भव में जठा ताईं थां जीवोला बठां ताईं थांनै सुख है । नरक में थांनै दुख भोगणो पड़ेला । अभयकुमार आपणै धर्माचरण अर व्रत-नियमां री आराधना सूं अठै भी आछो सुखी जीवन जी र्यो है अर इनै आगै भी सुख है । ओ देव गति रो अधिकारी बरौला । कालसौकरिक रा दोन्यूं भव दुखमय है । इण रो नी जीणो आछो है अर नीं मरणो ।

आ सुण श्रेणिक पूछियो-भगवन् ! म्हूं किण उपाय सूं नरक रा दुखां सूं बच सकूं ? भगवान बोल्या-जद कालसौकरिक सूं जीव-हत्या करणो छुड़वाय दे या कपिळा ब्राह्मणी सूं दान दिलाय

दे या पूणिया श्रावक री एक सामायिक मोल ले सके, तो थानै नरक गति सूं छुटकारो हुंय सकै ।

राजा श्रेणिक घणो कौसिसां करी पण नीं तो । कालसोक-रिक कसाई हत्या करणी बंद करी, नी कपिला ब्राह्मणी दान दियो अर नी श्रेणिक पूणिया श्रावक री सामायिक खरीद सक्या । पण इण घटना सूं श्रेणिक नै सांसारिक सुखां सूं विरक्ति हुयगी । वी ससार रो त्याग तो नीं कर सक्या पण वां लोगां नै त्याग मारग पर बढ़ण री प्रेरणा देवण खातर आ घोसणा कराई कँ जो कोई श्रमण धर्म अंगीकार करेला म्हु वीं नै राज री तरफ सूं सब भांत री मदद देऊंला । ईं घोषणा सूं प्रभावित हुय'र घणा ईं लोग दीक्षा लीवी ।

आठमो बरस :

चण्डप्रद्योत नै प्रतिबोध :

राजगृही सूं आलभिया नगरी होता हुया भगवान कौसाम्बी पधारिया । अठै महावीर युद्ध करण खातर आयोड़ा अवन्ती रा गजा चण्डप्रद्योत नै प्रतिबोध दैय'र मृगावती नै शील-संकट सूं मुक्त करी ।

चण्डप्रद्योत मृगावती रै रूप अर गुणां पर मुग्ध हुय'र वींनै आपणी पटराणी वणावणो चावतो हो । इण भावना सूं वी आ'र कौसाम्बी रै चारुं कांनी घैरो डाल दियो । उण समय कौसाम्बी पर लगोलग विपत्तियां आय री ही । एक कांनी दुसमन धावो बोलर्या हा । दूजी कांनी राजा सत्तानीक परलोकवासी हुयग्या हा । राज-कुंवर उदायन बाळक हो । राज रो सें काम राणी मृगावती नै देखणो पड़तो । इण मुसीबत में शील धरम पर आंच आवती जाण राणी हिम्मत नीं हारी । वा क्षत्रियाणी ही । वी में घणो साहस हो । वा आपणा प्राण दैय नै भी धरम अर शील री रक्षा करणी जाणती ही ।

संकट री घडी में वी चतुराई सूं काम लियो । दूत लारै चंडप्रद्योत नै वी संदेसो मोकल्यो कै आप जिण उद्देश्य सूं अठै पधारिया हो, उण रै अनुकूल समय कोनी । राजा रै देवलोक सूं सगळो राजपरिवार इण वगत दुखी है । आप अनुकूल समय देख'र पाछा आवो । राणी आपरी बात मान लैला ।

ओ संदेसो सुण चंडप्रद्योत सोच्यो-राणी कठै जाण आळी तो है नीं । राजा री मृत्यु रो सोग खतम हुवण पर वा न्हारी बात मान लै ला । आ सोच चंडप्रद्योत बिगर युद्ध करियां अवंती जावण री तयारिया करण लागो ।

इणीज समय भगवान महावीर धरम देसना देता हुया कौसाम्बी पधारिया । मृगावती नै प्रभु रै आवण री ठा पड़ी तो वा उणां रा दरसन करण आईं । चंडप्रद्योत पण भगवान रै समवसरण में देसना सुणवा आयो । प्रभु देसना दैय र्या हा—मिनख रो जीवन बेवती नदी रै जळ री दाईं अस्थिर अर चंचळ है । धन, दौलत, जोवन, सक्ति सब छणिक है । काम-भोग री इच्छावां अनन्त है । उणां सूं कदै तरपति नी हुवै । काम वासना रै दळदळ में फंसियोड़ा जीवां री हमेस दुरगति हुवै । आपणी इच्छावां पर अंकुस राखण आळो मिनख इज सांसारिक दुखां सूं मुक्त हुय सकै ।

प्रभु रै उपदेसां सूं प्रभावित हुय'र राणी मृगावती बोली - म्हारै दीक्षा लेवण रा भाव है । पण दीक्षा लेवण सूं पैला म्है अठै आयोडा राजा चंडप्रद्योत सूं आपणै अपराध खातर माफी मांगू हूं । क्यूं कै शील धरम री रक्षा खातर इणा सूं छळ कपट रो विवहार करियो अर चालाकी सूं काम लियो ।

मृगावती री आ बात सुण चंडप्रद्योत लाजां मरग्यो । वीं रो हिरंदय बदळग्यो । वो कैण लाग्यो—बैन ! म्हनै माफ करदे । थै

महनै भुलावै में राख'र म्हारो मारग दरमाण करियो । महनै पथ अष्ट हुवण सूं बचायो । थारो ओ उपकार म्हूँ कदैई नी भूलूँला । चण्ड-प्रद्योत नै सुमारग पर आयोड़ो देख मृगावती घणी राजी हुई । वीं कह्यो—आप म्हारा घरमभाई हो । महनै दीक्षा लेवण री आज्ञा दे ओ । उदायन री रक्षा रो सै जिम्मो आप पर है । चण्डप्रद्योत उदायन रो राजतिलक कियो अर मृगावती दीक्षा ले'र आतम कल्याण रै मारग पर आगै बढ़ी ।

**नवमो बरस :**

भगवान महावीर मिथिला होता हुआ काकंदी आया अर सहस्रात्र उद्यान में विराजमान हुआ । भगवान रै आवण रा समीचार सुण राजा जितसत्रु दरसण खातर आया । प्रभु रा उपदेस सुण वी घणा प्रवावित हुआ । वां नगरी में डिडोरो पिटवाय दियो कै जनम-मरण रा बन्धन काटवा खातर जो भी कोई राजी-राजी संजम लेणो चावै, वो लेवै । वी रै परिवार री देखभाळ म्हूँ खुद करूँला । भद्रा सार्थवाहिनी रै पुत्र धन्यकुमार री दीक्षा महाराज जितसत्रु घणा ठाट-बाट सूं करवाई । मुनि धन्यकुमार कठोर तपस्या कर'र अनसनपूर्वक सरीर रो त्याग करियो ।

काकंदी सूं विहार कर भगवान कम्पिलपुर पधारिया । अठै कुंडकौलिक श्रावक व्रत अंगीकार करिया । पछे महावीर पोलासपुर पधारिया । अठै कुम्हार सहालपुत्र श्रावक रा बारा व्रत अङ्गीकार करिया । पोलासपुर सूं प्रभु वाणिजगांव होता हुआ वैसाली पधारिया अर चौमासो अठैई पूरो करियो ।

**दसमो बरस :**

महावीर राजगृह रै गुणसीळ बाग में विराजमान हा । अठै प्रभु रा उपदेस सुण महासतक गाथापति श्रावक धरम अङ्गीकार

करियो । एक दिन रोहक मुनि रै मन में कैई संकावां उठी । वी भगवान रै कनै आया अर पूछियो—प्रभु ! लोक अर अलोक मांय सूं पैली कुरा अर पाछै कुरा है ?

भगवान कह्यो—लोक अर अलोक दोन्यूं शाश्वत है, ईं कारण पैली अर पाछै रो फरक कोनी ।

रोहक मुनि दूजो सवाल पूछियो—भंते ! जीव पैलां हुयो कै अजीव ? भगवान फरमांयो—लोक अर अलोक री भांत जीव अर अजीव परा शाश्वत है । इण कारण अणां में आगै-पाछै रो कांई भेद कोनी । इणीज भांत रोहक मुनि महावीर सूं कैई सवाल पूछ्या अर वां रो समाधान पायो ।

ग्यारमो बरस :

राजगृह सूं विहार कर'र भगवान कयंगळा नगरी पधारिया । अठै छत्रपळास उद्यान में विराजिया । कयंगळा रै नैडे श्रावस्ती नगर में स्कन्दक नाम रो एक परिव्राजक रैवतो हो । वो विविध सास्त्रां रो जाणकार हो । एकदा पिगळ निग्रंथ स्कन्दक सूं लोक री स्थिति रै वारै में सवाल पूछिया । स्कन्दक ऊणां सवालां रो जवाब नी दे सकयो । स्कन्दक नै ठा पड़ी कै भगवान महावीर छत्रपळास उद्यान में रुक्योड़ा है । वी इणां सवालां रो जवाब देय सकै । स्कन्दक भगवान रै कनै आयो अर वंदन नमस्कार कर'र आपणी जिज्ञासा परगट करी । स्कन्दक रा सवाल सुण भगवान फरमायो स्कन्दक ! लोक-चार भांत रा है—द्रव्यलोक, क्षेत्र लोक, काळलोक अर भावलोक । द्रव्य री अपेक्षा सूं लोक सांत हैं, क्षेत्र री अपेक्षा सूं असख्य कोड़ा-कोड़ि योजन विस्तार आळो है, काळ सूं लोक री नीं कदे सरुग्रात हुवै अर नीं समाप्ति, अर भाव री अपेक्षा सूं लोक अनन्त-अनन्त पर्यायां रो भंडार है । इण भांत लोक सांत परा है अर बर्णादि पर्यायां रो अन्त नीं हुवण सूं, अनन्त परा है ।

स्कन्दक फेरुं दूजो प्रश्न पूछियो—भते ! किसा मरण सूं जनम-मरण रा वन्धण टूटै अर किसा सूं वधै ?

भगवान उत्तर दियो—भरण दो भांत रा हुवै—बाळ मरण अर पंडित मरण । बाळ मरण सूं संसार वधै अर पंडित मरण सूं संसार घटै । क्रोध, लोभ, मोह आदि भावां सूं अज्ञान पूर्वक असमाधि सूं मरणो वाळमरण है अर सांत भाव सूं समाधिपूर्वक मरणो पंडित मरण है ।

**बारमो बरस :**

वाणिक गांव सूं विहार कर'र प्रभु ब्राह्मणकुण्ड आया अर वहुसाळ चैत्य मे विराजिया । अठै अणगार जमालि महावीर सूं अलग विचरवा री आज्ञा मांगी । पण महावीर की नीं बोलिया । महावीर नै मीन देख वो पांच सौ साधुवां सागै स्वतन्त्र विहार करण खातर निकळग्यो ।

वठा सूं गांवा-गांवा विचरण करता हुया, लोगा री संकावां रो समाधान करता हुया प्रभु चौमासो राजगृही में पुरो करियो ।  
**तेरमो बरस :**

राजगृह सूं विहार कर'र महावीर चम्पापुर पधारिया अर पूर्णभद्र उद्यान मे विराजिया । चम्पा रो राजा कोणिक भगवान रै आवण री बात सुण वड़ी सज-धज रै सागै वन्दण करण नै आयौ । भगवान महावीर री देसना सुण कैई लोग मुनि धरम अर श्रावक वरत अङ्गीकार करिया ।

**चवदमो बरस :**

चम्पा सूं भगवान विदेह कांनो विहार करियो । काकन्दी नगरी मे गाथापति खेमक अर धृतिधर प्रभु रै कनै दीक्षा अङ्गीकार करी । मिथिला में चौमासो पुरो कर विहार करतां भगवान पाञ्चा



चम्पानगरी पधारिया अर अठे पूर्णभद्र नाम रै चैत्य में बिराजिया । इण समय वैसाली में जुद्ध चालर्यो हो । इण में एक कांती अठारह गणराज हा अर बीजी कांती कौणिक अर उणारा दस भाई आपणो दळबळ सागै जूँ भू र्या हा । प्रभु रै आवण रा समीचार सुण राज-राणियां प्रभु रा दरसण करण नै आई । महावीर रा उपदेस सुण राणियां वां सूं पूछियो—भगवन् ! युद्ध में गयोडा म्हांका पुत्र राजी-खुसी कद घर आवैला ? उत्तर में दसूँ ईं पुत्रा रै युद्ध में मरण री बात सुण राणियां नै घणो दुख हुयो । वी सोचण लागी—ईं संसार में सबरो मरणो निश्चित है । वां री जीवन धन्य है जँ आपणो मिनख जमारा नै सार्थक करै । ईं बोध रै सागै विरक्त होँर दसूँ राणियां आर्या चन्दना रै कनै दीक्षा अङ्गीकार करी ।

पन्दरमो बरस :

गोसालक रो उत्पात अर पश्चाताप :

मिथिला सूं वैसाली कांती होय भगवान महावीर श्रावस्ती नगरी पधारिया । अठे राजा कौणिक रा भाई हल्ल, वेहल्ल (ज्यांरै खातर वैसाली में युद्ध होर्यो हो) भगवान रै दरसण खातर आया अर प्रभु रै उपदेस सूं प्रभावित हुयर मुनिधर्म अंगीकार करियो ।

मंखलिपुल गोसालक पण वां दिनां श्रावस्ती रै ऐड़ै नैड़ै घूमर्यो हो । हलाहल कुम्हारिण अर अयपुळ गाथापति गोसालक रा घणा पक्का भगत हा । गोसालक तेजोलब्धि अर निमित्तज्ञान जिसी सक्तियां पाय र घमंड में आयगयो । वीं श्रावस्ती री जनता माथै आपणो सिक्को जमाय राख्यो हो । बो सबानै कैवतो कै म्हुँतो आजीवक मत रो आचार्य हैं, तीर्थङ्गर हूँ । भगवान महावीर रै श्रावस्ती आवण रा समीचार जाण वो लोगां नै कैवा लागो—आजकाल श्रावस्ती नगरी में दो तीर्थंकर विचरण करै है ।—एक महावीर अर दूसो म्हुँ ।

गराधर इन्द्रभृति गौतम भिक्षा खातर जावता थकां लोगां रें मूंडा सूं दो तीर्थङ्करां री वात सुणी तो वां आयनै प्रभु सूं अरज कर पूछियो—भगवन ! आजकाल आवस्ती में दो तीर्थङ्करां रें होवण री चरचा चाल री है । काई गोसाळक सर्वाज्ञ अर तीर्थङ्कर है ?

भगवान बोल्या—गौतम ! गोसाळक तीर्थङ्कर कहलाबा लायक कोनी । वीरो हिन्दो राग-द्वेष अर अज्ञान, अहंकार सूं भगियोड़ो है । आज सूं चौबीस बरस पैलां ओ म्हारो शिष्य बणियो हो । पण उदण्ड अर स्वच्छन्द सुभाव रें कारण जगां-जगां ईं रो अपमान हुयो । एकर तो तापस वेस्यायन री तेज सक्ति सूं बळता-वळता म्है ईं नै बचायो अर इणनै तप अर साधना रें बळ सूं तेजोलब्धि पावण री विधि बताई । थोड़ी सी सक्ति अर लब्धि पाय ओ खुद नै तीर्थङ्कर केवण लागयो है ।

गोसाळक रें कानां में जद प्रभु रा कह्योडा अ सबद पहुँच्यातो वीनै गुस्सो आययो । वो ना रें निकळर आयो । वी श्रमण आनन्द नै भिक्षा खानर आवता देखिया । देखताई वी जोर सूं हाको पाड़ियो-पानन्द ! जरा ठहर । तू आपणै धर्माचार्य महावीर नै जाय कैय दीज कै वी म्हारै वारै में कोई वात नीं करे, चुप रेंवै । म्हारै सूं बोलणो या म्हारै वारै में काई वात करणी सूता सांप नै छेड़णी है । म्है देखर्यो, हूँ कै म्हारो आव-आदर देख वी म्हारै सूं ईर्ष्या करे है । म्हूँ अवार आय थां सवारी बुद्धि ठिकाणै लगाय दूला । इतरो कंवता-कंवता गोसाळक रा होठ फड़कवा लाग्या । वीरो चेहरो तमतमा उठ्यो । गोसाळक री वात सुण आनन्द महावीर कनै आया अर सगळी वात केय सुणायी । वां महावीर सूं पूछियो—भगवन ! गोसाळक आपणै तेज सू कीनै बाळ भी सकै काई ?

महावीर बोल्या—हाँ ! गोसाळक आपणी तेज सक्ति सूं क्णिणी नै बाळ सकै पण तीर्थङ्कर नै वो नीं जलाय सकै । यूँ तो

जितगे बल गोसाळक में है ऊं सूं कई गुणो बत्तौ बल निग्रंथ अण-  
गार में हुवै । पण अणगार क्षमासील हुवै, आपणी तपरी सक्ति रो  
दुरुपयोग नी करै । वी किणी नै कष्ट नीं देवै । महावीर सावचेत  
करतां आनन्द सूं कयो— गोसाळक अठै आवण आळो है । वो किरोध  
अर मान रा नसा में आंधो हुयोडो है । वो कांई भी खोटो काम कर  
सकै । ईं कारण वीसूं कोइ मुनि बात नीं करै । सैं मौन रैवे ।

उणीज ताळ लाल-पीळी आंख्या काढतो गोसाळक आपणै  
दळबळ सागै वठै आय पोंच्यो अर बोल्यो—महावीर ! थां सर्वज्ञ  
हुवता थकां भी म्हनै नीं ओळखो । थांरो शिष्य मंखळिपुत्र गोसाळक  
तो कदकोई मरग्यो । म्हूं तो कौडिन्यायन उदायी हूं । म्हारो ओ  
सातमो सरीरातर प्रवेस है । पण थां अणजाण बण'र अबार भी  
वाइज पुराणी रट लगार्या हो कै ओ म्हारो शिष्य गोसाळक है ।  
गोसाळक री आ बात सुण महावीर बोल्या—गोसाळक ! जिण  
भांत कोई चोर आपणै बचाव रो दूजो साधन नीं देख, एक तिनका  
री आड़ मे खुद नै लुकावण री कोसिस करै ! पण यूं चोर लुक  
नी सकै भलेई वो समझै कै म्हूं लुकयोडो हूं । इणीज भांत गोसाळक  
तूं गोसाळक ही है, पण तूं आपनै छिपावण खातर कूडो बोलै ।

प्रभु री आ बात सुण गोसाळक आपा सूं बारै व्हैग्यो । अर  
गुस्से में आय अटंसंट बकवा लागो । वीं कह्यो—थारो काळ नैडो  
आयग्यो है । तूं अबार जलबळ नष्ट हुय जावैला ।

गोसाळक रा रोस भर्या अ सबद सुण'र भी महावीर नै  
किरोध नी आयो । दूजा मुनि भी शांत हा । पण सर्वानुभूति अणगार  
गुरु रै प्रति इसा अपमान भरिया सबद सुण चुप नी रैय सक्या । वी  
बोल्या—गोसाळक ! भगवान महावीर नै तो थे आपणा गुरु मानिया  
हा । आज थूं इणां री निन्दा कर र्यो हो है ? आ चोखी बात  
कोनी । किरोध में विवेक नै मत बिसर ।

मुनि रा वचन आग में धी रो काम करग्या । गोसाळक मुनि पर तेजोलेस्या छोड़ दीवी, जिमूं मुनि रो शरीर बठैइ बळग्यो ।

गोसाळक फेहूं मन में आवे जूईं बोलर्यी । वीरां सबद सुण तुनक्षत्र नाम रा मुनि भी चुप नीं रेय सक्या । वीं उणनै समभावा लागा । गोसाळक वां पर भी तेजोलेस्या छोड़ी पण अब उण रो असर मन्दो पड़ग्यो हो जिमूं मुनि रो प्राणान्त तो नीं हुयो पण वी बुरी तरैऊं घायल हुयग्या । वानै असीम पीड़ा ही । काळ नै नैड़ो जाए वां समाधि मरण अंगीकार करियो ।

महावीर री धरम सभा में दो निरपराध मुनि इण भांत शहीद हुयग्या । चारूं कांनी सन्नाटो छाग्यो पण गोसाळक रो किरोध हाल ताईं मात कोनी हुयो । वी भगवान महावीर पर भी तेजोलेस्ये छोड़ी । वीने पूरो विसवास हो कै म्हारो तेजो सक्ति सूं महावीर रो शरीर पण नष्ट हुई जावला । पण प्रभु रा अपार तेज रै आगे गोसाळक री तेजोलेस्या कांई असर नी कर सकी । गोसाळक री छोड़्योड़ी तेजोलेस्या री किरणा महावीर रै शरीर री प्रदक्षिणा करनै पाछी फिरगी अर गोसाळक नै बाळती थकी वीरै शरीर में ईज प्रविष्ट हुयगी । इण सूं गोसाळक रै शरीर में जलण हुआ लागी । वो इण पीड़ा सूं घरणो दुखी हुयो ।

गोसाळक री आ हालत देख महावीर नै दया आयगी । वी बोल्या-गोसाळक ! थारी तेजोलेस्या रै प्रभाव सूं थूं खुद ही बळर्यो है । अब थारो काळ नैड़ो है । आपणो जीवण सुधारण खातर थूं आपणै कियोई खोटा करमां पर प्रायश्चित्त कर ।

महावीर गोसाळक रै कल्याण री कामना करर्या हा, पण वो अवार भी रोस मे भरयोड़ो हो । उण री व्यथा धीरे-धीरे बघती जाय री ही । हाय ! हाय करतो वो कोष्ठक चैत्य सुं निकळ'र

आपणौ आवास कांनी भागियो । बठै सरीर री जळण सांत कवार खातर वो कदैई गीली माटी रो लेप करतो अर कदैई पीड़ा भुलावण खातर पागळ दाईं नाचतो-गावतो । इण भांत घणी वेदना अर आकुळता सूं वीको समय बीत र्यो हो । ज्यूं-ज्यूं मौत री घडी नैडी आवा लागी, त्यूं-त्यूं गोसाळक । रो मन पळटा खाबा लागो । वो महावीर रै सागै कियोडे बुरे बरताव अर दो मुनियां री हत्या सूं दुखी होबा लागो । वीं अबै सच्चवाई नै मंजूर कर लो । वो आपणौ शिष्यां रै सामें कैयर्यो हो-महावीर जिन है, सर्वज्ञ है, म्हूं पाखंडी हूं, पापी हूं । म्हैं थानै अर सगळे संसार नै धोखो दियो । म्हारी आतमा नै धिक्कार है ।

जिन्दगी भर खोटा करम करण आळो गोसाळक आखरी समै में पश्चाताप री आग में बळ'र सोना री दाईं खरो हुयग्यो । वीं रो गुस्सो सांत हुयग्यो । वीं आपणौ मरण नै सुधार लियो ।

**रैवती रो निरदोस दान :**

कोष्ठक चैत्य सूं विहार कर'र महावीर मेढिया गांव कांनी पधारिया अर साल कोष्ठक चैत्य में बिराजिया । गोसाळक री तेजो-लेस्या रै प्रभाव सूं महावीर रै सरीर में तकलीफ रैवण लागी । वां नै रक्तातिसार जिसी बीमारी हुयगी । जिसूं वांको सरीर घणो कम-जोर हुयग्यो । महावीर रा सरीर नै देख'र लोग कैंवता कैं गोसाळक रै कह्यां मुताबिक कठै महावीर बेगोई आउखो पूरो नीं कर जाव । आ बात सालकोष्ठक रै नैडै मालुयाकच्छ में तप साधना करता हुया सीहा अणगार पण सुणो । महावीर री अस्वस्थता अर काळ धरम पावण री बात सुण सीहा अणगार रो ध्यान टूटग्यो अर वी चिन्ता में पड़ग्या ।

प्रभु महावीर नै आपणौ ज्ञानयोग सूं मालम पड़ी कैं सीहा मुनि म्हारी पीड़ा सूं घणा दुखी है । वां आपणौ अमरां सूं कह्यो-

थां जा'र सीहा मुनि नै अठै बुलाय लावो । वी म्हारो पीड़ा सूं दुखी हो'पर चिन्ता कर र्या है । प्रभु महावीर री आज्ञा पात्र श्रमण सीहा मुनि कनै गया घर वानै कह्यो-धर्माचार्य भगवान महावीर आपनै बुलावै है ।

सीहा मनि प्रभु रा चरणां में पांच'र वंदना करी । महावीर रै कमजोर तरीर नै देव वी उदास हो'र ऊभा रंयग्या । महावीर बोल्या-सीहा ! तूं चिन्ता मत कर । तेजोलेस्या रै प्रभाव सूं म्हूं मरण आळी कोनी । म्हूं दीर्घकाल ताईं इणीज पृथ्वी पर ओरें विचरण कहूंला । प्रा वात सुण'र सोहा अणगार बोल्या-भगवन ! म्हूं भी ओईज चावां । आप किरपा कर वताओ कं ईं रोग रो कांई हलाज है ?

प्रभु बोल्या-मेढिया गांव में रेवती गाथापत्नी रै कनै ईं रोग नै दूर करण री ओखध है । वीं कुम्हडै सूं वणियोड़ी ओखध म्हारै खातरइज त्यार करी है । पण श्रमण आपणै खातर त्यार कर-योड़ी कांई चीज लेवै कोनी-इण सूं वा तो म्हारै कळपै कोनी पण दूजी ओखध बीजोरापाक किणी दूजा मतलव सूं नणाई है । थां जाय नें वी सूं बीजोरापाक री मांग करो । वी दवा रै उपयोग सूं प्रा बीमारी ठीक हुय जावै ना ।

भगवान री आ वात सुण सीहा मुनि रेवती रै घरै गया अर वी सूं बीजोरापाक री मांग करी । मुद्ध ओखध रो दान देय'र रेवती आपणो भिनख जमारो सफल करियो ।

वीं दवा रै उपयोग सूं महावीर री तबियत ठीक हुयगी अर वीं पैला री भांत मुख सूं विचरण करण लागा ।

## सोलमो बरस

### केसी-गौतम मिलन

महावीर रा शिष्य इन्द्रभूति गौतम साधु मुनिया रै सागै विचरण करता हुया श्रावस्ती आया अर कोष्ठक उद्यान में बिराजिया। उणीज वगत भगवान पार्श्वनाथ री परम्परा रा केसीकुमार पण आपणै मुनि मण्डळ रै सागै तिन्दुक उद्यान में रुक्योड़ा हा । श्रावस्ती नगरी मांय केसीकुमार अर इन्द्रभूति गौतम रा साधु आपस में मिलिया । दोन्यूं रै आचार-विचार अर वेशभूषा में फरक हो । फरक देख उणांरै मन में संका हुई कै एक लक्ष्य री कांनी बड़बा आळी इण धरम परम्परा मे भेद क्यूं है ? मुनियां री आ बात जाए इण संकावा नै मिटावण खातर गौतम अर केसीकुमार दोन्यूं आपस में मिलण रो विचार करियो । गौतम केसीकुमार नै साधुपणां में बड़ा मान'र मुनि मंडळी समेत वांरै कनै गया । केसीकुमार गौतम मुनि नै आवता देख उणारो घणो आव-आदर करियो, बैठण खातर आसण दियो । दोन्यूं मुनियां रै मिलण रो ओ घणो आछो हस्य हो ।

मुनि केसीकुमार गौतम मुनि सूं घणा हेत सूं मिलिया अर पूछियो—मुनिराज ! पार्श्वनाथ चातुर्याम धरम कह्यो अर महावीर पंच महाव्रत रूप धरम । इणरो कांई कारण है ? गौतम मुनि बोलिया—महाराज ! धरम रै तत्त्वां रो निर्णय बुद्धि सूं हुवै । जी समय लोगां री जिसी मति हुवै बी समै विसोइ धरम रो उपदेस दियो जावै । पैला तीर्थङ्कर रै समय लोग बुद्धि रा सरळ अर जड़ हा । बांनै धरम रो तत्त्व समभावणो मुश्किल हो अर आखरी तीर्थङ्कर रै समै लोग बुद्धि रा वक्र (तार्किक) अर जड़ है । इणा सूं धरम रो पाळण करणो मुश्किल हुवै । ईं खातर भगवान ऋषभ अर महावीर दोन्यूं पंच महाव्रत (अहिमा, सत्य, अस्तेय, ब्रह्मचर्य अर अपरिग्रह) रूप धरम बतायो अर बीच रै तीर्थङ्करां रै समय लोग सरळ अर बुद्धिमान हुवै । थोड़े में बी सारी बातां समझ'र उणां रो पाळण कर

लेवै । ईं खातर वीचरा बाईस तीर्थङ्करां चातुर्याम धरम ( अहिंसा, सत्य, अस्तेय, अपरिग्रह) बतायो ।

इण भांत केसी मुनि इन्द्रभूति गौतम सूं घणाई तात्त्विक प्रश्न पूछिप्रा अर उणांरो संतोषप्रद उत्तर पाय'र घणा राजी हुया । वारी इण ज्ञान गोष्ठी सूं श्रावस्ती नगरी में ज्ञान अर शील धरम रो घणो विकास हुयो । सभा मे ज्ञान चरचा सुणणियाँ लोग धरम मारग कानी प्रवृत्त हुया ।

### राजर्षि शिव रो संशय—निवारण

भगवान महावीर मिथिला सूं बिहार कर'र हस्तिनापुर पधारिया । अठारा राजा शिव घणा संतोषी अर धरम प्रेमी हा । वानें सुखोपभोग सू घृणा हुथगी । राज्य रो त्याग कर'र जंगल में जाय वी बल्कलधारी तापस बराग्या अर घोर तपस्या करण लागा । लम्बी तपस्या सूं वानें विशेष ज्ञान उत्पन्न हुयो जिणसूं उणां में सात समन्दर अर सात द्वीपां ताईं देखण री खमता आयगी । वी लोगां नै कैवता—ईण संसार में सात समन्दर अर सात द्वीप ईज है, इण रै आगै कांयनी है ।

तापस री आ बात जद गणधर गौतम सुणी, वां भगवान महावीर नै पूछियो—प्रभु ! इण तापस री आ बात कठा ताईं साची है ?

प्रभु कयौ—इण पृथ्वी पर असंख्य द्वीप अर अनेक समन्दर है ।

तापस रै कानां में महावीर री आ बात पढ़ी तो वां सोच्यो—म्हारै ज्ञान में कमी है । सर्वज्ञ महावीर रो कथन सांचो है । इण भावना रै सागै वी महावीर कनै आय'र उणांरो उपदेस सुणियो । उपदेस सुणण सूं वारो संसय मिटग्यो अर, उणां सूं प्रभावित हुय री महावीर रा शिष्य बराग्या ।



भगवान महावीर रा. उपदेसां नै. सुरा'र धरम में सरधा राखणिया घणा लोगां मुनि धरम अङ्गीकार करियो । उणां में पोट्टिल अणगार रो नाम प्रमुख है । हस्तिनापुर सूं प्रभु 'मोका' नगरी होता हुआ बाणिज गांव पधारिया अर उठई चौमासो पूरो करियो ।

**सतरमो बरस :**

विदेह प्रदेश में विचरण करता हुआ महावीर राजगृही रै गुणसील चैत्य में पधारिया । अठे इण समै बौद्ध, आजीवक आदि सैं धरम परम्परावां रा साधु हा । अ लोग समय-समय पर भेळा हुय'र ज्ञान चरचा करता । एकदा इन्द्रभूति गौतम भगवान महावीर सूं पूछियो कै आजीवक म्हानै पूछै है कै जै थारां श्रावक सामायिक व्रत में हुवे अर उणारो कोई भांड (वरतन आदि) चोरी चलयो जावै तो सामायिक पूरी करियां बाद वै उणारी तलास करै कै नी, अर जै वे तलास करै तो आपणै भांड री करै या पराये री ?

भगवान महावीर इण प्रश्न रो उत्तर देवता फरमायो— गौतम ! वी आपणै भांड री इज तलास करै, पराये री नीं । सामायिक अर पौषधोपवास करण सूं उणारो भांड, अभांड नीं हुवै । जीं समै वी सामायिक आदि वरत में रैवै उणीज समै उणारो भांड, अभांड मानियो जावै ।

इण भांत प्रभु श्रावक धरम री विशेष जाणकारी दीवी । ओ चौमासो महावीर राजगृही में इज पूरो कियो ।

**अठारमो बरस :**

राजगृह रो चौमासो पूरो कर'र भगवान चम्पा कांनी सूं होता हुआ पृष्ठचम्पा नाम रै उपनगर में विराजिया । प्रभु रै आवण रा समीचार सुण पृष्ठचम्पा रा राजा शाळ अर युवराज महाशाळ

भक्ति भाव सूँ प्रभु रा दरसण करण नै आया । धर्मोपदेश सुणान सूँ दोन्यूँ नै संसार सूँ विरक्ति हुई अर वां आपणै राज रो भार भारौज गांगळी नै संभळाय दीक्षा अंगीकार करी ।

**कामदेव रो समभाव :**

पृष्ठचम्पा सूँ भगवान चम्पा नगरी रै पूर्णभद्र चैत्य में पधारिया । अठै कामदेव श्रावक प्रभु री धरम देसना सुणान खातर आया । धरम देसना फरमायां पछै भगवान श्रमणां सूँ कह्यो कै— कामदेव श्रावक गृहस्थपणां में रैय'र भी घणाइ उपसर्ग समभाव सूँ सहन करिया ।

एकदा जद वी पीपध में हा, आधी रात में एक मायावी देव, दैत्य, हाथी, सरप आदि रा विकराळ रूप धारण कर कामदेव नै धरम सूँ विचलित करण रा घणाई प्रयास किया परण कामदेव धरम मारग सूँ किंचित् भी नी डिगिया । उणांरी धरमनिष्ठा, सहनशक्ति अर समभाव दख दैत्य परास्त हुयग्यो अर आपणै असली रूप में आ'र वी कामदेव सूँ आपणै दुष्कृत्यां री माफी मांगी । कामदेव रो ओ समभाव श्रमणां खातर भी अनुकरणीय है अर ईं सूँ साधुमां नै प्रेरणा लेणी चाइजै ।

**दसारणभद्र नै आतमप्रोध :**

चम्पा सूँ विहार कर'र भगवान दसारणपुर पधारिया । अठा रो राजा दसारणभद्र प्रभु महावीर रो बड़ो भगत हो । वो चतुरङ्ग सेना अर राजपरिवार रै सागै वड़ी सजधज सूँ प्रभु वंदण नै निकल्यो । वी रै मन में ओ विचार आयो कै—म्हारै समान ठाट-वाट सूँ प्रभु-वंदण नै कुण आयो वेला ? आ बात इन्द्र जाण ली । दसारणभद्र नै नीचो दिखावण खातर इन्द्र उणसूँ वत्ती रिद्धसिद्ध रै सागै प्रभु-वंदण नै आयो । जद दसारणभद्र इन्द्र री आ रिद्ध-सिद्ध

देखी तो वीं रो गरब चूर-चूर हुयग्यो । परा वीं हार नीं मानी । वी रो दीठ बदळगी । वी नै आ बाहरी रिद्ध-सिद्ध निस्सार लागण लागी । वी आत्मिक रिद्ध-सिद्ध नै प्राप्त करण रो निश्चय कर लियो अर राजपाट छोड'र प्रभु महावीर कनै दीक्षा अङ्गीकार करी । दसारणभद्र री आ हिम्मत अर धरमनिष्ठा देख इन्द्र लाजां मरग्यो अर वां नै नमस्कार कर लौटग्यो ।

सोमिल री तत्त्व चरचा :

दसारणपुर सूं प्रभु वाणिजगांव पधारिया । अठै सोमिल नाम रो एक पंडित हो । वो सास्त्रां रो आछो जाणकार हो । वी रै पांच सौ शिष्य हा । महावीर जद दूतिपळास उद्यान में पधारिया तो सोमिल वांकै दरसण खातर आयो । वीं भगवान सूं घणाई द्वैत, अद्वैत, नित्यवाद, क्षणिकवाद जिसे गूढ़ दार्शनिक सवाल पूछिया । महावीर अनेकान्त सिद्धान्त सूं सगळा सवालां रा पडूतर दिया । सही समाधान पा'र सोमिल घणो राजी हुयो । वीं घणी सरघा सूं प्रभु रो धरम देसना मुणी अर प्रभु सूं श्रावक धरम अङ्गीकार करियो ।

उगणीसमो बरस :

अम्बड री निष्ठा :

कौसल, साकेत, सावत्थी होता हुया प्रभु पांचाळ कांनी पधारिया । अठै सूं विहार कर'र कंपिळपुर रै सहस्रां वन में विराजिया । अठै अम्बड नाम रो एक ऋषि सात सौ शिष्यां रै सागै रैवतो हो । वो घणो चमत्कारी महात्मा हो । वीं नै कैई लब्धियां प्राप्त ही । इण रै प्रभाव सूं जद वो भिक्षा खातर जावतो, सौ घरां सूं एकै सागै आहार लेवतो वी रो सरूप लोग देखता । इन्द्रभूति गौतम जद आ बात सुणी तो 'वां भगवान सूं पूछियो - भगवन् !

अम्बड़ ऋषि री आ वात कठाताईं सांची है ? भगवान पडूत्तर दियो— गौतम ! अम्बड़ परिव्राजक बेळे-बेळे री तपस्या करै । उणारी भावना मूढ है । ईं कारण ईं नै इण भात री लब्धियां प्राप्त है ।

महावीर रै आवण री खबर सुण अम्बड़ आपणै शिष्यां सागै उणारा दरसण करण नै आयो । महावीर री धरम देसना सुण वो उणारै ज्ञान अर चारित सूं घणो प्रभावित हुयो । सब भांत री सक्तियां हुवता थकां भी सरळ परिणामां रै कारण वी महावीर सूं श्रावक धरम अंगीकार करियो । अर उणारो उपासक बणियो ।

**बीसमो बरस :**

भगवान वाणिजगांव रै दूतिपळास चैत्य में विराजमान हा । वां की धरम देसना सुणान खातर हजारों मिनख रोजीना आवता । एकदा भगवान पारसनाथ री परम्परा रा गांगेय मुनि भगवान महावीर री धरम सभा मांय आया । वा भगवान सूं जीव, सत, असत आदि रै वारै में कैई तात्विक सवाल पूछिया । महावीर सूं उणारो आच्छो समाधान पा'र वी घणा प्रभावित हुया अर महावीर रै धरम संघ मे सम्मिलित हुयग्या ।

**इक्कीसमो बरस :**

**मद्दुक रो तत्त्वज्ञान .**

भगवान महावीर वैसाळी सूं मगध कांनी विहार करता ह्या राजगृह रै गुणसील चैत्य में ठहरिया । अठै काळोदायी, सैलो-दायी आदि परिव्राजका रो आश्रम हो । एकदा भगवान रै पंचास्तिकाय (धरम, अधरम, आकास, जीव अर पुद्गल) सिद्धांत रै विसय ये अं परिव्राजक चरचा करर्या हा । इणोज वगत भगवान रै आणै

री बात सुण अठा रो एक श्रद्धावान प्रमुख श्रावक मद्दुक प्रभु दर-सरा जायर्यौ हो । चरचा करणियां पारव्राजकां नै मालूम हुयो कै मद्दुक नै भगवान महावीर रै सिद्धान्तां रो आच्छो ज्ञान है तो उणां मद्दुक सूं घणाई तात्त्विक प्रश्न पूछिया । मद्दुक सगळां प्रश्नां रो तरक संगत उत्तर दियो ।

मद्दुक रै इण तत्त्वज्ञान री महावीर पण घणी प्रशंसा करी । ओ चौमासो महावीर राजगृही में ही पूरो करियो । अठै प्रभु री धरम देसना सुण लोगां घणाई व्रत-नियम अङ्गीकार करिया ।

बाइसमो बरस :

पेढालपुत्त उदक री जिज्ञासा :

राजगृही सूं जुदी-जुदी ठौड विचरण करता हुया प्रभु पाछा राजगृही पधारिया अर गुणसील चैत्य में विराजिया । प्रभु सूं आपणी तात्त्विक संकावां रो समाधान पा'र काळंदायी तैर्थिक घणा राजी हुया । वां भगवान सूं उपदेस सुणारा री इच्छा परगट करी । महावीर रै उपदेसां सूं प्रभावित हुयर वी निग्रंथ धरम मे दीक्षित हुया ।

एकदा प्रभु महावीर नाळन्दा रै हस्तियाम उद्यान में ठहरियोडा हा । अठै पार्श्वपत्य श्रमण पेढालपुत्त उदक री भेट इन्द्रभूति गौतम सूं हुई । उदक गौतम सूं बोल्या-म्हारै मन में थोड़ी संकावां है । आप उणांरो समाधान करो । गौतम उदक रा लाम्बा-चौडा प्रश्नां रो सांति रै सागै समाधान करियो । इतरा में अठै पार्श्वपत्य परम्परा रा बीजा स्थविर पण आयग्या । वी भी चरचा सुणण लागा । उदक आपणी संकावां रो समाधार पा'र बिगर आवआदर करियां अर बिगर बोल्यां वठा सूं जावा लागा; तद गौतम कह्यो-

थां विगर अभिवादन करियां उठ'र जाय'र्या हो । कांई थानै मामूली शिष्टाचार रो ज्ञान कोनी ?

गौतम रै इण स्पष्ट अर मार्मिक कथन सूं उदक वठे रुक'ग्या अर बोल्या—हां मुनिवर ! म्हनै इण धरम व्यवहार रो ज्ञान नी हो । अरवै म्हूं आपरै कथन पर सरघा राखर चातुर्याम धरम परम्परा सूं पंच महाव्रतिक धरम मार्ग अङ्गीकार करणो चाळूं । उदक री उत्कट जिज्ञासा देख, गौतम उदक नै महावीर कनै लेय'ग्या । उदक प्रभुरी आज्ञा पाय वारै धरम संघ में सम्मिलित ह्या ।

तेइसमो वरस :

चौमासो पूरो कर'र भगवान नाळन्दा सूं विहार कर'र वाणिजगांव रै दूतिपळास चैत्य में पधारिया । ओ गांव वराज-वैपार रो आछो केन्द्र हो । अठ सुदर्शन नाम रो एक बडो वैपारी हो । वो प्रभु रा अमृत वचन सुणण नै आयो । वणी भगवान सूं कई तात्त्विक प्रश्न पूछिया । इणारो उत्तर देवतां प्रभु सेठ नै वीरै पूरव भव रो सगळो हाल सुणाय दियो । भगवान रै मुख सूं वीत्यौड़ै भवां रो हाण सुण सेठ रो अन्तरमानस जाग'ग्यो । वीं नै आतमसरूप रो बोध ह्यो अर वी महावीर सूं श्रमण धरम अङ्गीकार करियो ।

गाथापति आनन्द अर गणधर गौतम :

गणधर गौतम महावीर री आज्ञा लेय'र वाणिजगांव मे भिक्षा खातर पधारिया । वी भिक्षा लेय'र जद पाछा लौट'र्या हा तद वां लोगां सूं आनन्द गाथापति रै संथारा री चरचा सुरी । वी आनन्द श्रावक नै दरसण देवण खातर कोल्लाग सन्निवेश पधारिया ।

इन्द्रभूति गौतम नै आया देख आनन्द घणा राजी ह्या ।

चरणा वंदन करने वी बोल्या—भगवन् ! गृहस्थी नै काई अवधिज्ञान हुय सकै ।

गौतम कह्यो—हां ! हुय सकै ।

आनन्द बोल्या—म्हनै अवधिज्ञान हुयग्यो । म्हूँ पूरब, पश्चिम अर दखण दिसा में लवण समुद्र रै पांच-पांच सौ जोजन ताई, उत्तराध में हिमवत पर्वत ताई, ऊर्ध्वलोक में सौधर्म देवलोक ताई, अर अधोलोक में लोलच्चुअ नाम रै नरकावास ताई रा सगळा पदारथ देखूं हूं ।

इण पर गौतम बोल्या—आनन्द ! गृहस्थी नै अवधिज्ञान हुवै तो जरूर. पण इतरी दूरी रो नी हुवै । थानै इण मिथ्या कथन पर आलोचना करणी चाइजै ।

गराघर गौतम रा अँ सबद सुण विनयपूर्वक दृढ सबदां में आनन्द बोल्या—भगवन् ! म्हूँ जो भी काई कैयर्यो हूं वो यथार्थ अर सांच है । आप इण नै भूठ मत समझो । भूठ बोलण रो प्राय-श्चित्त म्हनै नी, आपनै ईज करणो पड़ैला ।

आनन्द री आ बात सुण गौतम दुगध्या में पड़ग्या । वां महावीर रै कनै आय सगळी बांत बताय दी । गौतम री बात सुण महावीर कह्यो—गौतम ! आनन्द रो कैवणो सांचो है । थां वीकै सत्य नै असत्य बतायो है । आ थारी गलती है, ईं वास्ते थां बेगासा' आनन्द रै कनै जाओ अर वींसू माफी मांगो ।

परम सत्य रा खोजणहार गौतम पग पाछा फेरिया अर आनन्द रै कनै जा'र वीसू माफी मांगी । एक श्रावक रै साम्हे श्रमण-संघ रा सबसूँ बड़ा मुनि नै यूँ माफी मांगता देख आनन्द गद्गद् हुयग्या अर मन में सोचण लागा—निग्रंथ धरम में सांच रो कित्तो महत्त्व है ।

वीस बरसां ताईं गृहस्थ धरम री सुद्ध आराधना कर'र  
आनन्द समाधिपूर्वक देह त्याग करियो ।

चौबीसमो बरस :

वेसकीमती भावरतन :

वैसाळी रो चौमासो पूरो कर'र महावीर कोसळ नगरी रै  
ऐडै-नैडै विचरण करता हुया साकेतपुर पधारिया । अठै जिनदेव  
नाम रो एक बड़ो वैपारी हो । एकदा वो विराज-वैपार खातर कोटि  
वग्स नगर गयो अर अठा रा राजा किरातराज नै कीमती रतन अर  
गंगा आदि निजर करिया । वानै देख राजा बोल्या-इसा रतन कठै  
पैदा हुवै ? राजा री आ वात सुण जिनदेव बोल्यो-राजन् ! म्हारै  
देस में इण सूं भी बत्ता कीमती रतन पैदा हुवै । किरातराज रै मन  
में इसा रतना आळा देस नै देखण री इच्छा हुई । जिनदेव साकेतपुर  
रा राजा नै इण वात री खबर दीवी । पछै किरातराज जिनदेव रै  
सागै साकेतपुर आया । वठै वां दिनां भगवान महावीर आयोड़ा  
हा । राजा सञ्जय अर हजारों री तादाद मे घणाई लोग प्रभु दरसण  
खातर आया हा । नगर में आ भीडभाड अर चहळ-पहळ देख  
किरातराज नै घणो इचरज हुयो । वी जिनदेव सूं पूछियो-सार्थवाह !  
अ इतरा मिनख कठै जायर्या है ? जिनदेव पडूत्तर दियो-राजन् !  
रतना रो एक बड़ो वैपारी अठै आयो है । वो सवसूं बढिया बेस-  
कीमती रतना रो घणी है । जिनदेव री वात सुण किरातराज रै  
मन में उण वैपारी सूं मिलण री जिज्ञासा हुई ।

जिनदेव अर किरातराज दोन्यूं महावीर (ज्ञान, दर्शन चारित्र  
इण तीन रतनां रा धारक) री धरम सभा में गया । वठै जा'र प्रभु  
रा चरणों में वंदनां-नमस्कार करनै, उणां सूं किरातराज रतना  
रै प्रकार अर कीमत रै बारै में पूछियो । महावीर बोल्या-देवानुप्रिय !  
रतन दो भांत रा हुवै । एक द्रव्य रतन अर दूजा भाव



रतन तीन भांत रा हुवै—(१) दर्शन रतन (२) ज्ञान रतन (३) चारित्र्य रतन। अँ रतन घणा प्रभावशाली है। जै कोई इगां वै धारण करै वीरो ओ लोक अर परलोक दोन्युं सुधर जावै। द्रव्य रतनां रो प्रभाव सीमित है। वीसूँ वाहरो चमक-दमक रैवै। पण भाव रतनां सूँ अन्तरमानस जगमगा उठै अर सांचै सुख-सान्ति री अनुभूति हुवै।

भगवान री रतनां त्रिषयक आ चरत्रा मुण किरातराज घणा प्रभावित हुयो। वीं भगवान सूँ प्रार्थना करो—प्रभु ! म्हनै भाव रतन प्रदान करो। प्रभु महावीर उणनै आत्म कल्याण रो मारग बतायो अर वो उणां रै श्रमण संघ मे दीक्षित हुयो।

पच्चीसमो वरस :

कालोदायी रा प्रश्न :

मिथिला नगरी में चौमासो पूरो कर'र भगवान ऋगघ कांनी सूँ विहार करता राजगृह पधारिया अर गृणसील चैत्य में विराजिया। अठै कालोदायी श्रमण प्रभु सूँ कई संकावां रो समाधान करियो। वां प्रभु सूँ पूछियो—भगवन् ! जीव खुद अमुभ फल देण आळा करम किरा भांत करै ?

भगवान बोलिया—कालोदायी ! ज्यूँ दूसित पकवान अर मादक पदारथ सेवन करती वगत घणा रुचै अर खावणियां लोग सुवाद नें मस्त हो'र वां सूँ हुवण आळा नुकसान बीसर जावै, पण उणारो नतीजो घणा खोटो हुवै। सेहत पर बुरो प्रभाव पडै। इणीज भांत जद जीव हिंसा, भ्रूट, चोरी जिंसा पाप करम करै अर राग-द्वेष रै बशीभून होय क्रोध, मान, माया, लोभ जिंसी प्रवृत्तियां में डूब्योड़ो रैवै, उण ताळ अँ सगळा काम घणा रुचिकर अर मन मोदण लागै पण इगा सूँ बंध्योड़ा करम घणा अनिष्टकारी हुवै। अर करता नै भोगणा ईज पडै।

काळोदायी फेर दूजो प्रश्न पूछियो-भगवन ! जीव खुद सुभ फल देण आळा करम किए भांत करै ?

महावीर बोल्यो-काळोदायी ! ज्यूं रोग री दवा कइवी हुवण पर भी मरीर नै फायदो पोचवै, उणीज भांत सत्य, अहिंसा, शील, क्षमा अर अलोभ जिमी प्रवृत्तियां व्यवहार मे थोड़ी भारी लागै पण आगे उणां रो परिणाम घणो सुखदायी हुवै ।

उण भांत काळोदायी प्रभु दूं औरुं कैई प्रश्न पूछिया अर उणां रो आछो समाधान पा'र वो सतुष्ट हुयो ।

छाईसमो वरस :

गांव-गांव विहार करता हुया प्रभु महावीर राजगृही पधारिया अर गुणमील चैत्य में विराजिया । गणवर गांतम प्रभु सूं घणाई तात्त्विक प्रश्न पूछिया अर उणारो समाधान पायो । इणीज वरस में अचळभ्राता अर मेतार्य गणवर घनघन कर निर्वाण प्राप्त करियो । ओ चौमासो भगवान नाळन्दा में पुरो कियो ।

सत्ताइसमो वरस :

नाळन्दा सूं विहार कर'र प्रभु विदेह जनपद कांनो होता हुया मिथिला नगरी पधारिया अर मणिभद्र चैत्य में विराजिया । अठारा राजा जितसत्रु प्रभु दरसण करण नै आया । महावीर री धरम देसणा सूं लोग घणा प्रभावित हुआ । इन्द्रभूति गौतम सीर-मंडळ, उणरै भ्रमण, प्रकास, उण रै क्षत्र आदि रै बारै में घणाई प्रश्न पूछिया ।

अट्ठाइसमो वरस :

मिथिला सूं विहार कर प्रभु महावीर विदेह रै गांवा-गांवा में विचरण कर अनेक सरघावान लोगां नै धरम देसना दीवी । कैई लोग अमण धरम मे दीक्षित हुया अर कैई श्रावक व्रत अङ्गीकार करिया । ओ चौमासो पण महावीर मिथिला में ईज पुरो कियो ।

गुणतीसमो बरस :

महासतक अर रेवती :

मिथिला सून विहार कर'र मगध कांनी होता हुया प्रभु राज-  
गृही पधारिया अर गुणसीळ चैत्य में बिराजिया । वां दिनां प्रमुख  
श्रावक महासतक अनसन व्रत कर राख्यो हो । संयम अर तप सुद्धि  
रै प्रभाव सून वीनै अवधिज्ञान हुयग्यो ।

महासतक री पत्नी रेवती दुष्ट प्रकृति री ही । वीरी धरम  
मे रुचि नी ही । महासतक री तपसाधना अर धरम क्रिया सून वा  
खुस नी ही । एक दिन पौषधशाला में जा'र गुस्से में आय वीं महा-  
सतक नै खरी खोटी सुणाई, जिसून महासतक रो ध्यान टूटग्यो ।  
वो रेवती रै इण बैवार सून घणो दुखी हुयो अर बोल्यो—रेवती !  
तू इसी खोटी चेष्टा क्यूं कर री है ? खोटा करमां रो आछो फल  
नीं मिलै । तू इसा खोटा करम करण सून सात दिनां माय अलस  
रोग सून दुखी हुय'र असमाधि भाव सून मरेली । महासतक रा अ  
वचन सुण रेवती डरगी । वा सोचण लागी—महासतक नै सांचैई  
म्हारै पर किरोध है । कुण जाणै म्हनै और कांई दण्ड मिलसी ?  
आ सोचता-सोचता रेवती उठा सून व्हीर हुयगी । महासतक री बात  
सांची निकळी ।

महासतक रै ध्यान सून विचलित होणै री बात जद भगवान  
महावीर जागी तो वी गणधर सून बोल्यो—गौतम ! अठे म्हारो  
अन्तेवासी महासतक पौषधशाला में अनसन व्रत में है । वीनै रेवती  
बुरा सबद कया है जिसून रूष्ट हो वीं रेवती नै असमाधि मरण जैड़ी  
खगी बात कही है । श्रावक महासतक नै ऐडा सबद नीं बोलणा  
चाइजै । थां जा'र उणानै कैवौ कै आपणै इण कथन री वीनै आलो-  
चना करणी चाइजै ।

महावीर री आजा मान'र गीतम महासतक कनै गया अर उराने प्रभु महावीर रो संदेसो कह्यो । महासतक सदेस रे मुजब आपणै कियै पर पश्चात्ताप कर'र आतम सुद्धि कीवी ।

तीसयो बरस :

राजगृही सूं दिहार कर महावीर पावापुरी रै राजा हस्तिपाळ री रज्जुग सभा में पधारिया । ओ आखरी चौमासो अठे इज पूग हुयो । हजारों लोग प्रभु रा उपदेस सुगण नै आया । प्रभु कयो— हरेक प्राणी नै आपणो जीव वाल्हो है । मौत अर दुख कोई नीं चाव । भिनख नै दूजा रै सागै इसोईज बैवार करणो चाइजै जिसो वो खुद आपणै वास्तै चावै । ओईज सांचो भिनखपणो अर धरम रो मूळ ह ।

प्रभु रा उपदेस सुगण राजा पुण्यपाळ पण आयो हो । वा पिछली रात में देख्या आठ सुपना (हाथी, बानर, क्षीरतरु, कामळो, ना'र, कमळ, बीज अर घड़ो) रो फळ महावीर सूं पूछियो । महावार रो पडत्तर सुगण राजा पुण्यपाळ नै संसार सूं विरदित हुयगो । व राज नैभव छोड़'र साधु धरम अंझीकार करियो ।

चौमासे रा तीन महिना पूरा हुयग्या । चौथो महीनो चाल-र्यो हो । काती वद चवदस (अंमावस) रै दिन परभात र सम भगवान रज्जुग सभा में आखरी धरम देसना देय'र्या हा । प्रभु रै मोक्ष पधारण रो समय नैडो जाए इन्द्र आपणै परिवार रै सागै महावीर कनै आयो अर वांसूं आपणो उमर बढ़ावा साह'अरज करी । महावीर कहयो—उमर नै घटावा अर बढ़ावा री ताकत कियी मे कोनी । भगवान री आ बात सुगण इन्द्र मौन रैयग्यो । वो चन्दना-नमस्कार कर पाछो चलयोग्यो ।

सूल्यांकन :

इण भांत तीस बरसां ताईं केवळीचर्या में विचरण करतां हुया प्रभु महावीर विगर जातपांत, वरगभेद अर वर्णभेद सूं सैं

लोगां नै धर्म देसना दीवी । वारे प्रभाव सूं संस्कार सुद्धि रो एक नूंदो अभियान सरू हुयो । आतम तत्त्व रो सही ओळखाण कर कई परिव्राजक, राजा-महाराजा, सेठ-साहूकार महावीर रै धरम संघ मे सम्मिलित हुया । वारै संघ में चवदह हजार साधु, छतीस हजार साध्वियां, एक लाख गुणसठ हजार श्रावक अर तीन लाख अठारह हजार श्राविकावां हो ।

## ६ | परिनिर्वाण

आपणो आउलो नैडो जाण भगवान महावीर आपणो प्रिय शिष्य गौतम नै देवसरमा नाम रै ब्राह्मण नै उपदेश देवण ज्ञानर अळगा मोकळ दिया । प्रभु रै वेळे री तपस्था हो । इण दिन वी सोला पहर ताई घरम उपदेस देवता र्या । घणार्ई तात्त्विक रावाल जवाब हुया । इणीज रात मांय काती वद चवदस नै (अमादम) प्रभु चार अघाति करम रो नास कर'र ७२ वर्ष रा अवस्था में सिद्ध-बुद्ध मुक्त हुया । ज्ञान री अद्भुत ज्योत अचारणचक लुकीगी ।

अ समाचार चारुं कांनी फीलर्या । जद गौतम नै इण बात री ठा पड़ी तो वी शोक विव्हल हुय'र विलाप करण लाग्या-भगवन् आप ओ कांई करियो ? इण मीके आप म्हनै अळगो वयूं भेज दियो । म्हूं कांई टावर दाईं आपरं लारं पड़तो, आपनै मोक्ष पधारण सूं राक लेवता ? म्हूं अद्वै किरण नै वन्दणा कहूंला, किरण रै मामं आपणी सकावां राखूंला । देर ताईं यूं मोह ग्रस्त वणिया गौतम आंसूं डा ढळकावता र्ना । पण जद विश्वलता रो ओ तूफान धमग्यो तद वारंरी दीठ वदळगी । वी सोचण लाग्या—अरे ! म्हारो ओ मोह किरण रै खातर है ? भगवान तो वीतराग है. उणां रै प्रति ओ किसो राग ! वयूं नी म्हूं भगवान रै चरणां रो अनुसरण कहूं ? ओ सरीर तो जड़ है, इण नै छोडियां विगर मुक्ति कोनी । भगवान पण इण पार्थिव सरीर नै छोड़ मुगत पधारिया है । म्हनै भी इणीज मारग पर आगे वढणो है । इण भांत सोचण सूं गौतम रा मोहनीय करम हटग्या । वानं केवलज्ञान हुयग्यो ।

जिए रात में प्रभु महावीर रो निर्वाण हुयो वीं रात में नी मल्लवी, नौ लिच्छवी अठारह कासी-कोसल रा गणराजा पौषधव्रत में हा । वां कयौ-आज संसार सूं भाव उद्योत उठग्यो । अब म्हां द्रव्य उद्योत करांला । घणघोर अंधारी रात में देवतावां रतनां रो आलोक बिखेर'र अर मिनखां दीया जला'र सै ठौड़ चांनणो कर दियो । चारूं कांनी प्रकास रा पग मंडग्या । महावीर रो देहत्याग ओछब रो रूप ले लियो । इण भांत दीपमाळा री नू'ई भांत सूं सरु-आत हुई ।

महावीर रै निर्वाण रै सागै ससार री एक दिव्य ज्योत विलीन व्हेगी । तीस बरस री भरी जवानी में महावीर साधना रै कंटीनै मारग पर बढ़्या । साढै वारा बरसां वां कठोर तपस्या कीवी अर साधना रै बळ सूं केवलज्ञान प्राप्त करियो । केवळी बण्या पाछै तीस बरसां ताईं वां लोक कल्याण खातर उपदेस दे'र लाखां लोग नै संजम मारग कांनी वढण री प्रेरणा दीवी ।

महावीर रा उत्तराधिकारी गणधर सुधर्मा प्रभु महावीर रै प्रति भावभीनी श्रद्धांजलि अर्पित करतां कयौ-जियां हाथियां में ऐरा-वत, पसुवां में सिंह, नदियां में गगा, पक्षियां में गरुड़, पुष्पां में कमळ अर रसां में इक्षुरस श्रेष्ठ है, उणीज भांत तपस्वी ऋषि-मुनियां में भगवान महावीर श्रेष्ठ है ।

भगवान् महावीर आज सूनं ढाई हजार बरस पैलां जे उपदेस दिया वै आज भी तर्क अर विज्ञान री कसौटी पर खरा उतरै है । वांरा सिद्धान्त प्राणिमातर री स्वतंत्रता, समानता पुरुषार्थवादिता, वैचारिक उदारता अर मैत्री भाव पर आधारित है । वां में जो सत्य व्यजित है वो किणी एक जुग, काळ अर देश रो कोना वो सार्वजनीन अर सार्वकालिक है । जुग जुग तांई वांसू लोगां नै प्रेरणा मिलती रैवेली । उणां रा प्रमुख सिद्धान्त इण भांत है ।

### [ १ ] तत्त्व-चिन्तन

जैन धरम साधना रो धरम है । ओ अनादिकाल सूनं कलुषित आत्मा रै अशुद्ध रूप नै दूर कर'र शुद्ध रूप री प्राप्ति रो मारग बतावै । साधक नै संसार रै बंधण सूनं मुक्ति ह्वरण खातर आत्मा री शुद्ध अर अशुद्ध स्थिति अर उणारै कारणां रो ज्ञान जरूरी है । ओ ज्ञान तत्त्व ज्ञान कहीजै ।

नौ तत्त्व :

जैन दर्शन में मुख्य तत्त्व नौ मानीजै—(१) जीव (२) अजीव (३) पुण्य (४) पाप (५) आस्रव (६) वंध (७) संवर (८) निर्जरा अर (९) मोक्ष । इणांरो परिचय इण भात है —

१. जीव तत्त्व :

जीव तत्त्व रो नक्षण उपयोग-चेतना है । जिणमें ज्ञान अर दर्शन रूप उपयोग है, वो जीव है । जीव चेतन पण कहीजै । इणमें



सुख-दुख, अनुकूलता-प्रतिकूलता आदि भावां रै अणभव र खमता हुवै ।

जीव तत्त्व रा दो भेद हुवै—(१) मुक्त अर (२) संसारी जो जीव करम मळ सूं रहित हुयर ज्ञान, दरसन रूप अनन्त शु चेतना में रमण करै, वो मुक्त अर करमां रै कारण जनम-मरण रू संसार में मिनख, तिर्यच, देव अर नारक गतियां में घूमतो रैवै व संसारी कहीजै ।

ससारी जीवां मांय सूं देव ऊर्ध्व लोक में, मिनख अर पद् मध्यलोक में अर नारक अधोलोक में निवास करै । मिनख रै स्पर्शन (सरीर) रसन (जीभ) घ्राण (नाक) चक्षु (आंख) अर श्रोत्र (कान) अ पांच इन्द्रियां मन सहित हुवै, इण कारण वो मिनख कहीजै ।

जीव री पाच जातियां हुवै—(१) एकेन्द्रिय, (२) द्वीन्द्रिय, (३) त्रीन्द्रिय (४) चतुरिन्द्रिय अर (५) पंचेन्द्रिय ।

एकेन्द्रिय जीव रै सिर्फ एक इन्द्रिय सरीर हुवै । पृथ्वी, पानी अग्नि, वायु, वनस्पति रा जीव एकेन्द्रिय जीव है ।

द्वीन्द्रिय जीवां रै स्पर्शन (सरीर) अर रसन (जीभ) अ दो इन्द्रियां हुवै । लट, सख, जौक आदि जीव द्वीन्द्रिय है ।

त्रीन्द्रिय जीवां रै स्पर्शन, रसन अर घ्राण (नाक) अ तीन् इन्द्रियां हुवै । चींटी, कानखजूरा आदि जीव त्रीन्द्रिय है ।

चतुरिन्द्रिय जीवां रै स्पर्शन, रसन, अर घ्राण चक्षु (आंख) अ चार इन्द्रियां हुवै । मक्खी, मच्छर, टिड्डी, पतंगा आदि चतुरिन्द्रिय जीव है ।

पंचेन्द्रिय जीवां रै स्पर्शन, रसन, घ्राण, चक्षु अर श्रोत्र (कान) अ पांच इन्द्रियां हुवै । नारक, मनुष्य, देव, गाय, भैंस, कागला कबूतर आदि पंचेन्द्रिय जीव है ।

## २. अजीव तत्त्व :

जिण में चेतना नहीं हुवे जो सुख-दुख रो अनुभव नी करे वो अजीव कहीजै । अजीव तत्त्व जइ अर अचेतन हुवै । सोनो, चांदी, ईंट, चूनी आदि मूर्त अर आकास, काळ आदि अमूर्त जइ पदार्थ अजीव तत्त्व है । अजीव तत्त्व रा पाँच भेद हुवै—(१) पुद्गल, (२) धर्म, (३) अधर्म, (४) आकार अर (५) काल ।

जिण मे रूप, रस, गंध अर स्पर्श हुवै । जो आपस मे मिल'र आकार ग्रहण कर लें अर विळग हो'र परमाणु बण जावै वो पुद्गल है । इणा में मिलण अर अळग होवण नी आ क्रिया स्वभाव सून हुवै । दर्शन नी भाषा में मिलण नी क्रिया नै मघात अर विळग होणै नी क्रिया नै भेद केवै ।

धर्म तत्त्व गति मे सहायक हुवै । जियां मछली खातर पाणी अप्रत्यक्ष रूप सून सहकारी है, उणीज भांत जीव अर पुद्गल द्रव्यां रै गति करण मे धर्म सहकारी कारण है ।

क्रियायुक्त जीव अर पुद्गल नै ठहरण मे जो अप्रत्यक्ष रूप सून महायता देवें वो अधर्म द्रव्य है । धर्म द्रव्य अर अधर्म द्रव्य जीव अर पुद्गल द्रव्यां नै जबरदस्ती नी चलावै अर नी ठहरावै । अँ तो निमित्त रूप सून उणाग महायक बणै ।

जो सब द्रव्यां नै आधार देवें वो आकाश है । इण रा दो भेद लोकाकास अर अलोकाकास हुवै । जीव, पुद्गल, धर्म अधर्म, काल अँ द्रव्य जितरा आकाश मे ठहरै वो लोकाकास अर जठँ आकास रै सिवाय दूजा द्रव्य नी हुवै वो अलोकाकास कहीजै ।

जो द्रव्या रै परिवर्तन मे सहकारी हुवै वो काळ द्रव्य कही जै । घंटा, मिनट, समय आदि काळ राईज पर्याय है ।

अ जीव अर अजीव तत्त्व संसार रै निर्माण रा मुख्य तत्त्व है । संसार अनादि अनन्त है । ईं री रचना किणी ईश्वर नी करी ।

### ३. पुण्य तत्त्व :

पुण्य शुभ करम हुवै अर पाप अशुभ करम । अ दोन्युं अजीव द्रव्य है । शास्त्रीय दृष्टि सूं पुण्य रा नी भेद है । वी इण भांत है- (१) अन्न पुण्य, (२) पान पुण्य [३] लयन (स्थान) पुण्य, (४) शयन (शैया) पुण्य, (५) वस्त्र पुण्य, (६) मन पुण्य, (७) वचन पुण्य, (८) काय पुण्य अर (९) नमस्कार पुण्य । अर्थात् अन्न, पाणी, औखध आदि रो दान करणो, ठहरण खातर जग्यां देवणी, मन में आच्छा भाव राखणा, खोटा वचन नीं बोलणा, सरीर सूं आच्छा काम करणा, देव गुरु नै नमस्कार करणौ अर सगळा पुण्य करम है ।

### ४. पाप तत्त्व :

पापां रा कारण अनेक हुवै परा संक्षेप में अर अठारा मानी-जै । अ पापस्थान परा कहीजै । इणारा नाम इण भांत है- (१) हिंसा (२) भूठ (३) चोरी (४) अब्रह्मचर्य (५) परिग्रह (६) क्रोध (७) मान (८) माया (९) लोभ (१०) राग (११) द्वेष (१२) कलह (१३) अभ्याख्यान (भूठो नाम लगाणो, दोस देवणो । (१४) पैशुन्य (चुगली) (१५) परनिन्दा (१६) रति-अरति पाप में रुचि धरम में अरुचि) (१७) माया-मृपावाद, (कपट सूं भूठ बोलणो) अर (१८) मिथ्या दर्शन ।

व्यावहारिक दृष्टि सूं आ बात कहीजै कै पाप करण सूं नरक रो दुख मिलै, लोक में अपयश मिलै अर निन्दा हुवै । पुण्य करण सूं देवलोक रो सुख मिलै, अर लोक में यश, सन्तान, वैभव आदि री प्राप्ति हुवै । परा पूर्ण मुक्ति रै मारण पर बढ़णिया साधक खातर

पाप अर पुण्य दोनूँ हेय है । सुभ-असुभ ने छोड़'र सुद्ध वीतराग भाव मै रमण करणोइज अर्ध्यात्म रो लक्ष्य है ।

#### ५. आस्रव तत्त्व :

पुण्य-पाप रूप करमाँ रै आवण रो रास्तो आस्रव कहीजै । आस्रव रा पांच भेद इण भांत है- (१) मिथ्यात्व, (२) अविरति, (३) प्रमाद (४) कषाय अर (५) योग ।

मिथ्यात्व रो अरथ है विपरित सरधा राखणी, तत्व ज्ञान नी हुवणो । इण में जीव जड़ पदार्था में चेतना, अतत्त्व में तत्त्व, अधरम में धरम बुद्धि आदि विपरीत भावना रो प्ररूपणा करै ।

अविरति रो अरथ हुवै-त्याग रो अभाव, त्याग में अरुचि, भोग मे मुख अर उत्साह रो भावना ।

प्रमाद रो अरथ है-ग्रातम कल्याण खातर आच्छा काम करण रो प्रवृत्ति में उत्साह नी हुवणो, आलस्य, मद्य, मांस आदि रो सेवन करणो ।

वषाय रो अरथ है-क्रोध, मान, माया, लोभ रो प्रवृत्ति ।

योग रो अरथ है-मन, वचन काया रो शुभाशुभ प्रवृत्ति । योग दो भांत रा हुवै । सुभयोग अर असुभ योग । सुभ योग सूँ पुण्य रो बंध हुवै अर असुभ योग सूँ पाप रो ।

#### ६. बंध तत्त्व .

सुभ-असुभ करम जद आतमा रै सागै चिपक जावै तद वा अवस्था वव कहीजै । अँ बंध चार भांत रा हुवै—(१) प्रकृति बंध, (२) स्थिति बंध, (३) अनुभाग बन्ध अर (४) प्रदेश बन्ध ।

प्रकृति बंध करमाँ रै सभाव नै निश्चित करै । स्थिति बंध करमाँ रै काळ रो निश्चय करै । अनुभाग बंध करमाँ रो फळ निश्चित

करै अर प्रदेस बन्ध ग्रहण करियोड़ा करम पुद्गलां नै कमवेसी परिमाण में बांटै ।

### ७. संवर तत्त्व :

करम रै आवण रो रास्तो रोकणो संवर है । संवर आतमा रो राग-द्वेष मूलक असुद्ध वृत्तियां नै रोकै । संवर रा पांच भेद इण भांत है—

- (१) सम्यक्त्व—विपरीत मान्यता नी राखणी ।
- (२) व्रत—अठारह प्रकार रै पापां सूं बचणो ।
- (३) अप्रमाद—धरम रै प्रति उत्साह राखणो ।
- (४) अकषाय—क्रोध, मान, माया, लोभ आदि कषायां रो नास करणो ।
- (५) अयोग—मन, वचन, काया रो क्रियावां रो रुकणो ।

### ८. निर्जरा तत्त्व :

आतमा में पैलां सूं आयोड़ा करमां रो क्षय करणो निर्जरा है । निर्जरा आतम सुद्धि प्राप्त करण रै मारग में सीद्धियां रो काम करै । आ दो भांत री हुवै—(१) सकाम निर्जरा अर (२) अकाम निर्जरा । सकाम निर्जरा में विवेक सूं तप आदि रो साधना करी जावै । अकाम निर्जरा मे बिना ज्ञान अर सयम सूं तप साधना करी जावै । बिना विवेक अर सयम सूं करियोड़ो तप बाळ तप कहीजै । इण सूं करम निर्जरा तो हुवै, पण सांसारिक बधण सूं मुक्ति नीं मिलै ।

### ९. मोक्ष तत्त्व :

मोक्ष रो अरथ है—सगळा करमां सूं मुक्ति । राग अर द्वेष रो सम्पूर्ण नास । मोक्ष आतम विकास री चरम अर पूर्ण अवस्था है ।

इण अवस्था में स्त्री-गुरुप, पशु-रक्षी छोटा-बड़ा आदि रो काँई भेद नी रैवै । आतमा रा नगळा करम नष्ट हुवण पर वा लोक रै अग्र भाग मे पौत्र जावै । व्यावहारिक भाषा में उण नै सिद्धशिला कैवै । यूं मोक्ष कोई स्थान नी है । जिण भांत दीपक री लौ रो सुभाव ऊपर जावणो है, उणीज भाँन करम मुक्त आतमा रो सुभाव पण ऊपर उठण ( ऊर्ध्वगामी हूवण ) रो है । करमां सूं मुक्त हुवण पर आतमा आपणै सुद्ध सुभाव सूं चमकवा लागै । उणी रोइज नाम मुक्ति, निर्वाण अर मोक्ष है ।

मोक्ष प्राप्ति रा चार उपाय है—सम्यक् ज्ञान, दर्शन, चारित्र अर तप री आराधना । ज्ञान सूं तत्त्व री जाणकारी हुवै । दर्शन सूं तत्त्व पर सरघा वढै । चारित्र सूं करमां नै रोक्का जावै अर तप सूं आत्मा रै वध्योडा करमा रो क्षय हुवै । इण चारुं उपाय सूं जीव मोक्ष प्राप्त कर सकै । इण री साधना मे जाति, कुळ, वश आदि रो काँई बंधण कोनी । जो आतमा आपणै आतम गुणां नै प्रकट कर लेवै वा मोक्ष री अधिकारी वण जावै ।

## [ २ ] आतमा

भगवान महावीर आतमा नै अनादि, अनन्त अर अनासवान बताई । वारै मत में आतमा इज आपणै गुणां रो विकास कर परमात्मा वण जावै । वीजा दार्शनिकां री मान्यता है कै आतमा परमात्मा रो इज अंस है । वारै मुताविक जियां आग सूं एक चिन-गारी छिटकर न्यारी हुय जावै अर पाछी आग में मिल जावै, उणीज भांत आतमा अर परमात्मा रो सम्बन्ध है । पण भगवान महावीर आतमा रो स्वतंत्र अस्तित्व मानियौ अर कयो—आतमा जद करम मळ रो नास करर निर्विकार हुय जावै तद वा खुदइज परमात्मा वण जावै ।

प्रभु महावीर आतमा री ओळखाण करावतां कथौ—आतमा अमूर्त्त है। वा आंख्यां सूं देखी नीं जा सकै। वा शुद्ध चैतन्य स्वरूप है। सरीर में चेतना री अनुभूति आतमा रै कारण सूं इज है। करमां रै मुताबिक आतमा मिनख अर जिनावरां रो सरीर धारण करै अर उणां रै कारण इज कदै नारकी रो दुख भोगै तो कदै देवलोक रो सुख। आतमा इज आपणै सुख-दुख री कर्ता है अर वाइज उणां री भोक्ता।

महावीर री दृष्टि में आतमा अर सरीर जुदा-जुदा है। जठा ताईं आतमा संसार सूं मुक्त नीं हुवै वा एक सरीर नै छोड़' र बीजो सरीर धारण करती रैवै। भगवान महावीर परमात्मा री कल्पना सृष्टि री रचनाकरण आला रै रूप में नीं करी। वांरी दृष्टि सूं परमात्मा वीतरागी हुवै। वांनै संसार सूं कांई लेणो-देणो नीं। आतमा रो चरम विकास इज परमात्मा हैं। इण दृष्टि सूं जितरी आत्मावां तपसंयम रै मारग पर चाल' र आपणा करम क्षय कर देवै, वी सब परमात्मा वग जावै। परमात्मा बगियां पछै भी उणारो स्वतंत्र-अस्तित्व रैवै। किणी एक जोत में मिल' र वी आपणो अस्तित्व नष्ट नीं करै। स्वातंत्र्य बोध री आ मान्यता महावीर रै आतमवाद री खास विशेषता है।

महावीर री दृष्टि में आतमा अनन्त ज्ञान, अनन्त दर्शन, अनन्त चारित्र, अर अनन्त बळ री धरणी है। वींनै ओ बळ किणी बीजी शक्ति सूं नीं मिलै। वा खुद आपणी साधना सूं आपणै में छिप्यौड़ा इण बळ नै जागृत करै। चार घातिक करम (ज्ञानावरणीय, दर्शनावरणीय, मोहनीय, अर अन्तराय) आतमा री मूळ शक्ति रै स्रोत नै रोक लैवै। जद अँ घाती करम नष्ट हुय जावै तद आतमा रो विकास अर उणारी अनन्त शक्ति रो बोध हुवै।

### आतमा री तीन अवस्थावां

#### 1. बहिरातमा :

आतमा री तीन अवस्थावां मानीजै—बहिरातमा, अन्तरातमा

अर परमातमा ।

१ बहिरातमा :

बहिरातमा वा अरवस्था जिणमें आतमा जागृत नीहूवै, वीने आतमज्ञान नी हूवै । जीव, सरीर अर इन्द्रियाँ नैइज वा आतमा ममके ।

२. अन्तरातमा :

अन्तरातमा वा अरवस्था है जद जीव नै ज्ञानी पुरुसां रै सम्पर्क सूं आतमज्ञान हूवै । वी नै सरीर सूं आपणै अलग अस्तित्व रो भान हूवै । वा आ वात समझ जावै के जिण भांत म्यान अर तलवार एक नी है, उणोज भांत आतमा अर सरीर पण एक कोनी । अन्त-मूख आतमा सरीर नै पर पदारथ समझ' र उण पर मुग्ध नी हूवै । उण नै संसार अर उणरै पदार्थां सूं हर्ष अर विषाद नीं हूवै । उणनै इष्ट-सयोग में सुख अर इष्ट-वियोग में दुख नी हूवै । समभाव री जोत उणरै मानस नै जगमगावा लागै । राग-द्वेष रो भाव नष्ट हूय जावै । दुनियां री सै वस्तुआं अर घटनावां नै वा मध्यस्थ भाव सूं देखै ।

३. परमातमा :

परमातमा वा अरवस्था है जद आतमा नै अतीन्द्रिय ज्ञान हूय जावै । वा अनन्त सुख, अनन्त ज्ञान अर अनन्त सक्ति रो स्रोत वण जावै । उणमे किणी भांत रो विकार नी हूवै । वा परमानन्द-मयी अर विशुद्ध चैतन्य स्वरूप आळी हूय जावै ।

आ परमातम दसाइज परमब्रह्म है, जिनराज है, परम-तत्त्व है, परमगुरु, परमज्योति, परमतप, अर परम ध्यान है । जै इण सरूप नै जाण लियो वी सै कुछ जाण लियो अर जै इण सरूप नै नीं जाणियो वी सै कुछ जाण' र भी कांई नी जाणियो ।

[ ३ ] कर्म

विश्व रै विशाल रंगमंच पर निजर डालण सूं मालूम हूवै के इण में चारुकांती विविधता अर विषमता है । चार गतियां अर



चारासी लाख जीव योनियां में भ्रमण करण आळा जीव एक जिसा रूप अर शक्ति आळा कोनी । कोई मिनख है तो कोई पसु, कोई पंछी है तो कोई कीड़ा-मकोड़ा ।

मनुष्य गति में पण अनेक भांत री विषमतावां देखण नै मिलै । कोई मिनख हृष्ट-पुष्ट है तो कोई दुबलो-पातरो । कोई रूपाळो मनमोवणो है तो कोई कालो-कलूटो । कोई धनवान है तो कोई गरीब । कोई सूखी है तो कोई दुखी । कोई नीरोगी है तो कोई जनम-जात रोग आळो । प्रभु महावीर इण सगळी विषमतावां रो कारण आपणा-आपणा करमां नै बतायो । आच्छा करम रै बंध सूं मिनख नै सुख अर बुरा करमां रै बंधण सूं दुख मिलै ।

### करम रो सरूप

लोक व्यवहार अर सास्त्रां में करम सबद काम-धन्धा अर व्यवसाय करण रै अरथ में प्रयुक्त हुवै । खावण-पीवण, हलण-चलण आदि कामां में भी करम सबद रो प्रयोग हुवै । पण जैन दर्शन में करम सबद रो एक विशेष अरथ हुवै । संसारी जीव जद राग-द्वेष युक्त मन, वचन, काया री प्रवृत्ति करै तद आतमा में एक स्पन्दन हुवै जिसूँ वा चुम्बक री दाईं बीजा पुद्गळ परमाणुवां नै आपणी तरफ खीचै, अर वै परमाणु लोहे री दाईं उण सूं चिपक जावै । अ पुद्गळ परमाणु भौतिक अर अजीव हुवै पण जीव री राग-द्वेषात्मक मानसिक, वाचिक अर कायिक क्रिया रै द्वारा खींच'र आतमा रै सागै दूध-पाणी दाईं घलमिल जावै, आग अरलो हृपिण्ड री दाईं आपस में एकमेक हुय जावै । जीव रै द्वारा कृत (क्रिया) हुवण सूं अ कर्म कहीजै । कर्म बंध रा मूल कारण राग अर द्वेष है । राग-द्वेष री भावना रै वसीभूत हुय जै करम करै उण रो फळ वांनै अवस मिलै । आच्छा करमा रो फळ आच्छो अर बुरा करमां रो फळ बुरो मिलै ।

करम रा भेद :

आतमा रा मुख्य आठ गुण हुवै । इणांन आच्छादित करण सूं करम भी आठ प्रकार रा मानीजै (१) ज्ञानावरण (२) दरसनावरण (३) वेदनीय (४) मोहनीय (५) आयु (६) नाम (७) गोत्र अर (८) अन्तराय ।

इणा आठ करमां मांय सूं ज्ञानावरण, दरसनावरण, मोहनीय अर अन्तराय अँ चार घाती करम कहीजै अर वाकी रा चार वेदनीय, आयु, नाम अर गोत्र अघाती करम कहीजै । घाती करम आतमा रै सागै रँगै । अँ आतमा रै ज्ञान, दरसन, चारित्र, सुख आदि मूल गुणां रो घात करै । इण करमां नै नष्ट क्रियां विगर आतमा सर्वज्ञ अर केवळी नी व्रण सकै । अघाती करम आतमा रै मूल स्वह्य नै नष्ट नी करै । इणांरो असर केवल सरीर, इन्द्रिय, उमर आदि पर पड़ै । इणांरो सम्बन्ध इणीज जनमताई रैवै ।

१. ज्ञानावरण :

जो करम आतमा री ज्ञान शक्ति नै आच्छादित करै वो ज्ञानावरण करम कहीजै । ज्यूं आख्यां पर लाग्योड़ी कपड़ै री पट्टी देखण में बाधा डालै, उणोज भांत ज्ञानावरण करम आतमा नै पदारथ रो ज्ञान करण मे रुकावट डालै ।

२. दरसनावरण :

दरसनावरण करम आतमा री पदारथां नै देखण री शक्ति नै आच्छादित करै । ओ करम परेदार रै समान है जो राजा रै दरसन करण या मिलण में रुकावट डालै ।

३. वेदनीय ।

वेदनीय करम रा दो भेद हुवै—साता वेदनीय अर असाता वेदनीय । साता वेदनीय रै उदय सूं जीव सारीरिक अर मानसिक

सुख रो अनुभव करै अर असाता वेदनीय रै उदय सूं जीव दुख रो अनुभव करै । वेदनीय करम सैंत सूं पुत्योड़ी तलवार रै माफिक है । सैंत पुत्योड़ी तलवार री धार चाटतां समय जो छणिक सुख मिलै वो साता वेदनीय अर चाटतां वगत तलवार री धार सूं जीभ कटण रो जो दुख मिलै वो असाता वेदनीय । कैवा रो मतलब ओ कै संसार रा सगळा सुख दुख-मिश्रित है ।

#### ४. मोहनीय

मोहनीय करम दारू रै माफिक है । ज्यूं दारू मिनख री बुद्धि नै नष्ट करै अर वो बेभान हुय जावै, वीं नै हिताहित रो ज्ञान नीं रैवै, उणीज भांत ओ करम आत्मा रै ज्ञान सुभाव नै विकृत बणावै । उणमै पर पदार्थां रै प्रति ममत्व बुद्धि जगावै । आठ करमां माय मोहनीय करम सगळा सूं भयंकर अर ताकतवर है । ओ करमां रो राजा कहीजै ।

#### ५. आयु :

आयु करम री स्थिति सूं प्राणी जीवै अर उणरै नष्ट हुवण सूं जीव मरै । इण करम रो सुभाव कैदखाना रै माफिक है । जियां अदालत सूं सजा पायोड़ो अपराधी पूरी सजा पायां बिगर पैलां नीं छूट सकै, उणीज भांत आयु करम जठा ताईं वणियो रैवै बठा ताईं जीव आपणै सरीर रो त्याग नीं कर सकं । आयु करम रा नरकायु, निर्यञ्च आयु, मनुष्य आयु अर देव आयु अँ चार भेद है ।

#### ६. नाम :

नाम करम जीव नै एक जूँण सूं दूसरी जूँण में लै जावै । इण करम रै कारणाइज जीव री जूँण अर जूँण सम्बन्धी सरीर री अवस्था-व्यवस्था निश्चित हुवै । ओ करम चित्रकार रै मुजब है । जियां चित्रकार भांत-भांत रा चित्र बणावै उणीज भांत ओ करम

देव, नारक, मनुष्य, पशु-पंछी रै सरीर, इन्द्रिय, अवयव वर्ण, गंध, रस, स्पर्श आदि री रचना करे । नाम करम रा दो भेद हुवे-सुभ अर असुभ । सुभ नाम करम सूं रुगळो, सुडौळ, आकर्षक अर प्रभावशाली सरीर वर्ण अर अनुभ नाम करम सूं बदसूरत, वेडोल सरीर री स्थिति हुवे ।

### ७. गोत्र :

गोत्र करम जीव री उण स्थिति री निर्धारण करे जिण रै कारण जीव इसा कुळ, जाति, परिवार आदि में जनम लेवे के वो ऊंचो-नीचो समझ्यो जावे । ईं करम रा तुलना कुम्हारसू करी जावे । जियां कुम्हार भात-भतीला घड़ा बणावे, उणांमें सूं कुछेक घड़ा इसा हुवे के लोग वारी अक्षत, चंदण आदि सू पूजा करे अर कुछेक घड़ा इसा हुवे के दास आदि राखण में काम आवे अर खराब समझ्या जावे ।

### ८. अन्तराय :

अन्तराय करम रै उदय सूं आतमा री दान, लाभ, भोग उपभोग अर वीर्य ( बळ ) सम्बन्धी सक्तियां में रुकावट आवे । इसा करम रै कारण इज लोगां में साहस, वीरता, आतम विश्वास आदि री कमी-बेसी हुवे । ओ करम खजांची रै मानिन्द है । जियां राजा री हुकम हुवण पर भी खजांची रै विपरीत होएँ सूं इच्छा माफक धन री प्राप्ति में रुकावट पड़े, उणीज भांत आतमा रूप राजा री दान, लाभ आदि री अनन्त शक्ति होता हुयां भी ओ करम उण रै उपभोग में बाधा डाले ।

### पुरुसारथ अर करम :

मिनख आपणै करमां (भाग्य) री खुद निरमाता है । वो आपणै कियोडै करमां नै भुगतण खातर बाध्य है, पण इतरो बाध्य

कोनी कै वो उरणांमें कांई बंदळाव नी ला सकै । करम बांधण में मिनख नै जित्ती स्वतंत्रता है, उत्तीई स्वतंत्रता उरानै करम भोगण में भी है । पुरुसारथ रै बळ सूं मिनख करम रै फळ में परिवर्तन ला सकै । भगवान महावीर करम-परिवर्तन रा चार सिद्धान्त बताया—

१. उदीरणा—नियत अवधि सूं पैलां करम रो उदय में आवणो ।

२. उद्वर्तन—करम री अवधि अर फळ देण री शक्ति मे बढ़ोतरी हुवणी ।

३. क्षयवर्तन—करम री अवधि अर फळ देण री शक्ति मे कमी होवणी ।

४. संक्रमण—एक करम प्रकृति रो बीजी करम प्रकृति में संक्रमण हुवणो ।

इण सिद्धान्त रै माध्यम सूं प्रभु महावीर बंतायो कै मिनख आपणै पुरुसारथ रै बळ सूं बंध्योड़ा करमां री अवधि कम-बेसी कर सकै । वो करमां री फळ-शक्ति नै मंद या तीव्र पण कर सकै । इण भांत नियत अवधि सूं पैली करम भोग्यो जा सकै । तीव्र फळ आळो करम मंद फळ आळै करम रै रूप में अर मंद फळ आलो करम तीव्र फळ आळै करम रै रूप में भोग्यो जा सकै । पुण्य करम रा परमाणु पाप रै रूप में अर पाप करम रा परमाणु पुण्य रै रूप में संक्रात हुय सकै ।

करम रा अ सिद्धान्त मिनख नै निरासा, अकर्मण्यता, अर पराधीनता री मनोवृत्ति सूं बचावै । जै मिनख रो वर्तमान पुरसारथ सत् हुवै तो वो अतीत रा असुभ करम-संस्कारां नै नष्ट कर सकै या उरानै सुभ में बदळ सकै । अर जै उरणो वर्तमान पुरसारथ असत् हुवै तो वो आपणै लाभ सूं भी वंचित रैय जावै । संक्षेप में कयौ जा

सकै के जो मिनख आपणै पुरपारथ रै प्रति सांची है, जागरूक है, तो वो आपणै करमां री अधीनता सूं वारै निकळ सकै। महावीर रो करम सिद्धान्त इग वात पर जोर देवै के मिनख नै मिल्योड़ा दुख-सुख किणी ईश्वर रै विरोध या किरपा रा प्रतिफल कोनी। वां रो कर्ता-भोक्ता मिनख खुदईज है अर वीं में ईज आ ताकत है के वो आपणै साधना रै वळ सूं आपणो भाग्य (कर्म) वदळ सकै। ईश्वर-निर्भरता सूं छुड़ा'र मिनख नै आतम निर्भर बणावण में महावीर रै करम सिद्धान्त री महत्त्वपूर्ण भूमिका है।

### [ ४ ] तप

राग-द्व वादि पाप करमां सूं जे आतमा मलीन अर असुद्ध हुवै। उगरी सुद्धि खातर तप रो विधान है। तप एक इसी आग है जिमें तप'र आत्मा विसुद्ध बण जावै। तप दो भांत रो हुवै—(१) बाह्य तप (२) आभ्यन्तर तप।

बाह्य तप :

जिण क्रिया रै करण सूं, इन्द्रियां रो निग्रह हुवै, वृत्तियां रो संयम हुवै, लोगां नै भी मालूम हुवै के ओ तप करर्यो है वो बाह्य तप कहीजै, जियां उपवास या दस बीस दिनांरो लाम्बी तपस्या या विगय (घी, दूध, दही आदि) त्याग तथा सरोर नै सरदी, गरमी आदि में राख'र तकलीफां सहन करण रो अभ्यास करणो आदि।

बाह्य तप रा छ भेद :

बाह्य तप रा छ भेद है—अनसन, ऊणोदरी, भिक्षाचरी, रसपरित्याग, कायकलेस अर प्रतिसंलीनता।

१. अनसन :

अनसन रो अरथ है—आहार रो त्याग करणो। ओ तप

सगळा तपां में पैलो है आहार रै प्रति सगळा प्राणियां री आसक्ति हुवै । भूख पर विजय पाणो सबसूं दोरो है । आहार त्याग रो मतलब हुवै प्राणां रो मोह छोड़णो, मौत रै डर नै जीतणो । आहार त्याग सूं मानसिक विकार दूर हुवै । ओ तप उपवास कहीजै । उपवास सबद दो सबदां सूं बण्यो है । उप+वास । उप रो अरथ हुवै समीप अर वास रो अरथ है—रैवणो । अर्थात् आत्मा रै नैडेरैवणो । आत्मा रो सुभाव आनन्दमय अर ज्ञानमय है । इण आनन्द री अनुभूति वोईज कर सकै जो राग-द्वेष आदि विकारा सूं अळगो रैर समभाव में रमण करै ।

### २. ऊणोदरी :

तप रो दूजो भेद ऊणोदरी है । इण रो मतलब है भूख सूं कम खावणो । इण तप सूं खाद्य-संयम री भावना नै बळ मिले अर अनावश्यक धन संचय करण री प्रवृत्ति पर अंकुस लागै । ओ तप धार्मिक दृष्टि रै सागै-सागै आर्थिक अर सामाजिक दृष्टि सूं भी घणो उपयोगी है ।

### ३. भिक्षाचरी :

तीजै तप भिक्षाचरी रो सम्बन्ध निरदोस आहार ग्रहण करण री विधि सूं है । इण तप रो सम्बन्ध विशेष कर मुनियां सूं है । मुनि निरदोस आहार ग्रहण करबा खातिर भिक्षावृत्ति करै । वीं कैई घरां सूं थोड़ो-थोड़ो भोजन लैर आपणो गुजर-बसर करै । इण तप में साधक रै खातर विधान है कै वो अभिग्रह आदि नियमां सूं लूखो-सूखो जिसो भी निरदोस आहार मिल जावै, समभाव सूं ग्रहण करै । श्रावक नीतिपूर्वक जीवननिर्वाह रा साधन जुटावै ।

### ४. रसपरित्याग :

चौथै रस परित्याग तप में सुवाद वृत्ति पर विजय पावण रो

आदर्श है। जीभ रें मुवाद पर विजय पावणी घणी मुसकल है। इण कारण इण साधना नै भी तप मानियो है। इण तप रो साधक सवाद पर विजय पा'र अभक्ष्य चीजा रें ग्रहण सूं बचै।

#### ५. कायकलेस :

पांचमो कायकलेस तप है। कलेस रो अर्थ है-कष्ट। आतम कल्याण खातर शरीर नै कष्ट देवणी कायाकलेस तप है। इण तप में आतमा रा करम मळ दूर करण खातर सरीर नै भूख, तिस, सर्दी, गरमी, ध्यान, आसन आदि धार्मिक क्रियावां सूं तपायो जावै। इण क्रिया सूं आतमा में स्थिरता, शुद्धता अर सहनशीलता जिसा गुणां रो विकास हुवै।

#### ६. प्रतिसंलीनता :

छटो प्रतिसंलीनता तप है। इन्द्रियां नै असद्वृत्तियां सूं हटा'र सद्वृत्तियां में प्रवृत्त करणो प्रतिसंलीनता तप है। इण रा मुख्य रूप सूं चार भेद है।

इन्द्रिय प्रतिसंलीनता तप में पांचू' इन्द्रियां (आंख, नाक, कान, जीभ, सरीर) नै विषय विकारां सूं दूर राखण री कोसिस हुंवै। कषाय प्रतिसंलीनता में कषाय (क्रोध, मान, माया, लोभ) री प्रवृत्ति रो निग्रह कियो जावै। योग प्रतिसंलीनता में मन, वचन अर काया नै असुभ भावां सूं सुभ भावां कांती मोडयो जावै। मन नै एकाग्र कियो जावै, मौन राख्यो जावै। विवक्त सय्यासन सेवना तप में इसी ठैड़ रैवण री मना हुनै जिसू' काम, क्रोध आदि मनोविकारां नै उत्तेजना मिलै।

#### आभ्यन्तर तप :

आभ्यन्तर तप री साधना सूं सरीर नै कष्ट तो कम मिलै पर मन री एकाग्रता, सरळता, भावां री शुद्धता रो प्रभाव बेसी रेंगै।



आभ्यन्तर तप रा छह भेद :

आभ्यन्तर रा छह भेद हुवै—प्रायश्चित्त, विनय, वैयावृत्य, स्वाध्याय, ध्यान अर व्युत्सर्ग ।

१. प्रायश्चित्त :

प्रायश्चित्त रो अरथ है—प्रमाद या अणजाण में हुई भूलां रै प्रति मन मे ग्लानि या पश्चाताप करणो अर उणां नै फेर दुबाग नीं करण रो संकल्प लेवणो । इण भांत आतम निरीक्षण सूं जीवन शुद्ध अर सरळ बणै ।

२. विनय :

विनय रो अरथ है नम्रता । आपणै सूं बड़ा रै प्रति नम्रता अर छोटा रै प्रति स्नेह अर वात्सल्य भाव राखणो विनय तप है । विनय सूं अहंकार टूटै अर सदाचार री भावना में बढोतरी हुवै ।

३. वैयावृत्य :

वैयावृत्य रो अरथ है—सेवा । जो साधक निस्काम भाव सूं समाज सेवा अर राष्ट्र सेवा करै वो भी बड़ो तपस्वी मानीजै । जैन आगमां मुजब सेवा करण सूं तीर्थङ्कर गोत्र करम री प्राप्ति हुवै । सेवा परम धर्म है । इण सूं करमां री निरजरा हुवै ।

४. स्वाध्याय :

स्वाध्याय रो अरथ है—विधिपूर्वक सत् शास्त्रां रो अध्ययन करणो । अध्ययन में तल्लीन हुवण सूं मन एकाग्र हुवै, शुद्ध विचार आवै अर ज्ञान बर्ध । इण सूं ज्ञानावरणी करम रो नास हुवै । वाचना, पृच्छना, परिवर्तना, अनुप्रेक्षा, धरमकथा आदि स्वाध्याय रा पांच प्रकार है ।

### ५. ध्यान :

ध्यान रो अरथ है—मन री एकाग्रता । मन नै असुभ विचारां सूं सुभ कांती मोडणो । सुभ कांती बढतो मन किणी विषय में तन्मय हुय जावै तो वो ध्यान कहीजै । ध्यान सूं आतम बळ रो विकास हुवै । ध्यान चार भांत रो हुवै—आर्त, रीद्र, धर्म अर शुक्ल । पैला दो ध्यान असुभ मानीजै । अ त्यागण जोग है । आखर रा दो ध्यान सुभ है । लम्बी तपस्या उपवास सूं जितरा करम क्षय नी हुवै, उत्तरा मुहूर्त भर रै सुभ ध्यान सूं हुय जावै ।

### ६. व्युत्सर्ग :

व्युत्सर्ग रो अरथ है—विशिष्ट विधिपूर्वक त्याग करणो । धन, सम्पत्ति, सरीर आदि रै प्रति आसक्ति अर कपाय (काम, क्रोध, मान, माया, लोभ आदि) रो त्याग करणो व्युत्सर्ग तप है । इण तप में देह रै प्रति आसक्ति सूं मुक्त रैवण रो अभ्यास करियो जावै ।

ऊपर बतायोड़ा तप री साधना सूं करमां री निर्जेरा अर अनेक गुणां रो विकास हुवै जै स्वस्थ समाज अर प्रगतिशील मजबूत राष्ट्र रै विकास रा मूल आधार बणे ।

### [ ५ ] गृहस्थ-धर्म

भगवान महावीर साधुआं अर गृहस्थां रै खातर जिण धरम री व्यवस्था दीवी, को क्रमशः श्रमण धरम अर श्रावक धरम कही जै । साधुनां खातर महाव्रतां रो अर श्रावकां खातर अणुव्रतां रो विधान है । महाव्रतां रै पाळण में मुनि सगळा पाप करमां सूं वचै पण गिरस्त री कुछ सीमावां, मर्यादावां हुवै जिण कारण वै सम्पूर्णा पाप करमां रो त्याग कोनी कर सकै । पापां रो आंशिक त्याग इज अणुव्रत या श्रावक धरम कहीजै । पाप, प्राणियां रै आन्तरिक या आत्मिक विकारां रो इज दूजो नाम है । विकार इज दुखां रो कारण है । इणां विकारां सूं दुख बढै अर इणांरी कमी सूं दुख घटै ।

## पांच अणुव्रत :

मोटे रूप सूँ पाप पांच भांत रा हुनै-हिंसा, भूठ, चोरी, कुसील अर परिग्रह । इण पापां रो अंशतः त्याग अणुव्रत कहीजै । अ भी उणीज क्रम सूँ पांच भांत रा हुनै-(१) अहिंसा (२) सत्य (३) अचौर्य (४) ब्रह्मचर्य अर (५) परिग्रह-परिमाण ।

### १. अहिंसा :

इण व्रत रो धारक हिंसा रो देशतः त्याग करै । वो संसार रे सगळा प्राणियां नै आपणी आत्मा रे समान समझै । वो सोचै कै जियां दुख म्हनै नी पसन्द है उणीज भांत दूजा प्राणियां नै भी दुख पशन्द कोनी । आ सोच वो दूजा प्राणियां रो अहित नी करै । उणांनै कष्ट नी देवै । अहिंसा में उणरी पूरी सरधा हुनै । हिंसा नै वो त्याज्य समझै । पण गिरस्ती में सम्पूर्ण हिंसा सूँ बचरणो संभव कोनी । इण कारण अहिंसाणुव्रत रो संकल्प ले'र वो निरपराध प्राणियां नै तकलीफ नी देवै, उणां रो वध नी करै, पसुवां आदि पर बत्तो भार नी लादै, चाबूक, बैत आदि सूँ उणां पर वार नी करै । वांनै भूखा-तिसा नी राखै । किणी रें सागै क्रूरता पूर्ण अमानवीय बैवार नी करै । इण व्रत रे पाळण सूँ हिंसा-क्रूरता कम हुय'र अपणायत अर लोक-कल्याण री भावना में बढोतरी हुनै ।

### २. सत्य

इण व्रत में असत्य रो देशतः त्याग करियो जावै । इण व्रत रे धारक में सत्य रे प्रति पूर्ण निष्ठा हुनै । वो भूठी साख नी देवै । जाळी दस्तखत नी करै । किणी री राखीयोड़ी धरोहर नै पाछी देवण सूँ ना नी करै । भूठा लेख, भाषण अर विज्ञापन आदि नां देवै । इण व्रत रे पाळण सूँ अविस्वास मिट'र विस्वास, सत्यता, ईमानदारी, प्रामाणिकता जिंसा गुणां री बढोतरी हुनै ।

### ३. अचौर्य :

इण व्रत में चोरी रो देशतः त्याग करियौ जावै । इण व्रत रँ धारक रो अचौर्य में पूरो विसवास हुवै । वो दूर्जा री वस्तु चोरी री नियत सूं नी लैवै । चोर नै चोरी करण में की भात री मदद नीं देवै । नकली वस्तु नै अपली वता'र अर असली नै नकली वता'र नीं वेचै । वस्तु में किराी भात री मिलावट नी करै । राज रँ नियमां रँ विरुद्ध काम नी करै । जेव काटण अर सैध लगाण जिसा चोर करमां सूं सदा वचियो रँवै । कम ज्यादा नाप तौल नी करै । मिनख रँ श्रम, सक्ति अर सम्पत्ति रो अपहरण नीं करै । न्याय अर नीति सूं धन कमा'र आजीविका चलावै । इण व्रत रँ पाळण सूं सम्पत्ति रो अपहरण मिट'र न्याय-नीति रो प्रसार हुवै ।

### ४. ब्रह्मचर्य :

इण व्रत रो धारक परस्त्रीगमन रो त्याग व स्वस्त्री गमन री मर्यादा राखै । अप्राकृतिक काम भोग नी करै । नग्न नृत्य, अश्लील गायन, भद्दी मजाकां आदि सूं वचै । इण व्रत सूं व्यभिचार, दुराचार मिट'र सदाचार रो प्रसार व पोषण हुवै ।

### ५. परिग्रह-परिमाण :

इण व्रत में परिग्रह रँ परिमाण रो नियम कियो जावै । ई व्रत रो धारक आ सोचै कै परिग्रह वृत्ति विषय कषायां नै बढ़ाण आळी है । गिरस्त होवण रँ कारण वो पूर्ण रूप सूं तो परिग्रह रो त्याग नीं कर सकै पण धन-धान्य, खेती, पशु, दुकान, मकान, सोना, चांदी, आदि राखण री निश्चित मर्यादा अवश्य करै । इण व्रत रँ पाळण सूं आर्थिक विषमतावां अर संघर्ष मिट'र ससता व शान्ति रो प्रसार हुवै ।

### तीन गुणव्रत :

पांच अणुव्रतां नै गुणाकार रूप में बढ़ावणै खातर गुणाव्रतां रो योजना हुवै । अँ गुणव्रत तीन प्रकार रा है —

#### १. दिग्ब्रत :

इण रो अरथ है चारूँ दिसावां में आणै-जाणै रो परिमाण निश्चित करणो ।

#### २. देसव्रत :

इण रो अरथ है-क्षेत्र विषयक हृद वांधणी, अमुक नदी, पहाड़ आदि रो सीमा सूँ बारै गैपार नीं करणो ।

#### ३. अनर्थदण्ड विरमण व्रत

सरीर रो चंचळता, अस्थिरता, वाणी रो अनर्गल उपयोग आदि अनर्थ दण्ड है । इण व्रत में इसा कामां सूँ बच्यो जावै जिण रै करण सूँ आपणो कांई भी प्रयोजन नीं सरै अर बिना कारणई पाप करमां रो संचय हुवै ।

#### चार शिक्षाव्रत :

पांच व्रतां नै मजबूत बणावण खातर शिक्षाव्रतां रो विधान करियो गयो है । अँ शिक्षाव्रत चार प्रकार रा है—

#### १. सामायिक व्रत :

इणमें सगळा पापां रो त्याग कर समभाव नै प्राप्त करण रीं साधना की जावै । सामायिक करतां वगत श्रावक निष्पाप जीवन बित्तावै । इण सूँ तन, मन, अर वाणी में स्थिरता आवै ।

#### २. देसावकासिक व्रत :

दैनिक व्रत ग्रहण करणरी प्रवृत्ति देसावकासिक व्रत कहीजै ।

श्रावक हिंसादि आस्रवां रो द्रव्य, क्षेत्र, काळ री मर्यादा सूं नितहमेस संकोच करै। इण रँ अभ्यास सूं जीवन संयत अर नियमित वरौ।

### ३. पौषधोपवास व्रत :

इण व्रत में साधक हिंसादि पाप करमां रो एक दिन रात खातर त्याग करै। पौषध व्रत में वो खुद पाप कर्यां सूं बचै अर दूजा सूं भी वो हिंसादि रा काम नीं करावै।

### ४. अतिथि संविभाग व्रत

घर आयोड़ो अतिथि देव री भांत हुवै। साधु-साध्वी अर साधर्मीजनां रो आवआदर करणो हरेक गृहस्थ रो फरज हुवै। समतावृत्ति बढावण में तथा समाज में सौहार्द भाव री अरपणा में ओ व्रत घणो उपयोगी है।

## [६] अहिंसा

अहिंसा सबद रो अर्थ है—हिंसा नी करणो, किणी जीव नै नीं मारणो। अहिंसा रो मरम भलीभांत समझण खातर हिंसा रो सरूप समझणो जरूरी है। जैन परिभाषा मुजब हिंसा सबद रो अर्थ हुवै—प्रमाद युक्त मन, वाणी अर सरीर सूं दूजा रँ अथवा आपणै प्राणां रो नास करणो। प्राण दस हुवै—पांच इन्द्रियां, मन, वाणी, सरीर, सांस अर आयु। इण दसूं प्राणां मांयसूं किणी एक नै भी प्रमाद रँ बसीभूत हुय'र नुकसाराण पोंहचारणो, हिंसा है

हिंसा रो मूल कारण प्रमाद :

प्रमाद पांच भांत रा हुवै—

(१) इन्द्रियां री विषयासक्ति

(२) कषाय—क्रोध, मान, माया, लोभ आदि मनोवेग

(३) आलस्य या असावधानी ।

(४) विकथा-बेकार री बातों ।

(५) मोह-राग-द्वेष आदि

अ प्रमाद हृदय नै विकृत अर संकुचित बणावै । इणा सूं प्रेरित हुय'र दूजा रै प्राणां नै आघात पोंहचाणो हिंसा है । प्रमाद भाव नै नष्ट करण खातर मैत्री अर अभेद भावना रो विकास करणो चाइजै । द्वेष अर सुवारथ नै मैत्री अर समानतारी भावना सूं जीतणो चाइजै । सब जीव जीवणो चावै, मरणो कोई नीं चावै । सब जीवां नै आपणै समान समझ'र किणी नै नुकसान नीं पोंहचाणो, जिसो बैवार आपांनै आपणै सागै पसन्द है विसोइ बैवार दूजां रै सागै करणो, अहिंसा है ।

हिंसा रो मूल कारण प्रमाद युंक्त आचरण होता हुयां भी पांच ओरुं बीजा कारण है जिणां रै वसीभूत होय'र मिनख हिंसा करै । वै इण भांत है—

(१) अर्थ दण्ड (२) अनर्थ दण्ड (३) हिंसा दण्ड (४) अकस्मात दण्ड (५) दृष्टि विपर्यास दण्ड । मनोरंजन खातर किणी प्राणी नै मारणो, दुख पोंचावणो, अंग-भंग करणो अनर्थ दण्ड है । इण हिंसा सूं नीं तो सरीर री रक्षा हुवै अर नीं परिवार, कुटुम्ब अर मित्र रो कोई प्रयोजन सिद्ध हुवै । कोई जीव आपांनै मार सकै या किणी भांत रो नुकसान पोंचाय सकै इगरी आसंका मात्र सूं ईज उणनै मार डालणो हिंसा दण्ड है । अचाणचक गलती सूं एक रै बदळ दूजा जीव री हिंसा कर देवणी अकस्मात दण्ड है । इणीज भांत अम सूं मित्र नै शत्रु समझ'र या साहूकार नै चोर समझ'र उणनै दण्ड देवणो दृष्टि विपर्यास दण्ड है ।

इण कारणां रै अलावा हिंसा रा मुख्य निमित्त है-राग अर द्वेष । राग रा दो प्रकार है—माया अर लोभ अर द्वेष रा भी दो प्रकार है—क्रोध अर मान ।

क्रोध में आय पुत्र-पुत्री आदि पारिवारिक सदस्यांनै मारणो, पीटणो, सरदी-गरमी में उघाड़ै सरीर ऊभोकर देणो, आ हिंसा क्रोध निमित्तक हिंसा कहीजै । जाति, कुळ, बळ रूप, तप, ऐश्वर्य, प्रज्ञा आदि में खुद नै वडो मान'र घमण्ड करणो, दूजां नै नीचो समझणो, उणारो अपमान करणो मान निमित्तक हिंसा है । ऊपर सूं सम्य अर शिष्ट वण'र छिप्योड़े रूप सूं पाप करणो, दूजां नै ठगणो, कपट करणो, उणां रै गुप्त भेदां सूं बेजो फायदो उठाणो मायानिमित्तक हिंसा है । ऊपर सूं भोग रै प्रति उदानीनता रो भाव धार'र कामभोगां री पूरति खातर, विषय भोगां री चीजां रो संग्रह करणो, उणारै संरक्षण री चिन्ता करणो लोभनिमित्तक हिंसा है ।

जैन धरम में आतमघात करणो बहुत वडो हिंसा है । घणकरा लोग कैवै के आपणी आत्मा रो घात करण में हिंसा कोनी, पण आ बात गलत है । आतमघात करणियो मिनख भय, क्रोध, अपमान, लोभ, राग आदि भावां सूं प्रेरित हुय'र आतमघात करै । अ कारण हिंसा रा ईज है । आतमघाती मिनख में आतम विसवास अर कस्ट सहिष्णुता नी हुवै । कायरता, भय, दीनता, आतमविसवास रो कमी आदि अद्गुणा, सद्गुणां रो नास करै । इण वास्तै आतमघात महापाप अर हिंसा मानीजै । पण साधक जद काळ नै नैडो जाण समभाव पूर्वक अनशन व्रत अंगीकर कर'र आतमसरूप मे रमण करतां हुयो मरण प्राप्त करे तो वो आतमघात नी कहीजै । ओ समाधि मरण कहीजै । साधना री दृष्टि सूं ई'रो घणो महत्त्व है ।

मिनख आजीविका, आमोद-प्रमोद अर सवाद रै वसीभून हुय'र दारू, मांस, चमड़ा, दांत आदि सूं वणी चीजां रो उपयोग करै । जैन दृष्टि सूं आ भी हिंसा मानीजै ।

रुढ़िवादी लोग लौकिक मान-मनीतियां पूरी करण खातर देवी-देवता रै सामै अनेक जीवां री बळि देवै । देवी-भक्ति अर



सिद्धि प्राप्ति की आड़ में आ बहुत बड़ी हिंसा है। इण हिंसा की एक मात्र कारण अज्ञान, अंधविश्वास और भोगासक्ति है।

**अहिंसा और शुभ प्रवृत्ति :**

जिण भांत आपांनै सुख वाल्हो है, उणीजभांत दूजां नै परा सुख वाल्हो है। जियां आपांनै कष्ट अप्रिय है उणीज भांत दूजा नै भी कष्ट अप्रिय है। आ सोच'र प्राणिमात्र रै सागै एकत्व की अनुभूति और मैत्री भाव राखणो चाइजै।

अहिंसा रा हजारुं रूप और स्रोत है। भगवान महावीर कहे- दया, समाधि, क्षमा, सम्यक्त्व, चित्त की दृढ़ता, प्रमोद, विश्वास, अभय, समत्व, मैत्री आदि भाव अहिंसा रै परिवार में गिणीजै। अ गुण अहिंसा की विकास करै। इणां रै चिन्तन और नैवार सून प्रमाद भाव घटे। अहिंसा रै पाळण खातर मन, वचन और काया की स्वच्छन्द (असद्) प्रवृत्तियां पर रोक लगावणी जरूरी है।

मानवीय वृत्ति की अशुभ सून निवृत्ति और शुभ में प्रवृत्ति करण खातर जो विधि सास्त्रां में वर्णित है। समिति कहीजै। समिति रा पांच प्रकार है— (१) इर्या समिति, (२) मन समिति, (३) वचन समिति, (४) एषणा समिति, (५) आदान निक्षेपण समिति।

चालतां, उठतां-वैठतां, काम करतां छोटा-बड़ा जीवां नै पीड़ा नीं पोंचावणी इर्या समिति है। मन में उठ्योड़ा भावां की निरीक्षण करणो के अ भाव दूजां खातर सुखकारी है या दुखदायी, पापकारी है या अपापकारी। इण भांत सोच'र मन नै शुभ भावना में लगायां राखणो मन समिति है। कठोर, दुखकारी, वाणी नी बोल'र हितकारी, सत्य, मधुर वचन बोलणा वचन समिति है। गुजारां खातर

तामसिक, राग-द्वेष सूं भरियोड़ी उत्तेजित वस्तुवा रो सेवन नीं कर'र स्वास्थ्यप्रद, सात्विक भोजन, पाणी, वस्त्र, पात्र आदि रो ग्रहण (उपयोग) करणो एपणा समिति है। रोजमर्रा काम आण आळी चीजां रै लेण-देण, रखरखाव आदि में सावधानी राखणी आदान निक्षेपण समिति है।

किणी जीव या प्राण नै नी मारणो ओ अहिंसा रो निषेधात्मक रूप है। अहिंसा रो विधेयात्मक रूप है—लोक कल्याणकारी प्रवृत्तियां में रस लेणो, आतमहितकारी क्रियावां करणी, प्राणीमातर नै आतमवत समझणो, उणांमें किणी भात री भेदबुद्धि नी राखणी, मव नै साग उदारता रो बवार करणो अर नितहमेस मैत्रीभाव रो चिन्तन करणो।

### समतामूलक समाज :

अहिंसा सिद्धान्त रो विधायक तत्त्व है समता, विषमता रो अभाव। दुनियां मे कोई छोटी-बड़ी कोनी। सगळा समान है। समतावाद रै इण सिद्धान्त सूं महावीर जातिभेद, वर्णभेद, रंगभेद नीति रो खडन करियो अर वतायो कै—मिनख जनम या जात सूं बड़ो कोनी। वी नै बड़ो वर्णावै उणारा गुण, उणारा कर्म।

महावीर कह्यो—सिर मुंडाणै सूं कोई अमण नीं वण जावै, ओंकार रो नाम लेणै सूं कोई वामण, वन मे निवास करण सूं कोई मुनि अर कुसचीर धारण करण सूं कोई तापस नीं वण जावै। पण समभाव राखण सूं अमण, ब्रह्मत्रय सूं ब्राह्मण, ज्ञान सूं मुनि अर तपाराधना सूं तापस वणै। धर्म, सम्प्रदाय, अर जाति रै नाम पर आज विश्व में घणो तनाव अर भेदभाव है। महावीर रै इण सिद्धांत नै आज सांचा अरथां सूं अणणा लियो जावै तो ओ विश्व सगळा खातर स्वर्ग वण जावै।

## [७] अपरिग्रह :

मानव री इच्छावां आकास रै समान अनन्त है। एक री पूरति करतां पाण दूजी इच्छा आय ऊभी व्हे जावै। दूजी री पूरति करण पर फेरुं अनेक इच्छावा पैदा हुय जावै। इणरो नतीजो ओ हुवै कै मिनख री सत-असत् वृत्तियां में संघर्ष होवा लागै। कथनी अर करणी में भेद पड़ जावै। अनन्त इच्छावां री पूरति करण खातर मिनख अनावश्यक जमाखोरी अर धन संग्रह करै। वो आ बात भूल जावै कै जां चीजां री उरणे जरूरत है, उणांरी जरूरत दूजा नै भी हुवै। वो आपणै सुवारथ में आंधो बण'र चीजां नै एकठी करण लागै। इणरो परिणाम हुवै कै समाज में दूजी ठोड चीजां री कमी हुय जावै। इण सूं कालाबाजारी बढ़ै, समाज में विषमता फैले अर वर्ग-सघर्ष नै बढ़ावो मिलै, व्यक्तिगत, सामाजिक अर राष्ट्रीय जीवन असात हुय जावै। इण असांति नै मिटावण खातर प्रभु महावीर लोगां नै अहिंसा रै सागै अपरिग्रह रो, परिग्रह री मर्यादा तय करण रो उपदेस दियो।

अपरिग्रह रो अरथ है—किणी वस्तु रै प्रति आसक्ति या ममत्व भाव नी राखणो। ओ ममत्व भाव या मूर्च्छा इज परिग्रह है। ज्यूं-ज्यूं मूर्च्छा भावना बढ़ै त्यूं-त्यूं मिनख रै आतम विकास रो मारग रुकै, उणांरी ज्ञान अर विवेक री ज्योति नष्ट हुवै। मिनख सुवारथ अर लोभ में आंधो बण जावै। ममत्व भाव जरूरत सूं बेसी चीजा जमा करण री प्रेरणा देवै। बेसी चीजां जमा करण खातर, बत्तौ धन कमावण खातर मिनख अन्याय करै, राजनिग्रमां रो उल्लघन कर'र बेजां फायदो उठावै। इण भांत ज्यूं-ज्यूं वीं नै लाभ मिलै त्यूं-त्यूं वीरोलोभ बढ़तो जावै। पण फेरु मिनख नै संतोष अर तृप्ति नीं हुवै। उणांरी इच्छा श्रीरुं बत्तौ लाभ कमावण री रैवे। माकडी रै जाळा री भांत मिनख लाभ अर लोभ रै चक्कर में फंसतो जावै। जिसू वींनै आत्मिक सांति रै बजाय असांति मिलै,

सुख रै वजाय दुख री अनुभूति हुवै । लाभ अर लोभ री पाग में बळतो रैवरा रै कारण वीनै रात नै नीद परा नी आवै । ओ परिग्रह सगळा दुखां रो मूल है । ईं परिग्रह रा मुख्य दो भेद है (१) अन्तरंग परिग्रह अर (२) बाह्य परिग्रह ।

### अन्तरंग परिग्रह :

अन्तरंग परिग्रह रा चवदा भेद मानीजे—(१) मिथ्यात्व, (२) राग, (३) द्वेष, (४) क्रोध, (५) मान, (६) माया, (७) लोभ, (८) हास्य, (९) रति, (१०) अरति, (११) शोक, (१२) भय, (१३) जुगुप्सा, (१४) वेद न (स्त्री-पुरुष रै प्रति अभिनाषा रूप परिणाम) । ओ अनन्त परिग्रह आतमा री ऊंची उठण री सक्ति नै नष्ट करै उगारै पतन रो कारण वणै । इण सूं क्षमा, दया, करुणा जिंसा आत्मिक गुण नष्ट हुय जावै ।

### बाह्य परिग्रह :

बाह्य परिग्रह मोटे रूप सूं दस भात रो हुवै—

(१) क्षेत्र-खेत, खुली भूमि गांव-नगर, पर्वत, नदी, नाळा आदि । (२) वस्तु : - मकान, महल, मंदिर दुकान आदि । (३) हिरण्य : सोना चांदी रा सिक्का, नोट आदि । (४) सुवर्ण-मोनी (५) धन-हीरा, पन्ना, मोती आदि जेवरात (६) धान्य—गेहूँ, चावल आदि अन्न (७) द्विपद चतुष्पद-मिनख परिवार तथा गाय, बल आदि चौपाया जिनावर (८) दासदासी, नौरु चकर आदि (९) कुप्य—वस्त्र, वर्तन, पलंग, अलमागे आदि घरेलू सामान (१०) धातु—चांदी, तांबा, पीतल, लोहा आदि । इण वस्तुवां रो संग्रह करणो अर इणां सूं ममत्व राखणो बाह्य परिग्रह है । ईं सूं आत्मिक सांति नी मिलै । ज्यूं-ज्यूं बाहरी परिग्रह वधै

मन में चिन्ता अर परेसानियां भी बधवा लागै । ई कारण ईज सगळा बाह्य पदारथ परिग्रह मानीया जावै ।

बाह्य पदारथां रै सागै-सागे संकीर्ण विचार अर दुराग्रह पण परिग्रह है । इण वैचारिक परिग्रह नै दूर करण खातर भगवान महावीर अनेकान्त रो सिद्धान्त बतयो । अनेकान्तवादी दृष्टिकोण सून सोचण पर विचारां में किणी रो आग्रह नीं रैवै ।

विज्ञान री उन्नति सून आज वस्तुवां रो उत्पादन कई गुणां बढ़ग्यो है । पण फेरून उणांगे अभाव इज अभाव चारूकांनी लखावै । आज पण घणाखरा इसा लोग है जिणांनी पेट भरण खातर पूरो अन्न अर सरीर ढांकण खातर पूरो कपडो नी मिलै । इणरो मूल कारण व्यक्ति समाज अर राष्ट्र री संग्रहवृत्ति है । आज रो मिनख घणो लोभी है । वो वस्तुवां रो संग्रह कर बाजार में उणां रो अभाव देखणो चावै । ज्यू ई चीजां री कमी हुवै वो जमां कर्-योड़ी वस्तुवां नै ऊचै मोल बेव'र बेगोसो'क लखपति अर करोडपति बणाणो चावै । आज गोदामां में लाखां टण अनाज पड़ियो-पाड़ियो सड जावै पण लोभी मिनख अर राष्ट्र जरूरतमंद लोगां में उणां नी वाटै । भगवान महावीर रा परिग्रह परिमाण सिद्धान्त नै ध्यान में राख'र जै आवश्यकता सून बेसी चीजां रो संग्रह नी कियो जावै तो आज पूंजीवाद अर साम्यवाद नाम सून जो विरोध अर संघर्ष चाल, वो आपैइ खतम हुय जावै अर समाजवादी समाज रचना रो सुपनो साकार हुवण में जेज नी लागे ।

### [ ८ ] अनेकान्त

असांति रो मुख्य कारण हठवादिता, दुराग्रह अर एकान्तिकता है । विज्ञान रै विकास रै सागै मिनख घणो तार्किक बणाग्यो । वो प्रत्येक बात नै तक री फसौटी पर कस'र देखणो चावै ।

दूसरां रै दृष्टिकोण नै समझवा री कोसिस नी करै । इण अहभाव अर एकान्त दृष्टिकोण सूं आज व्यक्ति, परिवार, समाज अर राष्ट्र सै पीडित है । इणीज कारण उणा में संघर्ष है, बेचनी है ।

भगवान महावीर इण स्थिति सूं मिनख नै उवारण खातर अनेकान्त रो सिद्धान्त प्रतिपादित करियो । उणारो कैवणो है— प्रत्येक वस्तु रा अनन्त पक्ष हुवै । उणां पक्षा नै वां 'धरम' री सजा दीवी । इण दृष्टिकोण सूं ससार री प्रत्येक वस्तु अनन्त धर्मात्मक है । किण भी पदार्थ नै अनेक दृष्टियां सूं देखणो, किणी भी वस्तु तत्त्व रो भिन्न-भिन्न अपेक्षा सूं पर्यालोचन करणो, अनेकान्त है ।

वस्तु अनन्त धर्मात्मक हुवी । कोई वीनै एक धरम में बांधणो चावी, अर उण एक धरम सूं होण आळा ज्ञान नै इज समग्र वस्तु रो साचो अर पूर्ण ज्ञान समझ बँठे तो वो ज्ञान यथार्थ नी हुवी । सापेक्ष स्थिति सूं ईज वो सांच हो सकै । निरपेक्ष स्थिति मे नी । हाथी नै थांभा जिसो वतावण आळो व्यक्ति आपणी दृष्टि सूं साचो है, पण हाथी नै रस्सी दाईं वतावण आळा री दृष्टि में वो सांचो कोनी । हाथी रो समग्र ज्ञान करण वास्ते समूचै हाथी रो ज्ञान करण आळी दृष्टियां रो अपेक्षावा रैवी । इणीज अपेक्षा दृष्टि सूं अनेकान्त वाद रो नाम अपेक्षावाद अर स्याद्वाद पण है । स्यात् रो अर्थ है—किणी अपेक्षा सूं, किणीदृष्टि सूं, अर वाद रो अर्थ है—कथन करणो । अपेक्षा विशेष सूं वस्तु तत्त्व रो विवेचन करणो ईज स्याद्वाद है ।

सप्तभंगी :

विवेचन करण री आ शैली सप्तभंगी कहिजै । ईं बचन-शैली रा सात विकल्प इण भांत है—

(१) स्याद्अस्ति—किणी अपेक्षा सूं है ।

(२) स्यादनास्ति—किणी अपेक्षा सूं नी है ।

(३) स्याद्अस्ति-नास्ति—किणी अपेक्षा सूं है, किणी अपेक्षा सूं नी है ।

(४) स्याद्अवक्तव्य— है भी, नीं भी, पण एक सागै कहचो नीं जा सकै ।

(५) स्याद् अस्ति-अवक्तव्य—कथचित् है, पण एक सागै कयो नीं जा सकै ।

(६) स्याद् नास्ति अवक्तव्य—कथचित् नीं है पण कयो नीं जा सकै ।

(७) स्याद् अस्ति-नास्ति अवक्तव्य—किणी अपेक्षा सूं है, किणी अपेक्षा सूं नी है, पण दोन्यूं बातां एक सागै प्रगट नीं की जा सकै ।

इण सात विकल्पां मांय सूं पैला चार विकल्प अधिक व्यावहारिक है । आखरी तीन विकल्पां मांय पैलड़ा चार विकल्पां रो ईज विस्तार कियो गयो है । अ नीचें दियोड़ा उदाहरण सूं समझ्या जा सकै—

तीन आदमी एक ठौड़ ऊभा है । किणी आवणिये मिनख एक सूं पूछियो—काई थां इण रा पिता हो ?

वीं उत्तर दियो—हां (स्याद्अस्ति) आपरौ इण बेटे री अपेक्षा सूं म्हुं पिता हूं । पण इण पिताजी री अपेक्षा सूं म्हुं पिता नीं हूं (स्याद्नास्ति) म्हुं पिता हूं भी अर नीं भी (स्याद् अस्ति-नास्ति), पण एक सागै दोन्यूं बातां कही नीं जा सकै (स्याद् अवक्तव्य), इण वास्तै काई कैवूं ?

स्याद्वाद री आ वचन शैली जीवन री सहज धरम है, बेवार री सीधी सादी भाषा है । जं कोई इण नै आच्छी तरेऊं समझ लेवै तो सगळा वैचारिक भगड़ा, टकराहट अर संघर्ष मिट जावै ।

अनेकान्तवाद इण बात पर जोर देवै कं आ वस्तु एकान्त रूप सँ इसी 'ही' है, आ बात मत कैवो । 'ही' री जगा 'भी' री प्रयोग करो । इण कयन सँ आपसी संघर्ष नी बढैला, एक दूजा रै बोचै सौहार्दपूर्ण, मधुर वातावरण बणैला । मैत्री भाव री विस्तार इवैलो अर बिचार उदार बणैला ।

---



## ११ | महावीर री परम्परा

पट्ट-परम्परा :

भगवान महावीर रै निर्वाण रै सागैइ तीर्थङ्कर परम्परा समाप्त हुय जानै । महावीर रा पैला अर सब सूं बड़ा शिष्य इन्द्र-भूति भी केवळज्ञानी बणग्या । इण कारण वी संघ रा वारिस नीं बणिया । महावीर रै घरम मासन रो भार पांचवा गणधर सुधरमा नै सूंपियौ गयौ । आर्य सुधरमा महावीर री शिक्षावां आपणां शिष्यां नै मौखिक विरासत रै रूप में सूंपी । वर्तमान में आगम रूप में जो महावीर वाणी प्रसिद्ध है वा सुधरमा इज आपणौं शिष्य जम्बू स्वामी अर अन्य स्थविरा ने दीवी । जम्बू स्वामी रै पछै उणांरा पट्टधर प्रभव स्वामी हुया । जम्बू स्वामी रै सागैइज केवळज्ञान री परम्परा समाप्त हुयगी अर जम्बू स्वामी केवळज्ञानी नी बण सक्या । श्वेताम्बर परम्परा मुजब जम्बू स्वामी रै बाद क्रमशः प्रभव, सय्यंभव, यसोभद्र, संभूति विजय अर भद्रबाहु आचार्य हुया । परा दिगम्बर परम्परा मानै कं जम्बू स्वामी रै पछै नन्दी, नन्दीमित्र, अपराजित, गोवरधन अर भद्रबाहु आचार्य हुया । दोन्यूं परम्परा सूं आ ठा पडै कै आर्य प्रभव रै समै जै मतभेद हुया वै भद्रबाहु रै समय में सांत हुयग्या अर सगळा एक मतै सूं भद्रबाहु नै आपणा आचार्य मजूर करियो ।

महावीर रै निर्वाण रै १६० बरसां पछै भद्रबाहु रै नेतृत्व में विद्वान श्रमणां री एक सभा हुई जिण में महावीर रै उपदेशां रो ग्यारा अंगं रै रूप में संकलन कियो गयो । कुछेक श्रमणां इण

आगमां नै प्रामाणिक मानवा सूं इन्कार कर दियो । श्वेताम्बर मान्यता रै मुजव अठा सूं ईज वास्तविक रूप में दिगम्बर परम्परा री सरूआत हुई ।

### वल्लभी-संगीति :

याददास्त रै आधार परटिकयोडो श्रुत साहित्य धीरे-धीरे लुप्त हुवण लागो । स्मृति दोष रै कारण भांत-भांत रा मतभेद पग खड़ा हुयग्या । ईं कारण महावीर रै निर्वाण रै लगभग एक हजार वरसां पाछे आचार्य देवद्विगण री अध्येक्षता में श्रमण संघ री एक संगीति वल्लभी (गुजरात) में हुई अर याददास्त रै आधार पर चल्या आयोडा आगम लिपिवद्ध करिया गया । इण लिपि करण सूं साहित्य मे स्थिरता अर एकरूपता आई अर आपस रा मतभेद भी कम हया । आगे जा'र आचार्य हरिभद्र, सिद्धसेन, समन्तभद्र, अकलक, हेमचन्द्र जिसा महान विद्वाना जैन साहित्य री घणी सेवा करी अर दर्शन, न्याय, काव्य, कोस, व्याकरण, इतिहास आदि सगळी दृष्टि सूं जैन साहित्य नै समृद्ध बणायो ।

### परम्परा-भेद :

ओ तथ्य जाणवा लायक है कै महावीर रै निर्वाण रै लगभग ६०० वरसां पाछे जैन धरम दो मतां में बटगयो-दिगम्बर अर श्वेताम्बर । जो मत साधुआं री नग्नता रो पक्षधर हो अर उणनै इज महावीर रो मूळ आचार मानतो हो वो दिगम्बर कहलायो । ओ मत मूळ संघ रै नाम सूं भी जाणीजै, अर जो मत साधुआं रै वस्त्र, पात्र रो समर्थक हो वो श्वेताम्बर कहलायो ।

### दिगम्बर-परम्परा :

आगे जा'र दिगम्बर मत कई संघा में बंटगयो । इणां में मुख्य है—द्राविड़ संघ, काष्ठा संघ अर माथुर संघ । कालांतर में सुद्ध

आचारी, तपस्वी, दिगम्बर मुनियों की संख्या कम हुयी और एक नूँवें भट्टारक वरग रो उदय हुयो । जींरी साहित्य रे क्षेत्र में महत्वपूर्ण देन है । जद भट्टारकां में आचार की शिथिलता आई तो उण रे खिलाफ एक क्रांति हुई, जिणारा अगुआ हा-बनारसी दास । ओ पथ तेरापंथ कहलायो । इण में टोडरमल जिसा विद्वान दार्शनिक हुया । वर्तमान में दिगम्बर परम्पर रा श्री देशभूषणजी, विद्यानंदजी आदि प्रमुख आचार्य अर मुनि है ।

### श्वेताम्बर-परम्परा :

श्वेताम्बर मत पण आगे जा'र दो भागां में बंटगयो-चैत्यवासी अर बनवासी । चैत्यवासी उग्र विहार छोड़'र मन्दिरां में रैवण लागा । कालान्तर में श्वेताम्बर परम्परा में कई गच्छ बणग्या, जिणारी सख्या ८४ मानीजे । इण में खरतरगच्छ अर तपागच्छ मुख्य है । कयो जावै कै वर्धमानसूरि रा सिष्य जिनेश्वर सूरि सम्बत् १०७६ में गुजरात रे अणहिलपुर पट्टण रे राजा दुरलभराज की सभा में जद चैत्यवासियां नै पराजित किया तद राजा उणां नै 'खरतर' नाम रो विन्द दियो । इण भांत खरतरगच्छ नाम चाल पड़ियो । तपागच्छ रा संस्थापक श्री जगत्चन्द्र सूरि मानिया जावै । संवत् १२८५ में इणां उग्र तप करियो । इण रे उपलक्ष में मेवाड़ रा महाराणा जैतसिंह इणानै 'तपा' उपाधि सूं विभूषित कियो । तदसूं ओ गच्छ तपागच्छ नाम सूं प्रसिद्ध हुयो । खरतरगच्छ अर तपागच्छ दोन्युं इ मूरति पूजा में विसवास राखै ।

इण परम्परा में तरुण प्रभ सूरि, सोमसुन्दर सूरि, माणिक्य सुन्दर सूरि, मेरुसुन्दर, हीर विजयसूरि, राजेन्द्र सूरि, विजयवल्लभ सूरि जिसा कई प्रभावी आचार्य अर मुनि हुया । वर्तमान में सर्वश्री धर्मसागरजी, विजय समुद्र सूरिजी, यशोविजयजी जनकविजय जी, कान्तिसागर जी, कल्याण विजय जी, भद्रंकर विजयजी, भानुविजय जी, विशाल विजय जी आदि प्रमुख आचार्य अर मुनि है ।

### लौकापंथ :

पन्दरवीं-मोलवीं सती में धरम रै नाम पर फैल्योडै बाहरी आडम्बर रो सत लोगां विरोध कियो । जिसूं भगवान री निराकार उपामना नै बळ मिल्यो । श्वेताम्बर परम्परा रा स्थानकवासी, तेरापथी अर दिगम्बर परम्परा रा तारणपंथी मूरति पूजा में विश्वास नी राखै । लोकासाह (संवत् १५०८) नूवै लौकापथ रो थरपणा करी । वां मूरति पूजा अर प्रतिष्ठा रो विरोध करियो अर पौषध, प्रति-क्रमण, संयम आदि पर विशेष बळ दियो । ओ पंथ आगं जा'र कैई गच्छां में वंश्यो । इगरी तीन मुख्य शाखावां है - गुजराती लौका-गच्छ, नागौरी लौकागच्छ, लाहोरी-उत्तरार्द्ध लौकागच्छ ।

### स्थानकवासी परम्परा :

आगे जा'र इग परम्परा में जद आडम्बर बढ़ियो तद सर्वश्री जीवराज जी, लवजी, धरमसिंह जी, धरमदास जी हरजी, धन्नाजी आदि आचार्यां क्रियोद्वार करियो अर तप-त्याग मूलक सद्घर्म रो प्रचार करियो । अे स्थानकवासी परम्परा रा अग्रवा मानीजै । आ सम्प्रदाय वाइस ठोळा रै नांम सूं भी प्रसिद्ध है । ईं में सर्वश्री भूधर जी, रघुनाथजी, जयमल जी, कुशळोजी, रतनचद जी, अमरसिंह जी, हुकमीचद जी, अमोळक ऋषि जी, जवाहरलालजी, नानकराम जी, आत्माराम जी, पन्नालाल जी, घासीलाल जी, सभरथमल जी, चौथमल जी जिसा घणखरा प्रभावशाली आचार्य अर संत हुया । वर्तमान में इग सम्प्रदाय में सर्वश्री आनन्द ऋषि जी, हस्तीमलजी, नानालाल जी, अमर मुनि, सुशील मुनि, पुष्कर मुनि, मरुधर केसरी मिश्रीमल जी, मधुकर मुनि, किम्तूर चंद जी, सूर्य मुनि, प्रतापमल जी, अम्बालाल जी जिसा कैई प्रभावशाली आचार्य अर मुनि है ।

### तेरापंथ :

स्थानकवासी परम्परा सूं इज संवत् १८१७ में तेरापंथ सम्प्र-

दाय रो उद्भव ह्यो । ईं सम्प्रदाय रा मूल संस्थापक आचार्य भीखण जी है । वर्तमान समय में ईंण सम्प्रदाय रा नवमा पट्टधर आचार्य तुलसी है । आप अगुव्रत आंदोलण रो प्रवृत्तन कर नैतिक जागरण री दिसा मे विशेष पहळ करी । भीखण जी अर आपरें बीच सात आचार्य ह्यो, जिणां रा नाम है—सर्वश्री भारमल जी, रायचंद जी. जीतमल जी (जयाचार्य), मघवा गणी, माणक गणी, डाल गणी अर कालू गणी । वर्तमान में इण सम्प्रदाय में सर्वश्री नथमल जी, बुद्धमल जी, नगराज जी जिसा कैई विद्वान मुनि है ।

### सांस्कृतिक देन :

देस मे संस्कार-शुद्धि रै आन्दोलन में जैन धरम री इण महान् परम्परा रो महत्त्वपूर्ण योगदान रह्यो है । इण परम्परा में जै घण खरा गणगच्छ है, वां में जो भेद लखावै वो व्यावहारिक दृष्टि सूं इज है । आतमा, परमातमा, मोक्ष, संसार आदि रै सम्बन्ध में इणां में कोई भेद कोनी । जैन धरम रै आचार्यां, साधु-संतां अर श्रावकां रो सम्पर्क साधारण जनता सूं ले'र बड़ा-बडा राजा-महाराजा ताई रह्यो । प्रभावशाली जैन श्रावक अठै राजमन्त्री, फोजदार सलाहकार, खजांची अर किल्लेदार जिसा विशिष्ट ऊंचा पदां पर रह्या । गुजरात मे कुमारपाळ रै समै वस्तुपाळ तेजपाळ जैन धर्म री घणी प्रभावती करी । मेवाड़ में रामदेव, सहणा, कर्मासाह, भामा साह, क्रमशः महाराणा लाखा, महाराणा कुंभा, महाराणा सांगा अर महाराणा प्रताप रा राजमन्त्री हा । कुंभलगढ रा किल्लेदार आसासाह बाळक राजकुंवर उदयसिह रो गुप्त रूप सूं पाळन-पोषण कर अदम्य साहस अर स्वामिभक्तिं रो परिचय दियो । बीकानेर रा मन्त्रियां में वत्सराज, करमचन्द बच्छावत, वरसिह, संग्रामसिह आदि री सेवावां घणी महत्त्वपूर्ण है । बीकानेर रा महाराजा राय सिह जी, करणसिह जी, सूरतसिह जी जैनाचार्य जिनचन्द्र सूरि, धर्म वर्धन अर ज्ञानसार जी नै बड़ो सम्मान दियो । जोधपुर राज्य रा

मंत्रियों में मेहतां रायचन्द, वर्धमान, आसकरण, मूंगोत नैरासी, इन्द्रराज मेहता, अखैराज, लखमीचंद आदि रो विशेष महत्त्व है। जयपुर रा जैन दीवाना री लाम्बी परम्परा रयी है। इणां में मुख्य है- मोहनदास संघी, हुकुमचंद, विमलदास छावड़ा, रामचन्द्र छावड़ा, कृपाराम पाण्ड्या, मानकचद गोलेछा, नथमळ गोलेछा आदि। अजमेर रा घनराज सिधवी बड़ा योद्धा हा। अ सगळा वीर मत्री आपणां प्रभाव सूं जैन मंदिरा अर उपासरा रो निरमाण कराये। घणखरी जन कल्याणकागी प्रवृत्तियां रें विकास अर संचालक मे भी इणां रो बड़ी हाथ रयो।

देस रें नव निर्माण री सामाजिक, धारमिक, शैक्षणिक, राजनीतिक, आर्थिक प्रवृत्तियां में जैन मतावलम्बी महत्त्वपूर्ण योगदान दियो। सम्पन्न जैन श्रावक आपणी आमदनी रो निश्चित भाग लोकोपकारी प्रवृत्तिया मे खरच करै। जीवदया, पशुत्रलि निषेध, वृद्धाश्रम, विधवाश्रम, जिसी कई प्रवृत्तियां चालै। जरूरतमंद लोगां नै मदद देवण सारूं भी कई ट्रस्ट काम करै। समाज में अछूत कहावा आळा लोगां रें जीवन स्तर नै ऊंचो उठा'र वामे फैल्योडी कुरीतियां मिटावण खातर वीरवाळ अर धरमपाळ जिसी प्रवृत्तियां चालै। लोक शिक्षण रें सागै नैतिक शिक्षण खातर घणखरी शिक्षण संस्था वां, स्वाध्याय मंडळ अर छात्रावास काम करै। सार्वजनिक स्वास्थ्य सुधारण गी दिसां में जैन लोगां घणखरा अस्पताल खोलिया। अठे रोगियां नै मुक्त में या रियायती दर पर इलाज री सुविधा दी जावै।

पुराणै साहित्य री रक्षा करण में जैनियां रो महत्त्वपूर्ण योगदान रह्यो। जैन माधुनी केवळ मौलिक साहित्य री रचना करी वरन् जीर्ण शीर्ण दुरलभ ग्रंथा रो प्रतिलेखन कर वांनै नष्ट हुवण सूं बचाया। वारी प्रेरणा सूं ठौड़-ठौड़ ग्रंथ भंडार थरपीजग्या। अ ग्रंथ भंडार राष्ट्र री सांस्कृतिक निधि रा सांचा रक्षक है।

महावीर की परम्परा में आज हजारों साधु मुनिराज अर-  
साध्वियांजी है। अ चौमासे में एक ठौड़ रैवे अर शेषकाल गांव -  
गांव पदयात्रा करै। इणां की प्रेरणा अर उपदेसां सूं समै-समै  
नैतिक जागरण आध्यात्मिक साधना अर तप-त्याग रा विविध  
कार्यक्रम बगै। लोककल्याण की घणखरी प्रवृत्तियां पण चालै।  
इण भांत व्यक्तिगत जीवन निरमळ, उदार अर पवित्र बगै तथा  
सामाजिक जीवन मांय मैत्री, बातसल्य, बन्धुत्व जिसा भावां की  
बढोतरी हवै।

कुळ मिला'र कयौ जा सकै कै महावीर की परम्परा में जीवन  
रै सर्वांगीण विकास कांनी लगोलग ध्यान रैवे। आ परम्परा मानव  
जीवन की सफलता नै इज मुख्य नीं मानै, इण रोबळ रैवे मिनखपणा  
की सार्थकता अर आत्मसुद्धि पर।

## १२ | महावीर-वाणी

लोकभाषा रो प्रयोग :

भगवान् महावीर आपणा उपदेस लोकभाषा में दिया । वां रै प्रवचनां री भाषा अर्धभागधी (प्राकृत) ही जो उण वगत मगध अर अंग देसां में बोली जावती । महावीर रा उपदेस किणीं खास वर्ग, धर्म या जाति खातर नी हा । वणां री घरमसभा में राजा-रंक, महाजन-हरिजन, वामण-सूद्र सैं जणा समान भाव सूं आवता ।

महावीर सूत्र रूप में उपदेस देवता । वांरो संकळन गणधर गाथा या ग्रंथ रूप में कियो । आज भगवान् महावीर रा जै उपदेस वचन मिलै, वै गणधरां अर स्थविर मुनियां द्वारा संकलित मान्या जावै । महावीर रा उपदेस ग्रंथ 'आगम' कहीजै ।

आगम साहित्य :

जैन धर्म री दिगम्बर परम्परा रो विसवास है कै भगवान् महावीर री वाणी आज मूल रूप में सुरक्षित कोनी । वणारा बाद रा आचार्यां याददास्ती रै आधार पर जिण शिक्षावां रो संकळन कियो, वो इज आज मिलै । पण श्वेताम्बर परम्परा मानै कै भगवान् महावीर री शिक्षावा आज भी उणीज भाषा में आगम रूप में सुरक्षित है । श्वेताम्बर मूर्तिपूजक परम्परा आगमां री सख्या ४५ मानै । स्थानकवासी अर तैरापंथी परम्परा री मान्यता ३२ आगमां री है । ३२ आगमां रा नाम इण भांत है—

ग्यारह अंग

१. आचारांग

बारह उपांग

१२. औपपातिक



- |                                |                           |
|--------------------------------|---------------------------|
| २. सूत्रकृतांग                 | १३. राजप्रश्नीय           |
| ३. स्थानांग                    | १४. जीवाभिगम              |
| ४. समवायांग                    | १५. प्रज्ञापना            |
| ५. भगवती (व्याख्या प्रज्ञप्ति) | १६. जम्बूद्वीप प्रज्ञप्ति |
| ६. ज्ञाताधर्म कथा              | १७. सूर्यप्रज्ञप्ति       |
| ७. उपासक दशा                   | १८. चन्द्र प्रज्ञप्ति     |
| ८. अन्तकृद्दशा                 | १९. निरयावलिका            |
| ९. अनुत्तरौपपानिक              | २०. कल्पावतसका            |
| १०. प्रश्न व्याकरण             | २१. पुष्पिका              |
| ११. विपाक श्रुत                | २२. पुष्पचूलिका           |
|                                | २३. वाल्मि दशा            |

### चार मूलसूत्र

२४. दशवैकालिक  
 २५. उत्तराध्ययन  
 २६. नंदीसूत्र  
 २७. अनुयोग द्वार

### चार छेदसूत्र

२८. निशीथ  
 २९. वृहत्कल्प  
 ३०. व्यवहार  
 ३१. दशाश्रुतसकंध  
 ३२. आवश्यक

ऊपर दियोड़ा ३२ आगमां मांय १० प्रकीर्णक [चतुःशरणं, आतुर प्रत्याख्यान, भक्तपरिज्ञा, संस्तार, तन्दुळवैचारिक, चन्द्रकवै-  
 ध्यक, देवेन्द्रस्तव, गणिविद्या, महाप्रत्याख्यान अरु वीरस्तव) कल्प-  
 सूत्र, चूलिका आदि री गणना करण सू' उणांरी सख्या ४५ हुय  
 जावै ।

### महावीर-वाणी :

आगमां माय जैन तत्त्वविद्या, जैन आचार, जैन संस्कृति  
 आदि विविध विषयां री जाणकारी है । अठे महावीर-वाणी रा

इसा मूल प्राकृत अंश राजस्थानी अनुवाद रै सागै दिया जाय रह्या है, जं जीवन अर समाज नै निर्मळ, पवित्र, सयमशील अर आतम-पाण बणावण में उपयोगी है।

## १. धर्म

धम्मो मंगल मुक्किट्ठ, अहिंसा संजमो तवो ।

देवावि त नमंसन्ति, जस्स धम्मो सयामणो ॥

दशवैकालिक सूत्र १।१

धरम उत्कृष्ट मंगळ है। वो अहिंसा, संयम अर तप रूप है। जिण साधक रो मन हमेशा इण धरम साधना में रमण करै, वी नै देवता पण नमस्कार करै।

एगा धम्मपडिमा, जं से आया पज्जवजाए ।

स्थानांग सूत्र १।१।४०।

धरम इज एक इसो पवित्र अनुष्ठान है, जिणसूँ आतमा रो सुद्धिकरण हुवै।

सयय मूढे धम्मं नाभिजाणइ ।

आचारांग सूत्र ३।१

सदा विषय-वासना में मगन रैवा आळो मिनख (मूढ) धरम रै तत्त्व नै नी जाण सकै।

समियाए धम्मो आरिएहिं पवेइए

आचारांग सूत्र १।८।३

आर्य महापुरुसां समभाव नै धरम कह्यो है।

अत्थेगइयाणं जीवाणं सुत्ततं साहू,

अत्थेगइयाणं जीवाणं जागरियत्तां साहू ॥

भगवती सूत्र १।२।२।

अधार्मिक आतमावां रो सूतो रैवणो आच्छो अर धरमनिष्ठ  
आतमावां रो जागतो रैवणो आच्छो ।

चत्तारि धम्मदारा—खंती, मुत्ती, अज्जवे, मद्दवे ।

स्थानांग सूत्र ४।४

धरम रा चार दरवाजा है—क्षमा, सन्तोस, सरळता अर  
नम्रता ।

दीवे व धम्मं—

सूत्रकृतांग ६।४

धरम दीवा री भांत अज्ञान रूपी अधारा नै दूर करै ।

सोही उज्जुअ भूयस्स, चिट्ठई ।

उत्तराध्ययन सूत्र ३।१२

सरळ आतमा री इज सुद्धि हुवै अर सुद्ध आतमा में इज  
धरम टिकै ।

धम्मस्स विणओ मूलं ।

दश० ६।२।२।

धरम रो मूल विनय है ।

## २. अहिंसा

सव्वे पाणा पियाउया, सुहसाया दुक्खण्डिकूला अप्पियवहा ।  
पियजीविणो, जीविउकामा, सव्वेसि जीवियं पियं ॥

आचारांग सूत्र २।२।३।

सगळा जीवां नै आपणी आयुष्य वाल्हो लागै, सुख आच्छो अर  
दुख खराब लागै । मोत सगळा नै खराब अर जीवणो आच्छो लागै ।  
हरेक प्राणी जीवा री इच्छा राखै । सगळा नै आपणो जीवन प्यारो  
लागै ।

एवं खु नाणियो सारं, जं न हिंसइ किचण ।

सूत्रकृतांग १/११/१०/

किणो प्राणी रो हिंसा नी करण में इज ज्ञानी हुवण रो सार है ।

आय तुले पयासु ।

सूत्र १/११/३

सगळा प्राणियां रं प्रति आतम तुल्य भाव राखणो चाइजै ।

समया सब्ब भूएसु, सत्तु मित्तिसु वा जगे ।

उत्ता० १६/२५

अन्नु अथवा मित्र सगळा पर समभाव रो दृष्टि राखणी अहिंसा है ।

मेत्ति भूएसु कप्पए ।

उत्ता० ६/२/

सगळा जीवां रं सागै मित्रता रो भाव राखो ।

तुमंसिनाम सच्चेव, जं हतव्वं ति मन्नसि ।

आचा. ५/५/

जिणने तू मारणो चावै, वो तू इज है । अर्थात् थारी अर उणारी आतमा एक समान है ।

से हु पन्नाणमंते बुद्धे आरभोवरए ।

आचा. ४।४

जो हिंसात्मक प्रवृत्तियां सूं अळगो है, वोइज बुद्ध-ज्ञानी है ।

सव्वपाणा न हीलियव्वा, निंदियव्वा ।

प्रश्नव्याकरण २।१।

संसार रै किणी प्राणी री नीं अक्वहेलना (तिरस्कार) करणी चाइजै अर नी निन्दा ।

### ३. सत्य

भासियव्वं हियं सच्च ।

उत्ता. १६।२६।

नित हमेस हितकारी अर सांचा वचन बोलणा चाइजै ।

सच्चं लोगम्मि सारभूय, गम्भीरतरं महासमुद्दाओ ।

प्रश्नव्याकरण सूत्र २।२।

इण लोक् में सत्य इज सार तत्त्व है । ओ महान समन्दर सूं भी बत्तो गभीर है ।

लुद्धो लोलो भरोज्ज अलियं ।

प्रश्न २।२।

मिनख लोभ सूं प्रेरित हुयर भूठ बोलै ।

अप्पणो थवणा, परेसुनिन्दा ।

प्रश्न २।२।

आपणी वढ़ाई अर दूजां री बुराई भूठ बोलण रै समान है ।

सच्चं च हियं च मिय च गाहण च ।

प्रश्न २।२।

साधक नै इसा वचन बोलणा चावै जै हित, मित अर ग्राह्य हुवै ।

अप्पणा सच्चमेसिज्जा ।

उत्त० ६।२

आपणी आतमा सूं सांच री खोज करो ।

## ४. अस्तेय

दन्त सोहृणमाइस्स अदत्तास्स विवज्जणं

उत्त० १६।२८।

अस्तेय व्रत में सरधा राखणियो मिनख विगर किणी री  
आज्ञा सूं दांत कुरेदवा खातर तिणको भी नीं उठावै ।

अणुन्नविय मेण्हियव्वं ।

प्रश्न २।३।

किणी भी चीज नै विगर आज्ञा सूं ग्रहण नीं करणी चाइजै ।

लोभाविले आययई अदत्ता ।

उत्त० ३२।२६।

जो मिनख लोभ सूं अभिभूत हुवै वो चोरी करै ।

परदव्वहरा नरा निरणुकंपा निरवेक्खा ।

प्रश्न. १।३।

दूजा रो धन लेवा आळो मिनख निरदयी अर परभव री  
उपेक्षा करण आळो हुवै ।

परगंतिगऽभेज्जलोभं मूलं ।

प्रश्न १।३६।

पर धन री गृद्धि री मूल हेतु लोभ है अर आइज चोरी है ।

## ५. ब्रह्मचर्य

जहां कुम्मे सअंगाइ, मए देहे समाहरे ।

एव पावाइ मेहावी अज्झप्पेण समाहरे ।

सूत्र. १।८।१६।

जिण भांत काछत्रो आपणै अंगा नै माय नै सिकोड'र खतरा  
सूं मुक्त हुय जावै, उणीज भांत साधक अध्यात्मयोग सूं अन्तरा-  
भिमुख हुयर खुदनै विषयां सूं बचावै ।

तवेसु वा उत्तम-बंधचेरं ।

सूत्र. १।६।२३।

तपां में उत्कृष्ट तप ब्रह्मचर्य है ।

अरोगा गुणा अहीणा भगंति एककंमि बंधचेरे ।

प्रश्न २।४।

ब्रह्मचर्य की साधना करणै सूं अनेक गुण आपूं आप प्राप्त हुय जावै ।

कुसीलवड्ढणं ठाणं, दूरओ परिवज्जए ।

दश. ६।५६।

ब्रह्मचारी नै वा जगां दूर सूंइज त्याग देगी चाइजै जठै रंवरण सूं कुसील आचरण री वृद्धि हुवै ।

### ६. अपरिग्रह

मुच्छा परिग्गहो वुत्तो ।

दश० ६।२०

वस्तु रै प्रति रह्यो हुयो ममत्व-भाव परिग्रह है ।

नत्थि एरिसो पासो पडिबंधो अत्थि, सब्व जीवाणं सब्वलोए ।

प्रश्न० १।५

प्रमत्त पुरुस धन सूं नीं तो इण लोक में आपणी रक्षा कर सकै अर नीं परलोक में इज ।

इच्छा हु आगास समा अणंतिया

उत्त० ६।४८

इच्छावां आकास रै समान अनन्त है ।

परिग्गहनिविट्ठाणं, वेरं तेसि पवड्ढई । सूत्र० १।६।३।

जो मिनख परिग्रह-संग्रहवृत्ति में व्यस्त रैवै, वो इण ससार में वैर री बढ़ोतरी करै ।

अन्वे हरति तं विचां, कम्मि कम्मोहिं किच्चती सूत्र० १।६।४।

एकठो करियोड़ो धन यथा समय दूजो उड़ा लैवै पण संग्रही  
नै उगां करमां रो फळ भोगराो पडै ।

कासे कमाही, कमियं खु दुखं । दश० २।५।

इच्छावां रो नास (अन्त) करराो दुख रो नास करराो है ।

एतदेव एगेसि महवभयं भवई आचा० ५।२।

पन्निग्रह इज इण लोक में महाभय रो कारण हुवै ।

असंविभागी एा हु तस्स मोक्खो दश० ६।२.१३।

जो आपणी प्राप्य सामग्री वांटै नीं, उगरी भुगति नीं हुवै ।

### ७. तप

सउणी जह पंसुगुंडिया, विहुणिय धंसयइ सियं रयं ।

एवं दविओवहाणवं कम्मं खवई तवस्सि माहरो ॥

सूत्र० २।१।१५

जिण भांत सकुनी नाम रो पंछी आपणौ पंखा नै फड़फड़ार  
उण पर लाग्योड़ी घूड नै भाड दैवै । उणीज भांत तपस्या सूं मुमुक्षु  
आपणौ आत्म-प्रदेसां पर लागी करम-रज नै दूर करै ।

भव कोडिय संचियं कम्मं, तवसा णिज्जरिज्जइ । उत्त० ३०।६।

करोड़ा भवां सूं संचित करियोड़ा करम तपस्या सूं जीर्ण  
अर नष्ट हुय जावै ।

नो पूयणं तवसा आवहेज्जा । सूत्र० १।७।२७

तप सूं साधक नै पूजा-प्रतिष्ठा रो कामना नीं करणी चाइजै ।

छन्दं निरोहेण उवेइ मोक्खं ।

उत्ता० ४।८।

इच्छा निरोध तप सूं मोक्ष री प्राप्ति हुवै ।

तवेण परिसुज्भई ।

उत्ता० ३८।३५

तप सूं आतमा री सुद्धि हुवै ।



८. समभाव

सर्व्वं जगं तू समयारुणु पेही, पियमप्ययं कस्स वि नो करेज्जा ।

सूत्र० १।१०।६।

जो साधक सगळा विश्व नै समभाव सूं देखै, वो नी किणी रो प्रिय करै अर नी किणी रो अप्रिय ।

सामाइयमाहु तस्स ज जो अत्पाण भएण दंसए ।

सूत्र० १।२।२।१७

समभाव वो इज साधक धार सकै जो अपणै आपनै हर भय सूं मुक्त राखै ।

नो उच्चावयं मणं नियच्छिज्जा । आचा० २।३।१।

संकट री घड़ियां में मन नै ऊंचो-नीचो अर्थात् डांवाडोल नीं हुवण देणो चाइजै ।

समय सया चरे । सूत्र० २।२।३।

साधक नै हमेसा समता रो आचरण करणो चाइजै ।

समता सर्व्वत्थ सुव्व ए । सूत्र० २।३।१३।

सुव्वती नै हर जगां समता भाव राखणो चाइजै ।

९. वीतराग भाव

न लिप्पइ भव मज्झे वि संतो,

जलेण वा पोक्खरिणी पलासां ।

उत्त० ३२-४७

जो आतमा विषयांसूं निरपेक्ष है वा संसार में रैवतां हुया भी जळ में कमळणी री भांत अलिप्त रैवै ।

विमुत्ताहु ते जणा पारगमिणो ।

आचा० १।२।३।

जै साधक इच्छावां पर विजय पाय लीवी, वै सचमुच मुक्त पुत्र है ।

से हु चक्रू मगुस्साणां जे कंखाए य अन्तए ।

सूत्र० १।१५।१४।

जिण साधक अभिलाषा-आसक्ति नै नष्ट कर दीवी वो मिनखां खातर मार्गदर्शक आंख रूप है ।

वोयरागभाव पडिवन्नै वियरां,

जीवे सम सुहदुवखे भवइ ।

उत्त० २६/३६ ।

वोतराग भाव नै प्राप्त करण आळो जीव सुख-दुख में समान रवे ।

अणिहे से पुट्ठे अहियासए ।

सूत्र० २/१/१३

आतमविद् साधक नै निस्पृह भाव सूं आवण आळा कष्ट सहन करणा चाइजै ।

### १०. आतमा

जे एगं जाणइ, से सव्वं जाणइ ।

जे सव्वं जाणइ, से एग जाणइ ॥

आचा० १।३।४।

जो एक नै जाणै वो सबनै जाणै अर जो सबनै जाणै वो एक नै जाणै ।

अप्पा नई वेयरणी, अप्पा में कूडसामली ।

अप्पा काम दूहा धेरु, अप्पा मे नंदणं वरां ॥

उत्त० २०।३६।

म्हारी दुष्प्रवृत्त आत्मा इज वैतरणी नदी अर कूटशाल्मली वृक्ष है। म्हारी सुप्रवृत्त आत्मा इज काम-दूधा-धेनु (सौं इच्छा पूरण करण आळी गाय) अर नन्दन वन है।

सरीर माहु नावत्ति, जीवो बुच्चइ नाविओ ।

संसारो अण्णवो वुत्तो, जं तरन्ति महेसिणो ॥

सरीर नाव, आत्मा नाविक अर संसार समन्दर कह्यो जावै । मोक्ष री इच्छा राखणियाँ महर्षि इणनै तैर जावै ।

पुरिसा ! अत्ताणमेव अभिनिगिञ्ज्झ,

एवं दुक्खा पमोक्खसि ॥

आचा० ३।३।११९

हे पुरुष ! तूँ अपणै आपरो निग्रह कर, खुद रै निग्रह सूँ तूँ सगला दुःखै सूँ मुक्त हुय जावैला ।

अप्पा चेव दमेयव्वो, अप्पा हु खलु दुद्दमो ।

अप्पा दन्तो सुही होइ, अस्सिं लोए परत्थय ॥

उत्ता० १।१५।

आत्मा रो इज दमन करणो चाइजै क्यूँकै आत्मा दुरदम्य है। इणरो दमन करण आळो संयमी इण लोक अर परलोक में सुखी हुवै ।

वरं ने अप्पा दन्तो, संजमेण तवेण य ।

नाह परेहि दम्मन्तो, बंधणेहि वहेहि य ॥

उत्ता० १।१६।

दूजा लोन बंधन अर बध सूँ म्हारो दमन करै, इणारी अपेक्षा ओ आच्छो है कै म्हुँ खुद संयम अर तप सूँ आपणी आत्मा रो दमन करुँ ।

बंधन मोक्षो अज्भक्त्येव । आचा० १।१।२।

बंधन अर मोक्ष आपणै भीतर इज है ।

अप्याणमेव जुज्भाहि, किं ते जुज्भेण वज्भग्नो ।

अप्याणमेव अप्याण, जइत्ता सुहमे हए ॥

उत्ता० ६।३५।

आपणी आतमा रै सागैइज तूँ जुद्ध कर, वाहरी दुसमना सूँ जुद्ध करण में थनै काई लाभ ? आतमा नै आतमा सूँ इज जात'र मिनख सांचो सुख पाय सकै ।

अप्याकत्ता विकत्ताय, दुहाण य सुहाण य ।

अप्या मित्तममित्तं च दुपट्ठिअ सुप्पट्ठिअो ॥

उत्ता० २० ३७।

आतमा इज सुख-दुख नै उत्पन्न करण आळी अर आतमा इज उणरो नास करण आळी है । सत् प्रवृत्ति में लाग्योड़ो आतमा आपणी मित्र अर दुष्प्रवृत्ति में लाग्योड़ी आतमा आपणी शत्रु है ।

जो सहस्रं सहस्राणां, संगामे दुज्जए जिणो ।

एगं विणोज्ज अप्याणां, एस से परमो जअो ॥

उत्ता० ६।३४।

जो मिनख दुर्जय-सग्राम में दस लाख योद्धावां पर विजय प्राप्त करै, उणरी अपेक्षा जै आपनै खुद नै जीत लैवै तो आ उणरी सबसूँ बड़ी जीत है ।

न तं अरी कंठ छेत्ता करेइ, जं से करे अप्पणिया दुरप्पा ।

उत्ता० २०।४८

दुराचार में प्रवृत्त आतमा जितरो आपणो अनिष्ट करै, उत्तरो अनिष्ट तो एक गळो काटवा आळो दुसमन भी नी करै ।

पुरिसा ! अत्ताणमेव अभिगिज्भ, एवं दुक्खा प मुच्चसि ।

आचा० ३।३।१०

हे आतमन् ! तू खुदइज आपणो निग्रह कर । इसी करबा  
सूं तू दुखां सूं मुक्त ह्य जावैलो ।

अतकडै दुक्खे, नो परकडै ।

भग० ७।१

आतमा रो दुख आपणो खुद रो कर्योड़ो है । ओ दूजां रो  
दियोड़ो कोनी ।

दुज्जयं चैव अप्पाणां, सब्बमप्पो जिए जियं । उत्त० ६।३६

एक दुर्जय आतमा नै जीत लेवा पर सब कुछ जीत लियो  
जावै ।

## ११. मोक्ष

नाराणं च दंसराणं चैव, चरित्तं च तवो तथा ।

एस मग्गुत्ति पन्नतो, जिरोहि वर दंसिहि ॥

उत्त० २८।२

ज्ञान, दर्शन, चारित्र अर तप इज मोक्ष रो मारग है । आ  
बात सर्वदर्शी ज्ञानीजण बतावी ।

नादंसराणस्स नाराणं

नारोण विणा न हन्ति चराणागुणा ।

अग्गुणस्स नत्थि मोक्खो,

नत्थि अमोक्खस्स निव्वाराणं ॥

उत्त० २८।३०

सरधा रै बिना ज्ञान नीं हुवै, ज्ञान रै बिना आचरण नीं हुवै  
अर आचरण रै बिना मोक्ष नीं मिलै ।

सयमेव कडैहिं गाहइ, नो तस्स मुच्चेज्जसुट्ठयं

सूत्र० १।२।१।४।

आतमा आपणा खुद रा बांध्योड़ो करमां सूं बधं । करियोड़ो  
करमां नै भोगियां बिना मुगति नी मिलै ।

आहंसु विज्जाचराणं पमोक्ख ।

सूत्र० १।१२।११

ज्ञान अर करम सूं इज मोक्ष प्राप्त हुवै ।

कडाण कम्माण न मोक्ख अत्थि । उत्त० ४।३।

वांध्योडा करमां रो फळ भाग्यां विना- मुगति नी मिलै ।  
बन्धप्प मोक्खो तुज्झक्क त्थेव । आचा० ५।२।१५०।

बन्धणा सूं मुक्त हवणो थारै इज हाथै है ।

परीसहे जिणंतस्स, सुलहा सुगइ तारिसगस्स । दश० ४।२७।

जो साधक परिसहां पर विजय पात्रै, उगरै वास्तै मोक्ष  
सुळभ है ।

## १२. विनय

विणाए ठविज्ज अप्पणां इच्छतो हियमप्पणो ।

उत्त० ॥६

आतमहित करण आळो साधक आपनै खुद नै विनय घरम में  
स्थिर राखै ।

सिया हु से पावय नो डहिज्जा,  
आसीविसो वा कुविओ न भक्खे ।

सिया विसं हालहलं न मारे,  
न यावि मुक्खो गुरु हीलणाए ॥

दश० ६।७

संभव है कदाच आग नी जळावै, संभव है किरोधी नाग नीं  
डसे अर ओ भी सम्भव है कै हलाहळ विष मिनख नै नीं मारै । एण  
गुरु री अबहेलना करणियै साधक खातर मोक्ष सम्भव कोनी ।

रायणिएसु विणयं पउंजे । दश० ८।४०

वडैरा रै सागै विनयपूर्ण बैवार करणो चांइजै ।

मूलाओ खवप्पभवो दुमस्स,  
खधोउ पच्छा समुवैन्ति साहा ।

सहृप्पसाहा विरुहन्ति पत्ता,  
तत्रो सि पुष्पं च फल रसो य ॥ दश० ६।२।१

वृक्ष रै मूळ सूं स्कन्ध उत्पन्न हुवै, स्कन्ध सूं शाखावा अर  
शाखावां सूं प्रशाखावां निकळै । इणारै पळै फूळ, फळ अर रस  
पंदा हुवै ।

एवं धम्मस्स विणाम्भो. मूलं परमो से मोक्खो ।  
जेण कित्ति, सुय, सिग्घं, निस्सेसं चाभिगच्छई ।

दश० ६।२।२

इणीज भांत धरम रूपी वृक्ष रो मूळ विनय है अर उणारो  
आंखरी फळ मोक्ष । विनय सूं मिनख नै कीरति, प्रशंसा अर श्रुत-  
ज्ञान आदि इष्ट तत्त्वां री प्राप्ति हुवै ।

वेयावच्चेणं तित्थयरनाम गोयं कम्मं निबंधेइ ।

उत्त० २६।४३

वैयावृत्त्य-सेवा सूं जीव तीर्थंकर नाम गोत्र जिसा उत्कृष्ट  
पुण्य करमां रो उपार्जन करै ।

गिलाणम्मस अगिलाए वेयावच्चकरणायाए अबुट्टे यव्वं भवइ ।

स्था० ८

रोगीं री सेवा करण खातर नितहमेस जागरूक रैवणो  
चाइजै ।

तम्हा विणायमेसिज्जा, सीलं पडिलभेज्जओ

उत्त० १।७

विनय सूं साधक नै शील अर सदाचार री प्राप्ति हुवै । इण  
वास्तै उणारी खोज करणी चाइजै ।

विणायमूले धम्मे पन्नते ।

ज्ञाता० १।५

धरम रो मूल विनय (सद्ग्राचार) है ।

अणुसासियो न कुप्पिज्जा ।

उत्त० १।६

गुरुजनां री सीख पर किरोध नीं करणो चाइजै ।

### १३. संयम

चउव्विहे संजमे—

मणसंजमे, वइसंजमे, कायसंजमे उवगरण संजमे ।

स्था० ४।२

संयम चार प्रकार रो हुवै-मन रो संयम, वचन रो संयम, काया रो संयम अर उपधि (सामग्री) रो संयम ।

संजमेणं अणणह्यत्तां जणयइ उत्त० २६।२६

संयम सूं जीव आश्रव (पाप) रो निरोध करै ।

असंजमे निर्याति च सजमे य पवत्तणं

उत्त० ३१।२

असंयम सूं निवृत्ति अर संयम में प्रवृत्ति करणी चाइजै ।

तहेव हिंसं अलियं चोज्जं अवम्भ सेवणं ।

इच्छा कामं च लोभं च, संजओ परिवज्जए ॥ उत्त० ३५।३

संयमी आतमाहिंसा, भूठ, चोरी, अब्रह्मचर्य-सेवन, भोग-विळास अर लोभ रो सदा खातर परित्याग करै ।

### १४. क्षमा

खामेमि सव्वे जीवा, सव्वे जीवा खमंतु मे ।

मित्ती मे सव्वभूएसु, वेरं मज्झं न केणइ ॥

आवश्यक सूत्र ४।२२

महैं सव जीवा सूं क्षमां मांगू, सव जीव म्हनै क्षमा करै ।  
म्हारी सव जीवां रै सागै मित्रता है । किणी रै सागै म्हारो वैर-विरोध कोनी ।

पुढविसमो मुणी ह्वेज्जा । दस० १०।१३

मुनि नै धरती रै समान क्षमाणील हुवणो चाइजै ।

खतिएणं जीवे परिसहे जिणइ । उत्त० २६।४६

क्षमा सूं जीव परीसहां पर विजय प्राप्त करै ।



खति सेविज्ज पंडिए । उत्त० १।६  
 पंडित पुरुष नै क्षमा धरम री आराधना करणी चानै ।  
 पियमप्पियं सव्वत्तित्रखएज्जा । उत्त० २१।१५  
 साधक प्रिय अप्रिय सब शान्ति सूं सहन करै ।  
 खमावणयाए रां पल्हायणभावं जणायर । उत्त० २६।१७  
 सूं आतमा में अपूरव हरख रो भाव प्रगट हुवै ।

### १५. मृत्यु—कला

न संत मरणंते, सीलवंता बहुस्सया । उत्त० ५।२६  
 शीलवान अर बहुश्रुत भिक्षु मौत रै क्षणां मांय भी दुखी नी  
 हुवै ।

मरणां हेच्च वयंति पंडिया । सूत्र० १।२।३।१  
 पंडित पुरुष इज मौत री दुदंम सीमा लांघ'र अविनाशी पद  
 नै प्राप्त करै ।

कालं अणवकंख माणे विहरई । उपा० १।७३  
 आत्मार्थी साधक कस्टां सूं जूंभतो हुयो मौत सूं अनपेक्ष  
 वण'र रैवै ।

माराभिसंकी मरणा पमुच्चइ । आचा० १।३।१  
 जो मिनख मौत सूं सदा सावचेत रैवै वोईज उणसूं मुगति  
 पाय सकै ।

### १६. कपाय—विजय

अहे वयन्ति कोहेणां, माणेणां अहमागई ।  
 माया गइ पडिग्वाओ, लोहोओ दुहाओ भयं ॥

उत्त० ६।४५

क्रोध सूं जीव नीचे पडै, मान सूं जीव नीत्र गति पावै, माया  
 सूं जीव रुदुगात रो नाश करै अर लोभ सूं जीव नै इण लोक अर  
 परलोक में भय उत्पन्न हुवै ।

- चउक्कसायावगए म पुज्जो । दश० ६।३।१४  
 जो चार कपाय सूं रहिन है, वो पूज्य है ।  
 न विरुज्जेज्ज केणइ । सूत्र० १५।१३  
 किणी रै भी सागै वैर-विरोध मत राखो ।  
 कसाया अग्गिणो वुत्ता, सुय सील तवो जलं ।

उत्ता० २३।५३

कपाय (क्रोध, मान, माया, लोभ) आग कहीजै । उण नै  
 वृभावण साहं श्रुत, शील अर तप जल रूप है ।

जो उवसमइ तस्य अतिय आराहणा । वृहत्कल्प १।३५

जो कपाय रो उपशम करै, वो इज वीतराग प्रभु रै पथ रो  
 सांचो आराधक हुवै ।

अप्पाणं पि न कोवए । उत्ता० १।४०

अपनै आप पर भी कदै किरोध मत करो ।

कोहो पीइं पणासेइ । दश० ८।३८

किरोध प्रीति रो नाश करै ।

उवसमेण हरो कोहं । दश० ८।३९

शान्ति सूं किरोध नै जीतो ।

माणविजएणं मह्व जणयइ । उत्ता० २६।६८

अहंकार नै जीतण सूं जीव नै नम्रता री प्राप्त हुवै ।

माणो विणयनासणा । दश० ८।३८

अहंकार विनय गुण रो नास करै ।

माण मह्वया जिरो दश० ८।३९

अहंकार नै नम्रता सूं जीतणो चाइजै ।

मायमज्जवभावेण दश० ८।३९

सरळता सूं माया अर कपट नै जीतणो चाइजै ।

माया विजएण अज्जगं जणयइ उत्ता० २६।६९

माया नै जीत लेवण सूं सरळता प्राप्त हुगै ।

माया मित्ताणि नासेइ । दश० ८।३८

माया मित्रतारो नास करै ।

लोभो सब्वविणासणो दश० ८।३८

लोभ सगळा सद्गुणां रो नास करै ।

लोभ संतोसओ जिणो । दश० ८।३९

लोभ नै संतौस सूं जीतणो चाइजै ।

जहा लाहो तहा लोहो, लाहा लोहो पवड्ढइ ।

दो मासकयं कज्जं. कोडी ए वि न निट्ठियं ॥

उत्त० ८।१७

ज्यूं-ज्यूं लाभ हुवै त्यूं-त्यूं लोभ पण वध्धं । दो मासा सोना  
सूं पूरो होबा आळो काम करोडां सूं भी पूरो नीं हुयो ।

सुवण्णा-रूपस्स उपव्वया भवे,

सिया हु कैलास सभा असांखया ।

नरस्स लुद्धस्स न तेहि किंचि

इच्छा हु आगाससमा अणान्तिया ॥ उत्त० ९।४८

कदाच सोना, चांदी रा कैलास जिसा बड़ा अनेक परवत हुय  
जावै तो भी लोभी मिनख नै तृप्ति नीं हुवै, कारण कै इच्छावां  
आकास रै समान अनन्त हुवै ।

करेइ लोहं, वेर वड्ढइ अप्पणो । आचा० २।५

जो आदमी लोभ करै, वो चारुंभेर बैर री बढोतरी करै ।

### १७. राग-द्वेष

रागो य दोसो वि य कम्मवीय,

कम्मं च मोहप्प भवं वयंति ।

कम्मं च जाई मरणास्स मूलं,

दुक्ख च जाइमरणां वयंति ॥

उत्ता० ३२।७

राग अर द्वेषअै दोन्यूं करमां रा वीज है । करमां रो उत्पादक मोह इज मानीजै । करम सिद्धान्त रा विशिष्ट ज्ञानी आ वात कैवै कै जनम-मरण रो मूल करम है अर जनम-मरण इज एक मात्र दुख है ।

राग-दोसे य दो पावे, पाव कम्म-पवत्ताणे

उत्त० ३१।३।

राग अर द्वेष ये दोन्यूं पाप करमां री प्रवृत्ति कराबा में सहायक हुवै ।

छिदाहि दोसं विणएज्ज रागं, एवं सुही होहिंसि संपराए ।

दश० २।५।

द्वेष नै नष्ट करो, अर राग नै दूर करो । इयां करण सूं इज संसार में सुख री प्राप्ति हुवै ।

अकुव्वअो रागं एत्थि ।

सूत्र० १।१५।७।

जो आतमा आपणै भीतर में राग अर द्वेष रूप भाव करम नीं करै, उण रै नूंवा करम नीं बंधै ।

### १८. कर्म सिद्धान्त

सुचिण्णा कम्मा, सुचिण्णाफला भवन्ति ।

दुचिण्णा कम्मा, दुचिण्णाफलाभवन्ति ॥

अौप० ५६

आच्छा करमां रो फल आच्छो अर बुरा करसां रो फल बुरो हुवै ।

सव्वे सयकम्मकप्पिथा

सूत्र १।२।३।१८

प्राणीमात्र आपणै करियोडा करमां सूं इज विविध योनियां में भ्रमण करै ।

कम्ममूलं च जं छरां

आचा० १।३।१

करम रो मूल क्षण हिंसा है ।

एगौ सयं पच्चणुहोइ दुक्खं

सूत्र० १।५।२।२२

आतमा इज आपरौ करियोडा दुखारी भोगणहार है ।  
तुट्टंति पावकम्माणि, नवं कम्ममकुव्वओ ।

सूत्र० १।१५।।६।

जो नूवा करम नीं बांधै. उगारा पैल्योडा बंध्या पाप करम  
नष्ट हुय जावै ।

कतारमेय अणुजाइ कम्मं उता० १३।२३  
करम सदा कर्ता (करणग्राळा) रं पाछे-पाछे चालै ।  
सयमेव कडेहि गाहइ, नो तस्स मुच्चेज्जऽपुठ्ठयं ।

सूत्र० १।२।१।४

जीव आपणै खुद रै बग्यायोडै करमजाळ में आवद्ध हुवै ।  
कियोडा करमां सूं उणानै भोग्यां विगर मुगति कोनी ।

### १६. शिक्षा अर व्यवहार

विवत्ती अविणीयस्स, संपत्ति विणियस्स य,

दश० ६।२।२१।

अविनीत नै विपत्ति प्राप्त हुवै अर सुविनीत नै सम्पत्ति ।

अह पंचहि ठारोहि, जेहि सिक्खा न जवई ।

थम्भा कोहा पमाएणं, रोगेणालस्सएण य ॥

उता० ११।३।

अहंकार, क्रोध, प्रमाद, रोग अर आलस इण कारणं सूं  
शिक्षा प्राप्त नी हुवै ।

कह चरे ? कह चिट्ठे ? कहं मासे ? सहं सए ?

कह भुंजन्तो, भासन्तो, पाव कम्मं न बंधइ ?

दश० ४।७।

भंते ! किए भांत चालां, किए भांत ऊभा रेवां, किए भांत  
बैठां, किए भांत सूवां, किए भांत खावां, किए भांत बोलां, जिएसूं  
पाप करमां रो बंधण नीं हुवै ।

जयं चरे, जयं चिह्ने, जयं मासे जयं सए,  
जय भुंजन्तो, भासन्तो, पाव-कम्पं न वधइ ॥

दश० ४।८।

अयुष्मान ! जतना सूं चालो, जनना सूं उभा रैवो, जतना  
सूं वैठो, जतना सूं सूवो, जतना सूं खाओ, अर जतना सूं वोलो ।  
इए भांत पाप करम नीं वंथे ।

न य पात्रपरिक्लेवी, न य मित्तो सु कुप्पई ।  
अप्पियस्सावि मित्तास्स, रहे कल्लाण भासह ॥

उत्ता० ११।१२।

मुजिहित मिनख स्खलना हुवणा पर भी किणी पर दोपारो-  
पणा नी करै अर नी कदै मित्र पर किरोध करै । वो अप्रिय मित्र रो  
परोक्ष मे पणा प्रणमा करै ।

चत्तारि अवायणाज्जा पण्णता, तंजहा  
अविणीए विगइ पडिवद्धे, अविउसविय पाहुडे मायी ।  
स्था० ४।३।३६।

अं चार मिनख शिक्षा देवणा रै लायक नी हुवै—अविनीत,  
सुत्रादवृत्ति में गृद्ध, किरोधी अर कपटी ।

## २०. मनुष्य—जनम

चत्तारि परमंगाणि, दुल्लहाणीह जंतुणो ।  
मणुसत्तां सुई सद्धा, संजमाम्मि य वीरियं ॥

उत्ता० ३।१

इए संसार में प्राणियां खातर चार अंग घणा दुरलभ है—  
मिनखपणो, धरम—श्रवण, सरधा अर संयम में पुरुमारथ ।

चतुर्हिठारोहि जीवा माणुसत्ताए कम्म पगरेति—  
पगइ भइयाए, पगइ विणीययाए,  
साणुक्कोसयाए, अमच्छरियाए ।

स्था० ४।४

चार भांत रा मानवीय करम करण सूं आतमा मिनख जनम प्राप्त करै—सहज सरळपणो सहज, विनम्रता, दयालुता अर अमत्सरता ।

## २१. अप्रमाद

अलं कुसलस्स पमाएणं आचारांग १।२।४।  
प्रज्ञाशील साधक नै आपणी साधना में किंचित् भी प्रमाद नीं करणो चाइजै ।

भारण्डपक्खी व चरप्पमत्तो । उता० ४।६

भारण्ड पक्खी री भांत साधक अप्रमत्ता (जागरूक) भाव सूं विचरण करै ।

सव्वओ पमत्तास्स भयं,  
सव्वओ अपमत्तास नत्थि भयं ।

आचा० १।३।४।

प्रमत्ता आतमा नै चारूकांनी सूं भय रैवे । पण अप्रमत्ता आतमा नै किणी भी ओर सूं भय नीं रैवै ।

धीरे मुहुत्तामवि णो पमायए आचा० १।२।१  
धीर साधक मुहूर्त भर रै खातर भी प्रमाद नीं करै ।  
असंखयं जीविय मा पमायए ।

उता० ४।१

जीवन असंस्कृत (क्षणभंगुर) है । वोरो धागो टूट जाबा पर दुबारा जोड़ियो नीं जा सकै । आ सोच'र जरा भी प्रमाद नीं करणो चाइजै ।

उट्ठए नो पमायए आचा० १।१।२

जो साधक एक'र आपणै कर्तव्य मारग पर बढग्यो है, उणनै फेर प्रमाद नीं करणो चाइजै ।



